

**AMAWULIRO AMASA NG’  
OMATAYO  
OWEYAGAWANDIIKIRE  
Enyanjula**

Ekitabo aMawuliro aMasa ng’oMatayo oweyagawandiikire, kimo oku bitabo ebina ebiri omu Ndagaano eMpyaka ebisonzola oku bwomi bwa Yesu Kurisito. Buli kitabo ekimo kwebyo bakyeta bati, “Mawuliro ag’amazima,” amakulu gaakyo “Mawuliro aMasa.” AMawuliro aMasa ago bagawandiikire ng’oYesu amalire okufa, era abagawandiikire babbaire Matayo, n’oMaako, n’oLuuka, n’oYokaana.

Abakugu omu by’eBbaibbuli tibamaite ekiseera ekituuce era n’ekifo ekibawandiikiiremu ekitabo kinu. Neye kiri ooti-so bakiwandiikire nga wabitirewo emyanka 60 okuzwera nakimo oku kubyala oYesu era abantu bangi bateebereza bati bakiwandiikiire mu kyalo ekibeeta bati Palesitaini.

Omuwandiiki niye oMatayo, eyabbaire omusolooji w’omusolo ng’oYesu akaali okumweta okusuuka omoiza oku beegibe eikumi na babiri. Iye era abantu babbaire bamumaite eriina erindi bati Leevi.

OMatayo yawandiikire aMawuliro aMasa ganu ng’agenderera kulaga ati, oYesu niye oKurisito ogubasukireku amafuta, era oKibbumba oguyalondere tikulokola Bayudaaya bonkani neye n’abantu bonabona. OMatayo era yawandiikire ebintu bingi ebikwata oku

bwakabaka bwa Kibbumba. Ibo aBayudaaya babbaire basuubira oKurisito kusuuka kabaka w'obwakabaka bw'oku kyalo. OMatayo yatwaire omutagano munene okwakanisya enjikirirya eyo, ng'asonzola obwakabaka obw'omwoyo era obwa Kibbumba. Era alaga oYesu ng'obwali omwegesi ow'enjawulo aali n'obwezye okwegesya aMateeka omu ngeri empyaka.

OMatayo asonzola kusani ebikwata oku Yesu. Atandiikira oku lulyo lwa Yesu n'engeri egibamubyairemu, n'alonsya n'oku kumubatiza, n'emirimogye egyokulaabba n'okulamyaga egiyakolere omwitwale ly'e Galiraaya. OMatayo amaliirirya okulonsyakwe n'ebyo ebyabbairewo omu lugendolwe ng'ayaba e Yerusaalemi egibamukwatiire ni bamuwaayo eeri ab'obwezye, era alonsya n'oku kufaakwe n'okuzuukirakwe.

### **Engeri egibyecaanamu**

1. Olulyo lwa Yesu Kurisito n'okumubyala n'entandiika y'obuweereryabwe (1:1-4:25).
2. Obuweererya bwa Yesu n'ebiyayegeserye (5:1-25:46).
3. Emmaliirirya y'obuweererya bwa Yesu (26:1-28:20).

### *Olulyo lwa Yesu (Luk 3:23-38)*

<sup>1</sup> Lunu niirwo olulyo lwa Yesu Kurisito omwizukulu wa Dawudi, iye eyabbaire omwizukulu wa Ibbulaimu:

<sup>2</sup> OIbbulaimu yabbaire iteeye wa Isaka,

oIsaka yabbaire iteeye wa Yaakobbo,  
era oYaakobbo yabbaire iteeye wa Yuda  
n'abagandabe.

<sup>3</sup> OYuda yabbaire iteeye wa Preezi n'oZeera,  
era ibo omawaabwe yabbaire Tamali.

OPreezi yabbaire iteeye wa Kazirooni,  
era oKazirooni yabbaire iteeye wa Laamu.

<sup>4</sup> OLaamu yabbaire iteeye w'Aminadabbu,  
Aminadabbu yabbaire iteeye wa Nakusoni,  
era oNakusoni yabbaire iteeye wa Salumooni.

<sup>5</sup> OSalumooni yabbaire iteeye wa Bbowaazi,  
era iye omaaye yabbaire Lakabbu.

OBbowaazi yabbaire iteeye w'Obbedi era iye  
omaaye yabbaire Luusi,  
era Obbedi yabbaire iteeye wa Yese.

<sup>6</sup> OYese yabbaire iteeye wa Dawudi okabaka,  
era oDawudi yabbaire iteeye wa Sulemaani,  
oguyabyaire omu muka Wuliya.

<sup>7</sup> OSulemaani yabbaire iteeye wa Lekobb-  
wamu,  
era oLekobbwamu yabbaire iteeye w'Abbiya,  
era Abbiya yabbaire iteeye w'Asafu.

<sup>8</sup> Asafu yabbaire iteeye wa Yokosofaati,  
oYokosofaati yabbaire iteeye wa Yokolaamu,  
era oYokolaamu yabbaire iteeye wa Wuziya.

<sup>9</sup> OWuziya yabbaire iteeye wa Yosamu,  
oYosamu yabbaire iteeye w'Akazi,  
era Akazi yabbaire iteeye wa Kezeekiya.

<sup>10</sup> OKezeekiya yabbaire iteeye wa Manase,  
oManaase yabbaire iteeye w'Amoni,  
era Amoni yabbaire iteeye wa Yosiya.

<sup>11</sup> OYosiya yabbaire iteeye wa Yekoniya  
n'abagandabe. Abo babbairewo mu biseera

owebatwaliire abantu b'e Isirairi omu bugalama e Bbabbulooni.

<sup>12</sup> Okuzwera nakimo omu biseera ebibatwali-iremum aBaisirairi omu busibe e Bbabbulooni paka oku kubyala oYesu, olulyo lwabwe niirwo lunu luti: OYekoniya yabbaire iteeye wa Seyalutiyeeri, era oSeyalutiyeeri yabbaire iteeye wa Zerubbabbeeri.

<sup>13</sup> OZerubbabbeeri yabbaire iteeye w'Abbiwudi, Abbiwudi yabbaire iteeye w'Eryakimu, era Eryakimu yabbaire iteeye w'Azoli.

<sup>14</sup> Azoli iye yabbaire iteeye wa Zadooki, oZadooki yabbaire iteeye w'Akimu, era Akimu yabbaire iteeye w'Eriyudi.

<sup>15</sup> Eriyudi yabbaire iteeye w'Eryezaali, Eryezaali yabbaire iteeye wa Matani, era oMatani yabbaire iteeye wa Yaakobbo.

<sup>16</sup> OYaakobbo yabbaire iteeye wa Yusufu oibaaye wa Malyamu, oMalyamu eyabbaire omaaye wa Yesu, iye ogubeeta oKurisito ogubasukireku amafuta.

<sup>17</sup> Kale emigigi gyonagyona giri ikumi n'eena, okuzwa okwIbbulaimu okutuuka oku Dawudi. Era tete giri emigigi ikumi n'eena okuzwa oku Dawudi okutuuka oku kutwala aBaisirairi omu bugalama e Bbabbulooni. Era tete n'egindi giri emigigi ikumi n'eena okuzwa oku kubatwala e Bbabbulooni okutuuka oku kubyala oKurisito ogubasukireku amafuta.

*Okubyala oYesu Kurisito  
(Luk 2:1-7)*

18 Atyanu okubyala oYesu Kurisito kwabaire kuti: OMalyamu omaaye wa Yesu yabaire ng'asuubizire oYusufu ati ayaba okumufumbirwa era nga kimanyikaine. Neye ng'akaali okumufumbirwa, ni kitegerekeka ng'ali kida, neye ng'oMwoyo oMutukulye niye eyamwezeserye okukisuna.

19 Neye olw'okubba oYusufu eyabaire ayaba okubba oibaaye, yabaire muntu atuukiriire, era nga tataka okumuswaza omu lwatu, n'aseega kumulekawo mu kyama.

20 Yabaire akaali aseega atyo, omalaika wa Musengwa iye oKibbumba n'amubonekera omu kirooto n'amukoba ati, "Yusufu, omwizukulu wa kabaka oDawudi, tiwaatya okutwala oMalyamu okubba omukaliwo olw'okubba, ekida ekyali nakyo oMwoyo oMutukulye niye eyamwezeserye okukisuna.

21 Era ayaba okubyala omwana mwisuka, era bamuwa eriina bati, Yesu, olw'okubba niye eyalirokola abantu okuzwa omu bikole byabwe ebibbibibi."

22 Era ebyo byonabyona byabbairewo, kaisi olwo oMusengwa iye oKibbumba ekiyatumwire ng'abitira omu naabi kituukiriire, ekikoba kiti:

23 "Muwulisisye! Omwala omuguna yalibba ekida, era yalibyala omwana mwisuka. Era balimuwa eriina bati Manweri," amakulu gaalyo gati, "OKibbumba ali na iswe."

24 Era oYusufu oweyalamukire, n'akola ng'omalaika oyo oweyamulagiire era n'atwala

oMalyamu e ika e wuwe n’abba mukaliwe.

<sup>25</sup> Neye tiyeegaitire naye paka oweyabyaire, era oYusufu n’awa omwana oyo eriina ati, Yesu.

## 2

### *Abageni okuzwa e buzwaisana*

<sup>1</sup> OYesu owebamubyalire omu kibuga e Bbeserekeemu, omwitwale ly’e Buyudaaya, oKerode yabbaire niiye okabaka w’eitwale eryo. Era abasaiza abeetegereza eby’enkota ni bazwera omu kyalo ky’e buzwaisana, ni baaba omu kibuga e Yersaalemi.

<sup>2</sup> Kale eeyo ni babuulya abantu bati, “Omwana ogubabyaire okubba okabaka w’aBayudaaya ali nkonaki? Twaboine onkota alaga ati bamubyaire ng’aizira eenu, kale twizire kusinza mwana oyo nago.”

<sup>3</sup> Awo abantu owebakobeire okabaka oKerode ebintu ebyo, ni yeeraliikirira, era n’abantu abakiraku obungi omu Yersaalemi ni beeraliikirira.

<sup>4</sup> Kale awo oKerode n’akumbaania abakabona abakulu bonabona, n’abakugu omu by’aMateeka ga Musa, kaisi n’ababuulya ati, “OKurisito ogubasukireku amafuta iye babbaire n’okumubyalala yaina?”

<sup>5</sup> Ibo ni bamwiramumu bati, “Balimubyalala mu kibuga e Bbeserekeemu, omwitwale ly’e Buyudaaya. Ekyo kityo olw’okubba onaabbi yakiwandiikire ati:

<sup>6</sup> ‘Inywe abantu b’omu kibuga e Bbeserekeemu eky’omu Buyudaaya,

ekibuga kyanywe tiniikyo ekisembayo  
okubba eky'ekitiisya omu Buyudaaya,  
olw'okubba mwikyo mwalizwamu omufugi,  
iye yakubbemberanga abantu bange ab'e  
Isirairi.' "

<sup>7</sup> Kale awo oKerode n'ayeta abasaiza abo  
abeetegereza eby'enkota, n'ababuulya mu  
kyama ekiseera ekinanyerenyeere onkota  
ekiyabonekeiremu.

<sup>8</sup> Awo n'abatuma e Bbeserekeemu ng'abakoba  
ati, "Mwabe munoonererye nakusani omwana  
oyo, era owemwabba nga mumuboine, mwaira  
ni munkobera e gyali zena ni njaba ni mmus-  
inza."

<sup>9-10</sup> Atyanu owebamalire okuwulira ebibono  
bya kabaka oKerode ni baaba. Awo ni  
bairamu okubona onkota onanyere oyo ogubab-  
baire baboine e buzwaisana. Cooka owe-  
baboine onkota oyo nago ni basangaalira nakimo  
ino. Era onkota oyo yabeekubbembereire paka  
oweyatuukire n'ayemerera e ngulu w'enyumba  
omwana omuyabbaire.

<sup>11</sup> Kale abasaiza abo owebatuukire ni bain-  
gira omu nyumba eyo, era ni babona omwana  
ng'ali n'omaaye oMalyamu, bakomere amazwi  
ni basinza omwana oyo. Awo ni basibindula emi-  
gangi gyabwe, era ni bamutonera ebirabo. Ba-  
mutoneire ezaabbu, n'obubbaani n'ebyakaloosa  
ebibeeta miira.

<sup>12</sup> Neye olw'okubba oKibbumba yabbaire abal-  
abwire omu kirooto ati tibakanga eeri oKerode,  
kale owebabbaire bakanga omu kyalo ky'e  
waabwe babitiire mu nzira gendi.

*Okutwala oYesu n’oMalyamu e Misiri*

<sup>13</sup> Awo abasaiza abeetegereza eby’enkota owebazwire e Bbeserekeemu, omalaika wa Musengwa iye oKibbumba n’abonekera oYusufu omu kirooto, n’amukoba ati, “Osetuke, oyanguweku otwale omwana n’omaaye mwirukire omu kyalo ky’e Misiri. Era mubbe eeyo paka owenalibakoba okuzwayo olw’okubba oKerode ayaba okunoonia omwana okumwita.”

<sup>14</sup> Kale awo oYusufu obwire obwo n’asetuka n’akwata omwana n’omaaye ni baaba e Misiri.

<sup>15</sup> Era ni babba eeyo paka oKerode oweyafiire. Ebyo byabbairewo kaisi oMusengwa iye oKibbumba ekiyatumwire ng’abitira omu naabbi kituukirire, ekikoba kiti: “Nayetere omwana wange okuzwa omu Misiri.”

*Okwita abaana abaisuka e Bbeserekeemu*

<sup>16</sup> Awo oKerode oweyamanyicirye ati abasaiza abeetegereza eby’enkota bamubbeyere-bubbeyi, n’anyiiga ino. Kale n’atuma abaisirikale okwita abaana abaisuka bonabona omu Bbeserekeemu n’omu byalo ebikyeruguuliriirye, abo ababaire ab’emyanka emibiri n’okwika ansi. Ekyo yakikolere ng’asinzirira ku kiseera abasaiza badi nago ekibamukobeire ekibaboneiremu onkota.

<sup>17</sup> Ekyo oKerode ekiyakolere kyatuukiriirye kiikyo oKibbumba ekiyatumwire ng’abitira omu naabbi Yeremiya, ekikoba kiti:

<sup>18</sup> “Abantu bawulira amazingo  
n’okukuukulya okw’amaani omu kibuga e  
Laama.



OLakeeri\* akunga olw'abaaanabe,  
era tataka okumusirica.  
Ekyo kityo olw'okubba abaaanabe abantu baba-  
malirewo.”

### *Okuzwa e Misiri*

<sup>19</sup> Kale oluzwanyuma oKerode oweyafiire, omalaika wa Musengwa iye oKibbumba n'abonekera oYusufu omu kirooto ng'ali e Misiri.

<sup>20</sup> N'akoba oYusufu ati, “Osetuke, okanje omwana n'omaaye, omu kyalo ky'e Isirairi olw'okubba oodi abbaire anoonia omwana okwita afiire.”

<sup>21</sup> Awo oYusufu n'akwata omwana n'omaaye n'abakanja e Isirairi.

<sup>22</sup> Neye oYusufu oweyawuliire ati Alukeraawo niye ogubasikisiryte oiteeye oKerode era niye afuga eitwale ly'e Buyudaaya, awo n'atya okwaba omwitwale eryo. Neye oluzwanyuma oKibbumba oweyamulabwire olundi omu kirooto tete, awo n'ayaba mwitwale ly'e Galiraaya.

<sup>23</sup> Kale ni baaba ni babba batyami b'omu kibuga ekibeeta Naazaleesi. Ekyo kyabbaire kityo kaisi onaabbi ekiyatumwire oku Kurisito kituukirire, ekikoba kiti: “Balimweta ow'e Naazaleesi.”

## 3

### *OYokaana oMubatizi ayebulya enzira (Mak 1:1-8; Luk 3:1-18; Yok 1:19-28)*

---

\* **2:18 2:18** OLakeeri yabbaire moiza oku bakali ba Yaakobbo eyabyaire eigwanga lya Isirairi. **2:18 2:18** Yer 31:15 **2:23 2:23** Mak 1:24; Luk 2:39; Yok 1:45

<sup>1</sup> Omu naku egyo, oYokaana oMubatizi n'ayaba omwidungu ly'e Buyudaaya, era n'alaabba obukwenda bwa Kibbumba eeri abantu.

<sup>2</sup> Obukwendabwe bwabbaire buti, "Mwenenye, olw'okubba obwakabaka bw'omwigulu bwigereire."

<sup>3</sup> OYokaana oyo, niiye onaabbi oIsaaya oguyatumwireku ati:

"Waliwo atumulira omwidungu  
n'eigono eryaminkirira ati,  
'Mutegeke oluguudo lwa Musengwa aiza,  
muteereerye amanzirage.' "

<sup>4</sup> OYokaana oyo, yazwalanga ekizwalo ekibakolere omu byoya bya kisolo ogubeeta ongamira, ng'omu nkende yeesiba musipi gw'eidiba. Era yaalyanga nzige n'omujenene gw'enzoki egy'omu kigona.

<sup>5</sup> Awo abantu ni bazwanga omu kibuga e Yerusaalemi, n'omu byalo by'omu Buyudaaya mwonamwona, n'omu byalo ebyeruguliriirye oMwiga oYoludaani, ni baabanga e giri oYokaana,

<sup>6</sup> ni babbutulanga ebikole byabwe ebibbibbi era n'ababatiziranga omu mwiga oYoludaani.

<sup>7</sup> Neye oYokaana oweyaboine ng'aBafalisaayo n'aBasedukaayo bangi baaba egyali okubabatiza, n'abakoba ati, "Inywe abakabbikabbi ooti mpiri enfulugundu! Naani abalabwire ati eenu niiyo engeri ey'okwiruka obusungu bwa Kibbumba obwaba okwiza?"

<sup>8</sup> Aale atyanu mukole ebikole ebiraga biti dala mwenenyere ebikole byanywe ebibbibbi.

<sup>9</sup> Era timwaseega muti mwezya okuwunuka nga mukoba muti, ‘Kasita iswe tuli baizukulu ba Ibbulaimu,’ olw’okubba mbakobera nti omu mabbaale ganu, oKibbumba ayezya okusuu-ciryamu oIbbulaimu abaizukulu abandi.

<sup>10</sup> Mumanye muti muli ooti misaale, nga n’amambaizi agagitema bamalire okugabiikirya oku kikolo kya buli musaale. Ogwo ogutaneneka ebineneka ebisa baaba kugutema, era bagudyake omu musyo.

<sup>11</sup> Nze mbabatiza na maizi okulaga nti mwenenyere, neye waliwo ankiraku obwezye aali kwiza oluzwanyuma lwange, oguntasaanira naire okusibindula obusibiro bw’engaitogye ni ngitoola omu bigerebye. Iye, yalibabatiza na Mwoyo oMutukulye era na musyo.

<sup>12</sup> Iye ayaba okwabulamu abantu ooti muntu akwata olugali n’asenyenta, empeke n’ebisusungu. Empeke igyo yaligikumbaanirya omu kideerokye, kaisi ibyo ebisusungu n’abyoca n’omusyo ogutalikira.”

*Okubatiza oYesu  
(Mak 1:9-11; Luk 3:21-22)*

<sup>13</sup> Awo oYesu n’azwa omwitwale ly’e Galiraaya, n’ayaba oku mwiga oYoludaani e giri oYokaana okumubatiza.

<sup>14</sup> Neye oYokaana n’agezyaku okuloberya oYesu ng’amukoba ati, “Nze neetaaga niiwe

okumbatiza, tete iwe wena oiza giri ninze nku-batize?”

<sup>15</sup> Neye iye oYesu n’amwiramumu ati, “Oganye kibbe kityo omu kiseera kinu, ikyo kituuce iswe okukola obutuukirirye bwonabwona.” Kale awo oYokaana n’aikirirya okubatiza oYesu.

<sup>16</sup> Amangu ago ng’oYesu bankumubatiza, n’azwa omu maizi, era omu kiseera ekinanyere ekyo eigulu ni lyeigula, oYesu n’abona oMwoyo wa Kibbumba ng’aika ooti njiiwa, era n’ayemerera oku Yesu.

<sup>17</sup> Era eigono ni lizwa omwigulu, nga likoba liti, “Oyo niye oMwana wange omutake era ogunsiima eino.”

## 4

### *Okukema oYesu (Mak 1:12-13; Luk 4:1-13)*

<sup>1</sup> Ebyo owebyawoire, oMwoyo oMutukulye n’atwala oYesu omwidungu oSitaani okumukema.

<sup>2</sup> OYesu oluzwanyuma lw’okumala enaku 40 nga talya omusana n’obwire, awo enzala n’emuluma.

<sup>3</sup> Kale oSitaani iye omukemi n’ayaba eeri oYesu era n’amukoba ati, “Ng’oli Mwana wa Kibbumba, aale olagire amabbaale ganu gasuuke kyokulya.”

<sup>4</sup> OYesu n’amwiramumu ati, “Bakiwandiikire bati: ‘Omuntu tabba mwomi omu bwizulye ng’alya

kyokulya kyonkani, neye yeetaaga nabuli kibono oKibbumba ekyatumula.’ ”

<sup>5</sup> Awo oSitaani n’alungamya oYesu okwaba omu kibuga ekitukulye,\* kaisi n’amuniinisy a oku kisooto ky’eYeekaalu.

<sup>6</sup> Awo n’akoba oYesu ati, “Ng’oli Mwana wa Kibbumba, ojuuke ogwe ansi olw’okubba baki-wandiikire bati:

‘OKibbumba yalagiranga abamalaikabe okukukuuma,  
era balikubbaka omu ngalo gyabwe,  
kaisi nandi ni weekontola ekigerekyo okwibaale.’ ”

<sup>7</sup> OYesu n’airamu ati, “Era bakiwandiikire bati: ‘Tokemanga oMusengwa iye oKibbumbawo.’ ”

<sup>8</sup> Tete oSitaani n’alungamya oYesu okuniina angulu oku lusozi oluwanvu eino, n’amulagisya obwakabaka obw’amawanga gonagona obw’oku kyalo n’ebintu eby’amaani byonabyona ebirimu.

<sup>9</sup> Kaisi awo oSitaani n’amukoba ati, “Atyanu ebyo byonabyona njaba okubikuwa singa oikirirya okunkomera amazwi n’onsinza.”

<sup>10</sup> Awo oYesu n’amukoba ati, “Sitaani! Onzwe omumaiso, bakiwandiikire bati: ‘Osinzenge Musengwa iye oKibbumbawo, era guwaweer-eryanga yenkani.’ ”

<sup>11</sup> Kale oSitaani n’azwawo n’aleka oYesu, era abamalaika ni baiza ni bamulabirira.

*OYesu atandiika okwegesya omu Galiraaya  
(Mak 1:14-15; Luk 4:14-15)*

---

**4:4** **4:4** Ama 8:3 \* **4:5** **4:5** Ekibuga ekitukulye, niikyo oYerusaalemi. **4:6** **4:6** Zab 91:11-12 **4:7** **4:7** Ama 6:16 **4:10** **4:10** Ama 6:13

12 Awo oYesu oweyawuliire ati oYokaana omubatizi bamwigaliire omu mabbuusuu, n'azwa e Yerusaalemi n'akanga omwitwale ly'e Galiraaya.

13 Awo n'azwa omu kabuga k'e Naaza-leesi n'ayaba n'abba mutyami omu kibuga e Kaperenawumu ekiri oku nyanza omu bitundu by'eigwanga lya Zabbulooni n'ebya Nafutaali.

14 Ekyo kyabbairewo kaisi olwo oKibbumba ekiyatumwire ng'abitira omu naabbi oIsaaya kituukirire, ekikoba kiti:

15 "Inywe abantu b'omu bitundu by'e Zabbulooni, n'oNafutaali, ebiri okumpi n'enyanza oGaliraaya oku lubba lw'omwiga oYoludaani, abantu ababba omwitwale ly'e Galiraaya eeyo aBatali Bayudaaya e gibabba.

16 Abantu abali omu ndikiirya baboine ekitangaala eky'amaani.

Era n'abafu omu myoyo, ekitangaala kibaakiire."

17 Okuzwa omu kiseera ekyo, oYesu n'atandiika okulaabba eeri abantu ati, "Mwenenye olw'okubba obwakabaka bw'omwigulu bwigereire."

*OYesu ayeta abazibuli abana*

*(Mak 1:16-20; Luk 5:1-11)*

18 Lumo, oYesu oweyabbaire ng'abita oku mbale kw'enyanza oGaliraaya, n'abona abaganda babiri, oSimooni ogubeeta oPeetero

n'omugandawe Andereya. Babbaire batega akatimba omu nyanza olw'okubba babbaire bazibuli.

<sup>19</sup> Awo oYesu n'abeeta ati, "Mwize mubbe beegi bange! Nalibasuuca bazibuli b'abantu omu kifo kya bazibuli b'enyanyi."

<sup>20</sup> Amangu ago ni baleka aawo obutimba bwabwe, ni baaba naye.

<sup>21</sup> Oweyazwire awo ni yeeyongeraku omumaiso, oYesu n'abona abantu abandi babiri abaganda, oYaakobbo n'oYokaana abataane ba Zebeddaayo. Babbaire bali omu lyato n'oitewaabwe oZebeddaayo nga bakwania obutimba bwabwe, awo oYesu n'abeeta babbe beegibe.

<sup>22</sup> Era amangu ago ni baleka aawo eryato n'oitewaabwe, ni baaba n'oYesu.

### *Okwegesya n'okulamy abalwaire*

*(Luk 6:17-19)*

<sup>23</sup> Awo oYesu n'atambula omwitwale ly'e Galiraaya lyonalyona ng'ayegesya omu makumbaaniro gaabwe, ng'alaabba eeri abantu aMawuliro aMasa ag'obwakabaka bw'omwigulu, era ng'alamya abantu nabuli ndwaire n'obunafu omu mubiri.

<sup>24</sup> Kale amawuliro agamukwataku ni gasalaanira omu kyalo ky'e Siiriya mwonamwona. Era ni bamuleeteranga abalwaire ab'endwaire egitali gimo, n'ababbaire bakaanya obulumi obubitiriri, n'abaliku emizimu, n'ab'empimbu, n'abasanyalaire, bonabona n'abalamyanga.

<sup>25</sup> Awo ebiyindi by'abantu bingi ino okuzwa omu Galiraaya n'omwitwale ly'e Dekapooli, n'omu kibuga e Yerusaalemi, n'omu Buyudaaya, era n'oku lubba lw'e buzwaisana lw'omwiga oYoludaani ni bamusengererya.

## 5

### *OYesu ayegeserya oku lusozi (Luk 6:20-23)*

<sup>1</sup> Awo oYesu oweyaboine ekiyindi ky'abantu kinene nga kiigerera e gyali, n'aniinaniina oku lusozi era n'atyama okwegesya, awo abeegibe ni bakumbaanira e gyali okumuwulisya.

<sup>2</sup> Kaisi n'atandiika okubeegesya ati,

<sup>3</sup> "B'enkabi abadoobi omu bwomi bwabwe obw'omwoyo  
olw'okubba abo obwakabaka bw'omwigulu  
ibwo bwabwe.

<sup>4</sup> B'enkabi abo abakunga,  
olw'okubba oKibbumba yalibasaninkirirya.

<sup>5</sup> B'enkabi abo ab'eiwooyo,  
olw'okubba oKibbumba yalibawa byonaby-  
ona ebiyabasuubizire.

<sup>6</sup> B'enkabi abo abanzalwa n'ab'enyonta okukola  
oKibbumba ebyataka,  
olw'okubba oKibbumba yalibaikutya.

<sup>7</sup> B'enkabi abo abakola eby'ekisa,  
olw'okubba oKibbumba yalibakwatira ekisa.

<sup>8</sup> B'enkabi abo abaseega ku biiby'oKibbumba  
ebyasiima byonkani,  
olw'okubba ibo balibona oKibbumba.



<sup>9</sup> B'enkabi abo ababbeera abantu okusyania,  
olw'okubba abo oKibbumba yalibeeta baan-  
abe.

<sup>10</sup> B'enkabi abo abantu abebayiigaania  
olw'okukola oKibbumba ebyataka,  
olw'okubba abo obwakabaka bw'omwigulu  
ibwo bwabwe.”

<sup>11</sup> Awo oYesu ni yeeyongera ati, “Muli b'enkabi  
singa abantu owebabazumanga, era owebabayi-  
igaanianga, era owebabatumulangaku ebib-  
bibibbi olw'okubba muli beegi bange.

<sup>12</sup> Kale ebyo owebibbangawo mujaagaanenge  
era musangaalenge ino, olw'okubba oKibbumba  
yalibawa empeera ey'amaani omwigulu. Kyal-  
ibba kityo nakimo ng'oKibbumba oweyawaire  
abanaabbi empeera abo ababbairewo nga in-  
ywe mukaali okubbaawo, ibo abazeiza baanywe  
abebayiigaanirye.”

*Omuunyū n'ekitangaala*  
(Mak 9:50; Luk 14:34-35)

<sup>13</sup> Awo oYesu ni yeeyongera okukoba abeegibe  
ati, “Inywe oku kyalo kunu mugasa abantu ooti  
muunyū omugaanike owegugasa omu byokulya.  
Neye singa gusuuka mujaalaali, bagwiryamu  
batya ensa? Gubba tigukaali gugasa omu kintu  
kyonakyona, okutoolaku okugudyaka-obudyaki  
eedi abantu ni bagwemyagira eeyo.

<sup>14</sup> “Niinywe ekitangaala eky'oku kyalo  
abantu ekibatakaya okubona. Kityo

nakimo ng'owebatakaya okubona ekibuga ekibombekere oku lusozi.

<sup>15</sup> Era abantu tibakwatisya eitaala kaisi ni balifuunikaku ekiibo, wazira balyanika ku kikondo, ni limolekera nabuli muntu abba omu nyumba.

<sup>16</sup> Kale omu ngeri enanyere eyo, ekitangaala kyanywe kyakenge kityo omu bantu, kaisi babone ebikole byanywe ebisa, era olw'ebyo bawuujanga oltewaanywe aali omwigulu.”

### *AMateeka*

<sup>17</sup> Awo oYesu ni yeeyongera ati, “Muleke okuseega muti naizire oku kyalo kuvunawo Mateeka ga Musa waire Biwandiike by'abanaabbi. Nze tinaizire kubivunawo, wazira naizire kaisi ibyo bituukirire.

<sup>18</sup> Mbakobera amazima, eigulu n'ekyalo nga bikaali biriwo, waire akasale akatyayi eino ak'oku kanyukuta akamo oku Mateeka ga Musa tikaligotaku paka byonabyona ebyo ebiri n'okutuukirira nga bituukiriire.

<sup>19</sup> Kale atyanu nabuli avunaku erimo oku Mateeka, waire liiryo erisembayo obutono, era n'okwegesya n'ayegesya abantu okukola batyo, oyo oKibbumba yalimutwala okubba tiwamugaso omu bwakabaka bw'omwigulu. Neye oyo akwata aMateeka ago era n'ayegesya n'abandi okugakwata, oyo oKibbumba yalimutwala okubba w'omugaso ino omu bwakabaka bw'omwigulu.

20 N’olwekyo mbakobera nti singa obutuukirirye bwanywe tibwakirengeku obwo obw’aBafalisaayo n’abakugu omu by’aMateeka ga Musa timwalingira omu bwakabaka bw’omwigulu.”

*OYesu ayegesya oku busungu  
(Luk 12:57-59)*

21 Tete oYesu ni yeeyongera ati, “Mumaite muti oKibbumba yakobere abazeiza baanywe ati, ‘Tiwaitanga omuntu; eyaitanga omuntu balimusingisya omusango.’

22 Neye nze mbakoba nti nabuli muntu asunguwalira omuntu omwinaye,\* balimusingisya omusango. Era nabuli muntu yenayena azuma omwinaye ati, ‘Obula omugaso’ balimutwala okumuwozesya omu Lukiiko oLufugi olw’aBayudaaya. Neye nabuli oyo eyazumanga omwinaye ati ‘Oli musirusiru,’ oKibbumba yalimusindika omu geyeena.

23 “Kale atyanu owoobbanga otwaire ekirabokyo oku kyoto, kaisi ni weebukirirya yeeyo omwinawo oguwanyiizire, 24 kisa oleke awo ekirabokyo omumaiso g’ekyoto. Osooke oyabe osyanie naye, kaisi okange oweeyo ekirabokyo.”

25 Awo oYesu ni yeeyongera tete ati, “Omuntu yenayena owakuwaabiranga, osyanie naye mangu nga mukaali muli naye mu nzira nga mwaba omu kooti. Owootakola otyo, akuwaabiire yalikuwaayo e w’omulamuzi, era

---

5:21 5:21 Kuz 20:13; Ama 5:17 \* 5:22 5:22 EBiwandiike ebimo eby’eira byongeraku biti, *Anambula nsonga*.

n'omulamuzi n'akuwaayo eeri omwisirikale, era n'omwisirikale n'akuteeka omu mabbuusu.

<sup>26</sup> Era nkukobera amazima nti, owewalituuka omwo, tiwalizwamu paka owewalisasula empiya gyonagyona egy'omugaito.”

### *AMateeka agagaana obulendi*

<sup>27</sup> Awo oYesu ni yeeyongera okwegesya ati, “Mumaite muti oKibbumba yakobere ati, ‘Tiwayendanga.’

<sup>28</sup> Neye nze mbakoba nti nabuli alingirira omukali olw'okwegomba okwegaita naye, oyo abba abbengere ogw'obulendi omu biseegobye.

<sup>29</sup> Abba ng'eriisolyo ery'oku ngalo endiiri ni-iryo erikuzweraku okukola ekikole ekibbikibbi, olyokolemu era olimume eedi. Kikiraku iwe okufiirwa ekimo oku bitundu by'omubirigwo, okukiraku omubirigwo gwonagwona oKibbumba okugusindika omu geyeena.

<sup>30</sup> Era singa engaloyo endiiri niyo ekuzweraku okukola ekikole ekibbikibbi, ogitemeku era ogimume eedi. Kikugasa iwe okufiirwa ekimo oku bitundu by'omubirigwo, okukiraku omubirigwo gwonagwona oKibbumba okugusindika omu geyeena.”

### *Okwawukana omu bufumbo*

*(Mat 19:9; Mak 10:11-12; Luk 16:18)*

<sup>31</sup> Era tete oYesu ni yeeyongera okwegesya ati, “Bakiwandiikire omu Mateeka bati, ‘Nabuli muntu abbinga omukaliwe, amuwenge ekiwandiiko ekikakasa kiti amubbingire.’

<sup>32</sup> Neye nze mbakoba nti nabuli abbinga omukaliwe, azweraku omukali oyo okubba mulendi okutoolaku ng’amubbingire lwa bulendi. Era omusaiza yenayena atwala omukali oyo ogubabbingire, abba abbengere ogw’obulendi.”

*OYesu ayegesya oku kulayira*

<sup>33</sup> Awo tete oYesu ni yeeyongera okwegesya ati, “Tete mumaite muti oKibbumba eira yakobere abazeiza baanywe ati, ‘Tolayiranga ebyobubbeyi, neye ebyosuubiza oMusengwa iye oKibbumba omu kirayiro, obituukiriryenge.’

<sup>34</sup> Neye nze mbakoba nti, tolayiranga kadi katyayi kati, waire okulayira ng’oijuluza eigulu, olw’okubba niiyo entebe ya Kibbumba.

<sup>35</sup> Waire okulayira ng’oijuluza ekyalo kinu, olw’okubba ekyalo niikyo omukonkolo oKibbumba ogwawuumuliryaku ebigerebye. Waire okulayira ng’oijuluza eriina ly’ekibuga oYerusaalemi, olw’okubba niikyo ekibuga oKibbumba iye okabaka omukulu ekyafuga.

<sup>36</sup> Era tolayiranga waire ng’owaayo omutwegwo, olw’okubba iwe toyezya okucusa erangi y’oluziiri olumo okubba lweru ooba lwirugazu.

---

**5:31 5:31** Ama 24:1-4; Mat 19:7; Mak 10:4      **5:32 5:32** Mat 19:9; Mak 10:11-12; Luk 16:18; 1Ko 7:10-11      **5:33 5:33** Lee 19:12; Kub 30:2; Ama 23:21      **5:34 5:34** Yak 5:12; Isa 66:1; Mat 23:22      **5:35 5:35** Isa 66:1; Zab 48:2

<sup>37</sup> Wazira mukobenge muti, ‘Niikyo’ nga mutegeeza muti ‘niikyo,’ ooba muti, ‘bbe’ nga mutegeeza muti, ‘bbe.’ Ebindi byonabyona ebimwongerangaku byabbanga bizwire wa Mubimubbi oSitaani.”

*OYesu ayegesya oku kunyaana*  
(Luk 6:29-30)

<sup>38</sup> Era awo oYesu ni yeeyongera okwegesya ati, “Mwawuliire eiteeka erikoba liti, ‘Eyatoolangamu omwinaye eriiso yena bamutoolangamu liiso. Era n’eyabbongolangamu omwinaye eriino yena bamubbongolangamu liino.’”

<sup>39</sup> Neye nze mbakoba nti, Timwanyaananga, wazira omuntu owakukubanga okwitama ery’oku ngalo endiuro, omucuusiranga n’erindi lidi lyona n’akubba.

<sup>40</sup> “Era omuntu yenayena owaatakanga okuwozya na iwe atwale esaatiyo omulekeranga n’ekizibaawokyo kyona.

<sup>41</sup> Era omuntu yenayena owakukakanga okutambula naye ekiromita emoiza n’ekitundu, otambulanga naye ekiromita isatu.

<sup>42</sup> Kaisi omuntu owakusabanga ekintu omuwanga, era omuntu owaatakanga iwe okumukoopa ekintu, omukoopanga.”

*OYesu ayegesya oku kutaka abalabe*  
(Luk 6:27-28,32-36)

<sup>43</sup> Awo oYesu ni yeeyongera okwegesya ati, “Mwawuliire eiteeka erikoba liti: ‘Otakege

omuntu omwinawo, era ocaawenge omulabewo.’

<sup>44</sup> Neye nze mbakoba nti, mutakenge abalabe baanywe, era musabirenge abo ababayiigaania.

<sup>45</sup> Era owemwakolanga mutyo mwabbanga mulagire muti muli baana ba Itewaanywe aali omwigulu. Ekyo kityo olw’okubba ayakisya eisana eeri abakola ebisa n’abakola ebibibibbi, era atonyesya oikendi eeri abatuukirirye n’abatali batuukirirye.

<sup>46</sup> Aale singa mutaka baabo ababataka bonkani, mubba musuubira oKibbumba kubawa mpeera etya? Ibo abasooloji b’omusolo inywe abemweta muti bakola ebibbibibbi bona kaisi tibataka baabo ababataka?

<sup>47</sup> Era singa mubba mulonsyaku n’aboluganda baanywe bonkani, mubba mpaawo kimukolere okukiraku badi ibo abandi. Era n’abantu aBatali Bayudaaya bona tibakola batyo?

<sup>48</sup> “Kale atyanu inywe mubbenge batuukirirye, oItewaanywe aali omwigulu ng’obwali mutuukirirye.”

## 6

### *Okugabira abadoobi*

<sup>1</sup> Awo oYesu ni yeeyongera ati, “Mwegendereze okutakolanga ebikole byanywe ebyobutuukirirye omu lwatu kaisi abantu bababone. Singa mukola mutyo, oItewaanywe oKibbumba aali omwigulu tiyalibawa empeera.

<sup>2</sup> Kale owemugabiranga abadoobi, timwewuu-janga ooti bananfunsi owebakola omu makumbaaniro n'omu nguudo, kaisi abantu babawe ekitiisya. Mbakobera amazima nti, empeera yaabwe ey'okusuna ekitiisya omu bantu babba bagisunire mu bwizulye.

<sup>3</sup> Neye iwe owoogabiranga abadoobi, toki-manyikisyanga omuntu ogondi yenayena,

<sup>4</sup> olw'okugabakwo okubba kw'ekyama. Olwo kaisi oIteewo oKibbumba abona ebikole by'omu kyama yalikuwa empeera.”

*Engeri y'okusaba oKibbumba  
(Luk 11:2-4)*

<sup>5</sup> Awo era oYesu ni yeeyongera ati, “Era owemubbanga musaba oKibbumba, timwab-banga ooti bananfunsi, olw'okubba ibo bataka okusaba nga beemereire omu makumbaaniro n'omu mansanganzira g'enguudo, kaisi abantu bababone. Mbakobera amazima nti empeera yaabwe ey'okusuna ekitiisya omu bantu babba bagisunire mu bwizulye.

<sup>6</sup> Neye owekubba kusaba, oingirenge omu kisengekyo, n'oigalawo olwigi, kaisi n'osaba oIteewo oKibbumba iye ataboneka. Era oIteewo oyo abona ebikole by'omu kyama yalikuwa empeera.

<sup>7</sup> “Era owemubbanga musaba, timwakolesyanga ebibono ebingi ebinambulamu makulu ooti bantu abataikiririrya omu Kibbumba owebakola. Ekyo kityo olw'okubba



baseega bati abakibbumba baabwe babawulira lw'ebibono byabwe ebingi.

<sup>8</sup> Kale inywe timwasabanga ooti niibo, olw'okubba oItewaanywe amaite ebimwetaaga, nga mukaali n'okumusaba.

<sup>9</sup> “Kale atyanu mumusabenge muti,  
Itewaiswe aali omwigulu, eriinalyo baliwe ekitiisya,

<sup>10</sup> obwakabakabwo bwize.  
Ebyotaka babikole oku kyalo  
ng'owebabikola omwigulu.

<sup>11</sup> Otuwe nabuli lunaku ekyokulya ekitwetaaga.

<sup>12</sup> Era otusoniye ebibbibbi byaiswe,  
nga swena owetusoniya  
abatukola ebitulumya.

<sup>13</sup> Era tiwatuleka okugwa omu bikemo,  
wazira otulamye eeri omubhimubbi.  
[Ibwo obwakabaka, n'obwezye n'ekitiisya bibyo  
emirembe n'emirembe. Amiina].<sup>\*</sup>

<sup>14</sup> “Singa musoniya abantu ababakola ebibalumirirya, oItewaanywe aali omwigulu nywena abasoniya.

<sup>15</sup> Neye singa timubasoniya, oItewaanywe yena tabasoniya ebikole byanywe ebibbibbi.”

### *Okusiiba*

<sup>16</sup> Awo era oYesu ni yeeyongera ati, “Era owe-musiibanga, timwabbanga bayungubali omumaiso ooti bananfunsi owebabba, olw'okubba ibo bayungubala kaisi abantu bababone bati

---

\* **6:13 6:13** EBiwandiike ebimo eby'eira bibulamu ebibono ebiri omu [ ] **6:15 6:14-15** Mak 11:25-26

basiiba. Mbakobera amazima nti babba bamalire okusuna empeera yaabwe omu bwizulye ey'okusuna ekitiisya omu bantu.

<sup>17</sup> Neye inywe owekubba kusiiba, musanyuluzenge enziiri gyanywe, ni munaaba n'omumaiso.

<sup>18</sup> Mukolenge mutyo kaisi abantu nandi ni bayezya okumanya bati musiiba, okutoolaku oItewaanywe iye ataboneka. Era oItewaanywe iye abona omu kyama, inywe yalibawa empeera.”

### *Obusuni omwigulu*

*(Luk 12:33-34)*

<sup>19</sup> Awo oYesu ni yeeyongera okutumula n'abeegibe ati, “Timwebisiranga obusuni oku kyalo kunu ebiwuuka n'okutalaga okubyezya okububebenyera, era abaibbi e gibayezya okuvuna ni babwibba.

<sup>20</sup> Neye mwebisirenge obusuni mwigulu, ebiwuuka n'okutalaga e gibatayezya okububebenyera, era abaibbi e gibatayezya okuvuna ni babwibba.

<sup>21</sup> Ekyo kityo olw'okubba obusunibwo e gibubba, n'omwoyogwo gwona niiyo e gibubba.”

### *Ekitangaala ky'omubiri*

*(Luk 11:34-36)*

<sup>22</sup> Awo oYesu ni yeeyongera ati, “Era amaiso gali ooti itaala ly'omubiri. Kale singa amaisogo gabba moomi, omubirigwo gwonagwona gwizula ekitangaala.

<sup>23</sup> Neye amaisogo singa tigabba moomi, omu-birigwo gwonagwona gwizula ndikiirya. Kale singa ekitangaala mwiwe kibba ndikiirya, leero endikiirya eyo ebba yenkana etya!”

*Okwesiga oKibbumba  
(Luk 16:13; 12:22-31)*

<sup>24</sup> Awo oYesu ni yeeyongera okwegesya ati, “Mpaawo muweererya ayezya okuweererya abasengwa ababiri. Kiri kiti, ali n’okulaga okutaka kunene eeri omoiza okukiraku eeri ogondi, ooba yalyesibira oku moiza, n’atala ogondi. Kale tikyezeka okubba n’oKibbumba aamo n’empiiya byombi nga basengwabo.

<sup>25</sup> “Kagira mbakoba nti timweraliikiriranga omu bwomi bwanywe olw’ekyokulya ooba ekyokunywa newankubbaire olw’ekyokuzwala. Ekyo kityo olw’okubba obwomi ibwo bw’ebbeeyi okukiraku ekyokulya. Era n’omubiri gwona gw’ebbeeyi okukiraku ebyokuzwala.

<sup>26</sup> Aale mubone enyonyi, igyo tigusiga, waire kukungula tigikungula, era tigibba kadi n’ekideero. Neye oltewaanywe aali omwigulu agiwa ekyokulya. Olwo inywe timuli bamugaso ino okukiraku enyonyi?

<sup>27</sup> Era naani kwinywe oweyeeraliikirira, ayezya okwongeraku waire ekiseera ekityai kiti oku kuwangaalakwe?

<sup>28</sup> “Era lwaki mweraliikirira olw’ebizwalo? Aale kaade mubonere oku ngeri ebimuli egibikulamu. Cooka ibyo tibikola waire kwetungira bizwalo.

<sup>29</sup> Neye mbakobera nti n'ewankubbaire ok-abaka oSulemaani omu kitiisyakye kyonakya-ona, tiyazwaireku okuboneka nakusani oku-tuukiryaku ng'ebimuli owebibba.

<sup>30</sup> Neye obanga oKibbumba azwalisya naku-sani atyo ebimuli ibyo ebibbaawo atyanu eizo ni babyoca, tiyalikiraku ino okubazwalisya inywe abaliku n'okwikirirya okutono?

<sup>31</sup> "Kale timweraliikiriranga nga mukoba muti, 'Twalya niki?' ooba muti, 'Twanywa niki?' ooba muti, 'Twazwala niki?'

<sup>32</sup> Ekyo kityo olw'okubba ibyo ebyo byon-abyona abantu abataikirirya omu Kibbumba niibyo ebibeemaliramu, neye inywe iye olte-waanywe ow'omwigulu amaite ati ebyo byon-abyona mubyetaaga.

<sup>33</sup> Neye ekikira nakimo, mwemalirenge mu kunoonia bwakabaka bwa Kibbumba era n'ebyataka mukole, kaisi era musune byonabyona ebyo ebimwetaaga.

<sup>34</sup> Kale timweraliikiriranga olw'ebyabbaawo eizo. Eizo lwabba n'ebyokweraliikirira ebyalwo. Nabuli lunaku lubbaaku ebyokweraliikirira ebyalwo."

## 7

### *Okusalira abantu emisango*

*(Luk 6:37-38,41-42)*

<sup>1</sup> Awo oYesu ni yeeyongera okwegesya abeeg-ibe ati, "Timusaliranga abantu emisango, kaisi nywena oKibbumba tiyabasalira.

<sup>2</sup> Ekyyo kityo olw'okubba, ng'owemusallira abandi emisango, nywena webalibasallira. Era ekipimo ekimukolesya omu kusalira abandi emisango, niikyo ekinanyere ekyyo ekibalikolesya okubasalira nywena emisango.

<sup>3</sup> Kale lwaki ofaayo oku kasubi akali oku liiso ly'omugandawo, kaisi nandi n'ofaayo oku gusubi oguli oku liisolyo?

<sup>4</sup> Oyezya otya okukoba omugandawo oti, 'Oleke nkutooleku akasubi oku liisolyo,' kaisi ng'oku liryo kuliku ogusubi?

<sup>5</sup> Munanfunsi iwe, osooke kutoola gusubi oguli oku liryo, olwo kaisi oyezye okubona nakusani okutoola akasubi akali oku liiso ly'omugandawo."

<sup>6</sup> Era oYesu n'akoba ati, "Ekibono kya Kib-bumba tiweegumyanga okukyegesya abantu abakinyooma era abatataka okuwulisisya. Ekyyo kityo olw'okubba kiri ooti kukwata kintu ekikutulye n'okiwa embwa kaisi igyo ni gigaaluka gikuluma-bulumi. Era kiri ooti kukwata mab-baalogo ag'ebbeeyi n'ogamumira embiizi kaisi igyo ni gigaalutyanka-bufutyanki."

*Okusaba, n'okunoonia, n'okukonkona  
(Luk 11:9-13)*

<sup>7</sup> Awo oYesu ni yeeyongerera ati, "Musabenge, era balibawa; Munoonienge, era mwalibona; Mukonkonenge oku lwigi, era balibaigulirawo.

<sup>8</sup> Ekyyo kityo olw'okubba nabuli asaba asuna, era oyo anoonia abona, n'oyo akonkona oku lwigi bamwigulirawo.

<sup>9</sup> Era naani kwinywe awa omwanawe eibbaale ng'amusabire kyokulya,

<sup>10</sup> ooba amuwa ompiri omukifo kya nyanyi ogwabba amusabire?

<sup>11</sup> Kale obanga inywe abakola ebibbibbi mu-maite okuwa abaana baanywe ebirabo ebisa, kaisi oItewaanywe ow'omwigulu tiyalikiraku ino okuwa ebirabo ebisa abo ababimusaba?"

<sup>12</sup> Era n'akoba ati, "Kale atyanu byonabyona ebimutaka abandi babakolere inywe, aale nywena mubibakolere. Ekyo niikyo aMateeka n'enjegesya y'abanaabbi ekibikoba omu bumpi."

### *Omulyango omudiini*

*(Luk 13:24)*

<sup>13</sup> Awo oYesu ni yeeyongera ati, "Mwingirire mu mulyango omudiini, olw'okubba omulyango ogwingira omu kujigirika igwo mugalami, n'enzira eyabayo ngalami, era bangi abagibitamu.

<sup>14</sup> Neye omulyango ogwingira omu bwomi igwo mudiini, era n'enzira eyabayo ndiini, era abagibona batono."

### *Omusaale n'ebineneka byagwo*

*(Luk 6:43-44)*

<sup>15</sup> Era oYesu ni yeeyongera ati, "Mweku-ume abanaabbi ab'obubbeyi. Baiza egimuli ng'oku ngulu baboneka ooti tibakabbikabbi ooti ntaama, neye ng'omunda bali ooti misege egiiza okunyaga.

<sup>16</sup> Mwalibategeerera ku bikole byabwe. Abantu banokola ebineneka by'emizabbibbu

oku mukamirya, ooba banokola ebineneka by'emitini oku namuswata?"

<sup>17</sup> Era n'akoba ati, "N'omu ngeri enanyere eyo, omusaale omusa guneneka bineneka ebisa, neye omusaale omubbimubbi guneneka bineneka ebibbibbi.

<sup>18</sup> Omusaale omusa tigeneneka ebineneka ebibbibbi, n'omusaale omubbimubbi tigeneneka ebineneka ebisa.

<sup>19</sup> Nabuli musaale ogutaneneka ebineneka ebisa bagutema, ni bagudyaka omu musyo.

<sup>20</sup> "Kale atyanu, mwalibategeerera ku bikole byabwe."

*Timbamaite*  
(Luk 13:25-27)

<sup>21</sup> Awo oYesu ni yeeyongera ati, "Tibuli muntu anjeta ati, 'Musengwa, Musengwa,' nti yalingira omu bwakabaka bw'omwigulu, okutoolaku oyo iye akola oBbaabba aali omwigulu ebyataka.

<sup>22</sup> Oku lunaku olw'enkomerero, bangi balinkoba bati, 'Musengwa, Musengwa, titwalaabbanga omu liinalyo? Titwabbinganga emizimu oku bantu nga tukolesya eriinalyo? Era titwakolanga ebyewunyo bingi omu liinalyo?'

<sup>23</sup> Neye nze nalibakoba lwatu nti, 'Inywe timbamaite. Muzwe n'egyendi inywe abakola ebibbibbi.' "

*Abombeki ababiri*  
(Luk 6:47-49)

<sup>24</sup> Awo oYesu n'amaliirirya okwegesya abeegibe ati, "Kale atyanu nabuli muntu awulira ebibono byange ebyo, era n'abikoreraku, abba ooti musaiza ow'amalabuki, eyayombekere enyumbaye okwibbaale.

<sup>25</sup> Oikendi yatoonyere, omukula ni gubanda enyumba eyo, n'ompunga n'agifuwa, neye nandi n'egwa olw'okubba bagyombekere ng'omusingi guli kwibbaale.

<sup>26</sup> "Neye nabuli muntu awulira ebibono byange ebyo, nandi n'abikoleraku, abba ooti musaiza omusirusiru eyayombekere enyumbaye oku musenye.

<sup>27</sup> Oikendi yatoonyere, omukula ni gubanda enyumba eyo, n'ompunga n'agifuwa, era n'egwa, n'eweera okwitakali."

### *Obwezye bwa Yesu*

<sup>28</sup> Kale awo oYesu oweyamalire okutumula ebyo, ekiziima ky'abantu ni kyewunya ino engeri egyayegesyamu,

<sup>29</sup> olw'okubba yayegesyanga ng'onanyere obwezye, neye nga tali ooti bakugu baabwe ab'aMateeka.

## 8

### *OYesu alamyā omugenge (Mak 1:40-45; Luk 5:12-16)*

<sup>1</sup> Awo oYesu owezazwire oku lusozi, oguyindi gw'abantu ni gumusengererya.



<sup>2</sup> Era omugenge\* n'ayaba e giri oYesu, n'amukomera amazwi ng'amukoba ati, "Musengwa, mmaite nti oyezya okundamya, owoobba ng'otakire."

<sup>3</sup> OYesu n'agolola engalo n'amukwataku, n'amukoba ati, "Ntaka, era olame!" Amangu ago ebigenge ni bimuwaaku.

<sup>4</sup> Awo oYesu n'amukoba ati, "Ekyo, tokikoberaku omuntu kadi moiza wazira oyabe weeyanjule e wa kabona, era ng'oMusa oweyalagiire, oweeyo n'ekyokuwaayo, kaisi bakakase bati olamire."

*Okwikirirya kw'omwisirikale oMulooma  
(Luk 7:1-10)*

<sup>5</sup> OYesu oweyaingiire omu kibuga e Kaperenawumu, oMulooma omukulu w'ekibinja ky'abaisirikale 100, n'ayaba e giyabbaire, n'asaba obubbeeri

<sup>6</sup> ng'akoba ati, "Musengwa, omuweererya wange mulwaire ali e ika oku buliri, asanyalaire omubiri era ali omu bulumi bubitiriri."

<sup>7</sup> OYesu n'amukoba ati, "Naizayo ni mmulama."

<sup>8</sup> Neye oMulooma oyo n'airamu ati, "Musengwa, tintuukana iwe okwingira omu nyumba yange, wazira otumule-butumuli kibono, era omugalama wange yalama.

<sup>9</sup> Ekyo kityo olw'okubba nze zena ndi muntu aali n'abasengwa bange abantwala, era ng'owendi n'abaisirikale abentwala. Owenkoba

---

\* **8:2 8:2** *Ebigenge* bulwaire obwasuucanga omuntu okubba timulongoole okusinzirira oku mateeka g'eKiyudaaya. **8:4 8:4** Lee 14:1-32

onu nti ‘Oyabe,’ era ayaba; n’ogondi nti, ‘Oize,’ era aiza; n’omugalama wange nti, ‘Okole kinu,’ era akikola.”

<sup>10</sup> Awo oYesu oweyawuliire ebyo, ni yeewunya, n’akoba ababbaire bamusengererya ati, “Mbakohera amazima nti, tinjajiryangaku omuntu yenayena omwIsirairi ali n’okwikirirya okw’amaani ooti kuukwo!

<sup>11</sup> Era mbakohera nti bangi balizwa e njuyi n’e njuyi, era ni batyama oku mbaga n’oIbbulaimu, n’oIsaka, n’oYaakobbo omu bwakabaka bw’omwigulu.

<sup>12</sup> Neye abo abandibubbairemu, balibabbingira e nza omu ndikiirya, e walibba okukunga n’okunjiya amaino.”

<sup>13</sup> Awo oYesu n’akoba oMulooma nago ati, “Oyabe, era kibbe kityo ng’owoikirirya.” Era omugalamawe n’alama omu kaseera ako.

*OYesu alamyā abalwaire bangi  
(Mak 1:29-34; Luk 4:38-41)*

<sup>14</sup> Awo oYesu oweyaingiire omu nyumba ya Peetero, n’abona omaaye wa muka Peetero ng’ali aawo omusuuja gumuluma ino.

<sup>15</sup> OYesu n’amukwata oku ngalo, omusuuja ni gulama, era omukali oyo n’asetukirawo, era n’atandiika n’okumwinula.

<sup>16</sup> Awo akanaigulo, ni baleetera oYesu abantu bangi ababbaireku emizimu, n’agibabbingaku ng’agikaawuukira, era bonabona ababbaire balwaire, n’abalamyā.

17 Ekyo kyabbaire kityo, kaisi onaabbi oIsaaya ekiyatumwire kituukirire, ekikoba kiti:  
 “Iye onanyere yatwaire obunafu bwaiswe,  
 era ni yeetiika endwaire gyaiswe.”

*Ekyofirwa ng’oli mwegi wa Yesu*  
*(Luk 9:57-62)*

18 OYesu oweyaboine ng’ekiziima ky’abantu kinweruguulirirye, n’alagira abeegibe okwambuka naye okwaba oku lubba ludi olw’enyanza.

19 Awo omoiza oku bakugu omu by’aMateeka ga Musa n’aiza e giri oYesu, n’amukoba ati, “Musomesya, natambulanga na iwe e giwaabiranga wonawona.”

20 Neye oYesu n’amukoba ati, “Amakibbwe igo gali n’ebiina e gigabba, n’enyonyi gyona giri n’ebisaasiriro. Neye oMwana wa Muntu iye adambaku kadi n’ajaica olubba.”

21 Omusaiza ogondi, omoiza oku beegibe, n’amukoba ati, “Musengwa, naliiza nga mmalire okuliika obbaabba.”

22 Neye oYesu n’amukoba ati, “Oize obbe mwegi wange, era oleke abo abali n’obwomi obw’omwoyo obufu baliike abafu baabwe.”

*OYesu asirica ogumpunga*  
*(Mak 4:35-41; Luk 8:22-25)*

23 Awo oYesu n’aniina omu lyato, era abeegibe bona ni baaba naye.

24 Ogumpunga ogw’amaani ni gutandiika oku-fuwa oku nyanza, amayengo ni geesuka omu

lyato ni libbuuca kwizula amaizi. Neye oYesu iye yabbaire agonere.

<sup>25</sup> Abeegibe ni baigerera e giyabbaire, era ni bamulamuca ni bamukoba bati, “Musengwa, otulamyeye, tufa!”

<sup>26</sup> OYesu n’abakoba ati, “Lwaki mutiire? Nga muli n’okwikirirya kutono!” Awo n’asetuka, n’akaawuukira ogumpunga n’amayengo, era enyanza n’eteekera nakimo nakusani!

<sup>27</sup> Bonabona ni beewunya, ni bakoba bati, “Onu muntu w’engeriki? Obona n’ogumpunga n’amayengo bimuwulira!”

*OYesu alamyala abasaiza babiri ab’emizimu  
(Mak 5:1-20; Luk 8:26-39)*

<sup>28</sup> Awo oYesu oweyatuuukire oku lubba ludi olw’enyanza, omu kitundu ky’aBagaderiini,<sup>†</sup> abantu babiri ababbaireku emizimu, ni bamusangaana nga bazwa omu magombe ag’empuku. Abasaiza abo babbaire bakambwe ino, nga mpaawo muntu ayezya okubitayo e gibabbaire.

<sup>29</sup> Amangu ago ni bakooka nga bakoba bati, “Otuvunaanira niki iwe oMwana wa Kibbumba? Oizire aanu okutugadya ng’ekiseera kyaiswe kikaali okutuuka?”

<sup>30</sup> Wabbairero ekiraalo kinene eky’embiizi nga giriisya era nga yalaku okuzwa e gibabbaire.

<sup>31</sup> Kale emizimu egyo ni gyegairira oYesu giti, “Singa kibba kiti kutubbinga ku bantu banu, otusindike mu kiraalo ky’embiizi gidi.”

---

<sup>†</sup> **8:28 8:28** *Bagaderiini*, eBiwandiike ebimo biti, Bagerigeseene, n’ebindi biti Bagaraasi, n’ebindi biti Bageraasa.

<sup>32</sup> OYesu n’agikoba ati, “Aale mwabe.” Kale ni gibazwaku, ni gingira omu mbiizi nago. Era eki-raalo ekyo kyonakyona ni kitantawuka okuzwa e ngulu oku muringi, ni kiyoolookera omu nyanza, era gyonagyona ni gifeera omu maizi.

<sup>33</sup> Era abaliisya baagyo ni bairuka, ni baaba omu kibuga, ni balonsya byonabyona ebyab-bairewo, n’okukiraku eino ebikwata ku badi ababbaireku emizimu.

<sup>34</sup> Awo abantu bangi ino ni bazwa omu kibuga okwaba okusangaana oYesu. Era owe-bamuboine, ni bamwegairira abazwere omu kitundu kyabwe.

## 9

### *OYesu alamyā omulwaire eyasanyalaire (Mak 2:1-12; Luk 5:17-26)*

<sup>1</sup> Awo oYesu n’aniina omu lyato, n’ayambuka enyanza n’akanga omu kibuga ky’e Kapere-nawumu e giyaabbanga.

<sup>2</sup> Era awo abantu abamo ni bamuleetera omusaiza asanyalaire, ng’alambaire oku mu-keeka. OYesu oweyaboine okwikirirya kwabwe, n’akoba asanyalaire ati, “Mwana wange, ogume omwoyo, nkusonyire ebikolebyo ebibbibibi.”

<sup>3</sup> Awo abamo oku bakugu omu by’aMateeka ga Musa ni baweweetanganira bati, “Omusaiza onu atumula omu ngeri ezumirira oKibbumba.”

<sup>4</sup> OYesu oweyategeire ebiseego byabwe, n’akoba ati, “Lwaki museega okubbikubbi omu myoyo gyanywe?”

<sup>5</sup> Ekikiraku owangu niikyo ekiriina, kukoba nti, ‘Nkusonyire ebikolebyo ebibbibbi,’ ooba kukoba asanyalaire nti, ‘Osetuke era otambule?’

<sup>6</sup> Aale atyanu oleke mbalage nti oMwana wa Muntu ali n’obwezye okusoniya ebikole ebibbibbi oku kyalo kunu.” Era awo n’akoba asanyalaire ati, “Osetuke, weetiike omukeek-agwo, era okange e ika.”

<sup>7</sup> Era n’asetuka, n’akanga e wuwe.

<sup>8</sup> Ekiziima ky’abantu owekyaboine ekyo, ni kitya, ni kiwuuja oKibumba eyawaire abantu obwezye obwenkana awo.

*OYesu ayeta oMatayo*

*(Mak 2:13-17; Luk 5:27-32)*

<sup>9</sup> Awo oYesu oweyazwire omu kifo ekyo, n’abona omusaiza ogubeeta oMatayo, ng’atyaimo omu yaafeesi ya musolo. N’amukoba ati, “Oize obbe mwegi wange.” Era oMatayo yena n’asetukiramu, n’ayaba naye.

<sup>10</sup> Oluzwanyuma, oYesu oweyabbaire omu nyumba ya Matayo ng’atyaimo okulya, abasolooji ba musolo bangi n’abakola ebikole ebibbibbi ni baiza, ni batyama okulya aamo n’oYesu n’abeegibe.

<sup>11</sup> ABafalisaayo owebaboine ekyo, ni babu-ulya abeegi ba Yesu bati, “Lwaki oMusomesya waanywe aliira aamo n’abasolooji ba musolo n’abantu abakola ebibbibbi?”

<sup>12</sup> Neye oYesu oweyawuliire ekyo, n’akoba ati, “Aboomi tibeetaaga omusawo, wazira abalwaire.

13 Neye mwabe era mwetegerenze amakulu g'eKiwandiike kinu ekiti: 'Eby'ekisa niibyo ebin-taka, neye tisadaaka.' Ekyo kityo olw'okubba abatuukirirye tiniibo abenaizire okweta be-nenye, wazira abakola ebibbibbi."

*OYesu bamubuulya oku kusiiba  
(Mak 2:18-22; Luk 5:33-39)*

14 Awo abeegi ba Yokaana ni baaba e giri oYesu, ni bamubuulya bati, "Lwaki iswe, n'aBafalisaayo tusiiba emirundi mingi, neye abeegibo ni batasi-iba?"

15 OYesu n'abairamu ati, "Abageni abeete oku mbaga y'obugole tibayezya okubba n'enima ng'omugole omusaiza akaali ali nabo. Neye ekiseera kyalituuka ni babatoolaku omugole oyo, kaisi olwo ni basiiba.

16 "Omuntu takubbira omu kizwalo ekikaire ekiraaka ekiyaaka ekibakaali okwozakuumu, olw'okubba owekyereega kyezya okukanula ek-izwalo, kaisi ekituli ni kyeyongerera okugalama.

17 Era enviinyo empyo, tibagisuka mu bi-sawo byagyo eby'amadiba amakaire. Singa ekyo bakikola, gibyata, ni gisusuka era envi-inyo egyo n'ebisawo n'obifiirwa. Neye en-viinyo empyo, bagisuka mu bisawo byagyo eby'amadiba amayaaka, era batyo webabiku-uma."

*Omwala wa Yairo n'omukali omulwaire  
(Mak 5:21-43; Luk 8:40-56)*

18 OYesu yabbaire akaali abakoba ebyo, omoiza oku bakulu omu kitundu ekyo n'aiza n'akomera

oYesu amazwi, n’akoba ati, “Omwala wange yankafa, neye oize omukwateku, airiwe.”

<sup>19</sup> Awo oYesu n’asetuka, n’ayaba naye, aamo n’abeegibe.

<sup>20</sup> Omu kaseera akanyere ako omukali eyabaire alwaire ekikulukuto ky’omusaaye okumala emyanka eikumi na mibiri, n’ayaba e nyuma wa Yesu, n’amukwata oku mugo gw’ekizwalokye

<sup>21</sup> ng’akoba omu mwoyogwe ati, “Kadi singa ni mmukwataku-bukwati oku kizwalokye kyonkani, mmaite nti nalama.”

<sup>22</sup> OYesu n’agaluka n’alola e nyuma n’amubona era n’amukoba ati, “Mwala wange, ogume omwoyo, olamire olw’okwikiriryakwo.” Era omukali n’alamirawo omu kaseera ako.

<sup>23</sup> OYesu oweyatuukire ew’omukulu w’eikumbaaniro, n’abona abafuwa emirere n’ekiziima ky’abantu nga kikunga,

<sup>24</sup> n’akoba ati, “Muzwewo. Omwala tafiire, wazira agonere-bugoni.” Neye ni bamusekerera.

<sup>25</sup> Neye owebamalire okubulucaamu ekiziima ky’abantu, oYesu n’aingira omu nyumba, n’amusetula ng’amukwaite oku ngalo era omwala n’ayemerera.

<sup>26</sup> Amawuliro ago ni gasalaanira omu kitundu ekyo kyonakyoona.

### *OYesu alamyamba aboofu ababiri*

<sup>27</sup> Awo oYesu oweyazwire eeyo, aboofu babiri ni bamusengererya nga bamwaminkirira bati, “Mwizukulu wa Dawudi, otukwatire ekisa!”

<sup>28</sup> OYesu oweyatuukire omu nyumba, aboofu abo ni baaba e gyalu, n’ababuulya ati,



“Mwikirirya muti mpezya okubalamya?” Awo ni bamwiramu bati, “Niikyo ekyo, Musengwa!”

<sup>29</sup> Awo n’akwata oku maiso gaabwe, n’akoba ati, “Aale kibbe kityo ng’owemwikirirya.”

<sup>30</sup> Era amaiso gaabwe ni galama. OYesu n’abasisiitira ati, “Timwakoberaku omuntu kadi moiza!”

<sup>31</sup> Neye ibo ni bawuluka, ni basalaania omu kitundu ekyo kyonakyoona amawuliro agafa oku Yesu.

### *OYesu alamy obubbu*

<sup>32</sup> Awo abasaiza badi ababiri owebabbaire bawuluka omu nyumba, abantu ni baleetera oYesu omusaiza aliku omuzimu era obubbu.

<sup>33</sup> OYesu oweyamubbingireku omuzimu, omusaiza nago n’atandiika okutumula. Abantu ni beewunya, ni bakoba bati, “Titubonangaku ekiti omwIsirairi!”

<sup>34</sup> Neye aBafalisaayo ni bakoba bati, “Abbinga emizimu ng’akolesya bwezye bwa mukulu waagyoy.”

### *OYesu akwatira abantu ekisa*

<sup>35</sup> OYesu n’atambula omu bibuga n’omu byalo byonabyona omu Galiraaya, ng’ayegesya omu makumbaaniro gaabwe, ng’alaabba eeri abantu aMawuliro aMasa ag’obwakabaka, era ng’abalamy buli ndwaire.

<sup>36</sup> Oweyaboine ebiziima by’abantu, n’abakwatira ekisa olw’okubba babbaire

beeraliikiriire era nga badamba obubbeeri nga bali ooti ntaama eginambulaku muliisya.

<sup>37</sup> Kaisi n’akoba abeegibe ati, “Ebyokukungula bingi, neye abatambi niibo abatono.

<sup>38</sup> Kale musabe onanyere akola oku byokukungula, ayongere okusindika abatambi abandi omu musirigwe.”

## 10

*OYesu alonda abatume eikumi na babiri  
(Mak 3:13-19; Luk 6:12-16)*

<sup>1</sup> Awo oYesu n’ayeta abeegibe eikumi na babiri, ni baaba e gyali, n’abawa obwezye okubbinganga emizimu oku bantu, n’okulamyanga abantu nabuli ndwaire n’obunafu.

<sup>2</sup> Era abeegi abeyasuucirye abatume eikumi na babiri niibo banu: Asooka, niiye oSimooni oguyatumire erya Peetero, n’Andereya omugandawe; n’oYaakobbo n’omugandawe oYokaana abataane ba Zebedaayo.

<sup>3</sup> N’oFiripo, n’oBbantulumaayo, n’oTomasi, n’oMatayo omusolooji wa musolo, n’oYaakobbo omutaane w’Alufaayo, n’oSadaayo,

<sup>4</sup> n’oSimooni oMulwaniriri w’okwefuga okw’eigwangalye, n’oYuda Isikalyoti eyaliiremu oYesu olukwe.

*OYesu atuma eikumi na babiri  
(Mak 6:7-13; Luk 9:1-6)*

<sup>5</sup> Awo oYesu n’atuma abatume eikumi na babiri abo ng’abasisiitira ati, “Timwaba

eeri aBatali Bayudaaya, waire omu bibuga eby'aBasamaaliya.

<sup>6</sup> Neye mwabe eeri bantu b'e Isirairi abali ooti ntaama egyagotere.

<sup>7</sup> Mwabe mulaabbe e gibali muti, 'Obwakabaka bw'omwigulu bwigereire.'

<sup>8</sup> Era mwabe mulamye abalwaire, n'okuzuukiza, n'okulamya abagenge, era mubbinge n'emizimu oku bantu. Obwezye obw'okukola ebyo mubusunire bwereere, nywena mubukolesyenge bwereere.

<sup>9</sup> Timwaba kadi n'empiiya gyonagyona omu migoba gyanywe.

<sup>10</sup> Era timwaba waire n'ekisawo. Nabuli muntu tiyaaba kadi n'ekizwalo kyokubiri waire ngaito, waire omukoomero, olw'okubba omutambi awoomera okumuwa ebiyeetaaga."

<sup>11</sup> Awo oYesu ni yeeyongera ati, "Nabuli kibuga ooba nabuli kyalo ekimwaingirangamu, mwanoonereryanga omuntu abasangaalira, era muzwerenge w'oyo paka owemwalizwayo.

<sup>12</sup> Owemwaingiranga omu kisito ekyo, mukobenge abantu baamu muti, 'Eidembe libbe na inywe.'

<sup>13</sup> Era singa abantu baamu babasangaaliranga, eidembe erimubatakiryanya lyasigalanga nabo. Neye singa tibabasangaalirenge, eidembe erimubatakiryanya lyabairiranga niinywe.

<sup>14</sup> Era singa abantu b'omu kisito kyonakyaona ooba omu kibuga bagaananga okubasangaalira ooba okuwulira ebibono byanywe, muk-

izwengemu. Era owemwabbanga mukizwamu, mwekunkumulyengeku n'enkungu egyabbanga gibakwaite oku bigere byanywe.

<sup>15</sup> Mbakobera amazima nti, oku lunaku olw'okusaliraku emisango, abantu b'omu kibuga ky'e Sodoma n'e Gomola balibasalira eki-bonerezo ekiri gwai gwai okukiraku ekyo ekibaliwa abantu abo abagaananga okubasan-gaalira."

*Okuluga n'ebigosi n'okubayiigaania  
(Mak 13:9-13; Luk 21:12-17)*

<sup>16</sup> Awo oYesu ni yeeyongera era n'abalabula ati, "Aale muwulisiseye, mbatuma nga muli ooti ntaama egibasindikire aakati omu misege, ibyo ebisolo ebya kabenje. N'olwekyo mubbe balabukirabuki okwekuuma ooti mpiri, era mubbe b'eiwooyo ooti njiwa.

<sup>17</sup> Aale mukimanye muti abantu balibakwata ni babawaayo omu mbuga gy'amateeka, era ni babafaamuulira omu makumbaaniro gaabwe.

<sup>18</sup> Era okulwange balibatwala omumaiso g'abafugi n'ag'abakabaka. Ekyo kyalibayezesya inywe okubatuucaaku ibo n'oku Batali Bayudaaya obukwenda bwange.

<sup>19</sup> Era owebabakwatanga, timweraliikiriranga ekimwatumula n'engeri ey'okukitumulamu. Omu kaseera ako mwasunanga ekyokutumula.

<sup>20</sup> Ekyo kityo olw'okubba tiniinywe omwab-banga mutumula, neye oMwoyo wa Kibbumba

oTewaanywe niye eyaabbanga atumula okubitira mwinywe.”

<sup>21</sup> Era oYesu ni yeeyongera ati, “Omuntu yaliwaayo omugandawe okumwita, n’omusaiza omubyaire yaliwaayo omwanawe. Era abaana balyediima ni bawaayo ababyaire baabwe okubaita.

<sup>22</sup> Era nywena abantu bonabona balibacaawa olw’okubba muli basengereri bange. Neye oyo eyaligumira ebigosi ebyo paka oku nkomerero, yalirokoka.

<sup>23</sup> Kale atyanu abantu owebabayiigaanianga omu kibuga ekimo, mwairukiranga omu kindi. Mbakobera amazima nti timwaliwoisya ebibuga by’omwIsirairi ng’oMwana wa Muntu akaali okwira.”

<sup>24</sup> Awo oYesu ni yeeyongera ati, “Ogubeegesya takiraku amwegesya, era n’omuweererya takiraku omusengwawe.

<sup>25</sup> Iye ogubeegesya tali n’okwewunya singa bamubitya ooti yoodi amwegesya, n’omuweererya yena atyo singa bamubitya ooti musengwawe. Obanga onyere ekisito bamwetere Bberuzebbuli, kaisi leero ab’omu kisitokye ibo babba tibabeete ekikiraku ekyo obubbibubbi!”

*Ebibono byokulabula n’okwiryamu amaani  
(Luk 12:2-7)*

---

**10:20 10:17-20** Mak 13:9-11; Luk 12:11-12; 21:12-15      **10:21**  
**10:21** Mak 13:12; Luk 21:16      **10:22 10:22** Mat 24:9,13; Mak 13:13;  
 Luk 21:17      **10:24 10:24** Luk 6:40; Yok 13:16; 15:20      **10:25 10:25**  
 Mat 9:34; 12:24; Mak 3:22; Luk 11:15

<sup>26</sup> Awo oYesu ni yeeyongera okwegesya ati, “Kale timutyanga abantu abo abababitya okub-bikubbi. Ekyo kityo olw’okubba nabuli kintu ekikukuulirirye balikitoolayo, era nabuli kintu ekiri omu kyama kyalimanyikana.

<sup>27</sup> Ebintu ebimbakobera inywe omu mbiso, mubikoberenge abantu mulwatu, era n’ebintu ebimbaweweetera inywe mubikookerenge ngulu.

<sup>28</sup> Era timutyanga abo abaita mubiri gwonkani, neye nga tibayezya okwita omwoyo. Wazira mutyenge Kibbumba iye ali n’obwezye okuji-girica byonabyona, omwoyogwo n’omubirigwo omu geyeena.

<sup>29</sup> Obunyonyi obubiri bwa laisi ino, neye mpaawo kadi kamo kwibwo akagwa ansi ni kafa okutoolaku oItewaanywe nga niye atakire atyo.

<sup>30</sup> Era n’ainywe nywena oItewaanywe amaite n’obungi bw’enziiri gy’okumitwe gyanywe.

<sup>31</sup> Kale timwatyanga olw’okubba inywe muli b’ebbeeyi okukiraku omududu gw’obunyonyi.”

*Okubbutula n’okwegaana oYesu  
(Luk 12:8-9)*

<sup>32</sup> Tete oYesu n’akoba ati, “Nabuli ambutula omumaiso g’abantu, zena nalimubbutula omu-maiso ga Bbaabba aali omwigulu.

<sup>33</sup> Neye nabuli anegaanira omumaiso g’abantu, zena nalimwegaanira omumaiso ga Bbaabba aali omwigulu.”

*Tiidembe neye ntalo*  
(Luk 12:51-53; 14:26-27)

<sup>34</sup> Awo era oYesu ni yeeyongera okubakoba ati, “Timwaseega muti naizire kuleeta idembe oku kyalo. Tinaizire kuleeta idembe, wazira naizire kuleeta ntalo.

<sup>35</sup> Ekyo kityo olw’okubba naizire okwawukanisya, ‘omwana n’oiteeye, omwala n’omaaye, omulya n’odaaniwe.

<sup>36</sup> Era abalabe b’omuntu baabbanga b’omu nyumbaye.’ ”

<sup>37</sup> Era ni yeeyongera ati, “Nabuli oyo ataka oiteeye ooba omaaye okukiraku owantaka, tasaanira okubba mwegi wange. Era nabuli oyo ataka omutaanewe ooba omwalawe okukiraku owantaka, yena tasaanira okubba mwegi wange.

<sup>38</sup> Era nabuli oyo etiyeetiika omusalabbagwe gw’okugada olw’obwakabaka bwa Kibbumba era n’ansengererya, oyo tasaanira okubba mwegi wange.

<sup>39</sup> Kale nabuli agezyaku okulamy obwomibwe okululwe, yalibufirwa, neye nabuli afiirwa obwomibwe okulwange, yalibulamya.”

*Okusuna empeera*  
(Mak 9:41)

<sup>40</sup> Awo oYesu n’akoba abeegibe ati, “Nabuli abasangaalira inywe abba asangaaliire ninze,

---

**10:36 10:35-36** Mik 7:6    **10:38 10:38** Mat 16:24; Mak 8:34; Luk 9:23    **10:39 10:39** Mat 16:25; Mak 8:35; Luk 9:24; 17:33; Yok 12:25

era ansangaalira, abba asangaaliire Kibbumba eyantumire.

<sup>41</sup> N’olwekyo nabuli asangaalira onaabbi olw’okubba mukwenda wa Kibbumba, yalisuna empeera ng’eya naabbi. Era nabuli asangaalira omuntu atuukiriire olw’okubba muntu atuukiriire, yalisuna empeera ng’ey’oyo.

<sup>42</sup> Era nabuli muntu awa omoiza oku basengereri bange banu abebanyooma, kadi amaizi ag’okunywa amawolu olw’okubba mwegi wange, mbakobera amazima nti anambula kubuusabuusa yalisuna empeeraye.”

## 11

### *OYesu n’oYokaana oMubatizi (Luk 7:18-35)*

<sup>1</sup> Awo, oYesu oweyamalire okwegesya abeegibe eikumi na babiri, n’azwa omu kifo ekyo, n’ayaba okwegesya n’okulaabba eeri abantu ab’omu bibuga by’omu Galiraaya.

<sup>2</sup> Atyanu oYokaana oMubatizi oweyabbaire omu mabbusu n’awulira ebintu oKurisito ebyakola, kale n’atuma abeegibe okwaba

<sup>3</sup> okubuulya oYesu bati, “Niiwe oKibbumba oguyasuubizire okutuma okwiza okununula abantu, ooba tukuumirire gondi?”

<sup>4</sup> Awo oYesu n’abairamu ati, “Mukange era mumukobere ebimuwuliire n’ebimuboine.

<sup>5</sup> Ababbaire aboofu babona, ababbaire abaleme batambula, abagenge balama, ababbaire abamasiipe bawulira, abafu



bazuukira, n'abadoobi bona basuna enkabi gy'okuwulira aMawuliro aMasa.

<sup>6</sup> W'enkabi omuntu oyo atambuusabuusamu."

<sup>7</sup> Abakwenda ba Yokaana owebabbaire nga bazwawo, oYesu n'atandiika okubuulya ekiziima ky'abantu ebikwata oku Yokaana ati, "Owemwabire e giri oYokaana omwidungu, mwasuubiire kubona muntu afaanana atya? Mwamwajiirye ng'omuntu omugondi ooti lugada olutengeeta nabuli ompunga owaafuwa?

<sup>8</sup> Ooba nga tikiikyo, mwasuubiire kubona muntu afaanana atya? Muntu azwaire ebizwalo ebyebbeeyi? Kadi tiyabbaire atyo, olw'okubba abazwala ebizwalo ebyebbeeyi babba mu bisito by'abakabaka.

<sup>9</sup> Aale kale mwabire okubona oYokaana olw'okubba yabbaire naabbi? Ekinanyereny-eere nabakobera n'okubakobera nti yabbaire akiraku okubba naabbi.

<sup>10</sup> OYokaana oyo, niiye eBiwandiike ogubitu-mulaku biti:

'Aale obone, ntuma omukwenda wange

akwekubbembere, okukwewulirya enzira egyoyaba.' "

<sup>11</sup> Era ni yeeyongera ati, "Mbakobera amazima nti, kasookeede abantu babba oku kyalo kunu mpaawo muntu akira oYokaana ekitiisya. Neye Iye oKibbumba abala oyo amusemberya omu bwomibwe, waire nga niiye abantu ogubanyooma omu bwakabaka bw'omwigulu, okubba akira oYokaana oyo ekitiisya ekyalimu.

<sup>12</sup> Era okuzwa omu kiseera oYokaana oMubatizi oweyatandiikiire okulaabba paka atyanu, obwakabaka bw'omwigulu babulwanisya n'amaani, era abantu baazy a n'amaani okubwingiramu.

<sup>13</sup> Ekyo kityo olw'okubba abanaabbi bonabona n'aMateeka ga Musa balagwire oku bwakabaka bw'omwigulu paka oYokaana oweyatandiikiire okulaabba.

<sup>14</sup> Era owoobbanga otaka okwikirirya ekyo, oYokaana niiye onaabbi oguyatumwireku oweyakobere ati, 'Eyaliiza ali ooti Eriya.'

<sup>15</sup> Aale omuntu aliku amatwi agawulira, awulisise era ategeere ekintumula."

<sup>16</sup> OYesu n'ayongera okukoba ababbaire bamuwulisisya ati, "Abantu ab'omulembe gunu n'abagerya ku kintuki? Bafaanana ooti baana abatobato, abazeenya omuzeenyo omu kisaawe abantu okubabona. Batyo nga beezulugumira abanaabwe bati:

<sup>17</sup> 'Twabafuwiire emirere omu wembo obusa, neye nandi mubina;

kale ni twemba enyembo gy'enima neye nandi mukunga.'

<sup>18</sup> "Ekyo kityo olw'okubba oYokaana oMubatizi yabbaire talya ebyokulya ebya bulijo waire kunywa nviinyo, mwakobere muti, 'Aliku omuzimu!'

<sup>19</sup> Tete zena oMwana wa Muntu ndya ebyokulya era nnywa enviinyo era munkoba muti, 'Omuntu oyo wa gukobbo, era muteemeere, kaisi mukaagwa w'abasolooji ba musolo n'abakola

ebibbibibi.’ Neye abantu abo bonabona abakolera oku malabuki ga Kibbumba, bakakasa bati matuuce.”

*Okulabula abantu olw’okuteenya  
(Luk 10:13-15)*

<sup>20</sup> Awo oYesu n’atandiika okunnya abantu b’omu bibuga ebiyakoleiremu ebyewunyo ebikira obungi, olw’okubba abo tibeenyere.

<sup>21</sup> Awo n’akoba ati, “Wobe! Ala inywe abantu ab’omu kibuga eky’e Kolaziini n’eky’e Bbesu-saida nga mulabire! Kiri kityo olw’okubba ebyewunyo ebibakolere mwinywe singa babbaire babikolere mu kibuga eky’e Tiiro n’eky’e Sidoni, abantu baayo nga beenenyere era ni beesiba n’ebibenga, n’okwepuuda eikoke okulaga bati beenenyere.

<sup>22</sup> Neye mbakobera nti oku lunaku olw’okusaliraku emisango, abantu b’omu Tiiro n’omu Sidoni balisuna ekibonerezo ekiri gwai gwai oku kyanywe.

<sup>23</sup> Kaisi olwo inywe abantu b’e Kaperenawumu, niinywe abebaligulumalya okutuuka omwigulu? Ala kadi, era oKibbumba ayaba kubasindika mu geyeena. Ekyo kityo olw’okubba ebyewunyo eira ebibakolere mwinywe, singa babbaire babikolere mu kibuga e Sodoma, ekibuga ekyo kyandibbaire kikaali kiriwo paka n’atyanu.

<sup>24</sup> Neye mbakobera nti oku lunaku olw’okusaliraku emisango, abantu b’omu

Sodoma balisuna ekibonerezo ekiri gwai gwai oku kyanywe.”

*Mwize egyendi era musune ekiwuumulo  
(Luk 10:21-22)*

<sup>25</sup> Awo omu kiseera ekyo oYesu n’akoba ati, “Nkuwuuja, Bbaabba, iwe oMusengwa afuga eigulu n’ekyalo, olw’okubba amazima ganu wagabisire abalabuki n’abategeera, kaisi n’ogamanyikisya bantu ababula ekibamaite ooti baana abatobato.

<sup>26</sup> Niikyo ekyo Bbaabba olw’okubba okwo kwabbaire kutakakwo.”

<sup>27</sup> Awo n’akoba abantu ati, “OBbaabba yampaire obwezye oku bintu byonabyona. Era nze ng’oMwana mpaawo ammaite okutoolaku oBbaabba. Era mpaawo amaite oBbaabba okutoolaku nze oMwana, n’omuntu oyo iye ogumba nnondere nti amanye oBbaabba.”

<sup>28</sup> Kale oYesu ni yeeyongera okukoba abantu ati, “Mwize egyendi nywenanywena abali n’ebibakaluubirira, nze nabawa ekiwuumulo.

<sup>29</sup> Inywe abananyere mugondere enjegasya yange,\* era mwegere ku ninze, olw’okubba ndi w’eiwooyo era ndi muwombeeki. Era mwasuna ekiwuumulo ky’emyoyo gyanywe.

<sup>30</sup> Ekyo kityo olw’okubba engeri eginabekubbemberamu iyo nyangu, n’ebiragiro byange tibigosi.”

---

**11:24 11:24** Mat 10:15; Luk 10:12      **11:27 11:27** Yok 3:35;  
1:18; 10:15      \* **11:29 11:29** EBbaibbuli egimo gikoba giti, *Inywe abanyere mwetiike ekijooko kyange.*      **11:29 11:29** Yer 6:16

# 12

## *Musengwa w'eSaabbaato* (Mak 2:23-28; Luk 6:1-5)

<sup>1</sup> Awo owewabitirewo akaseera katono, oku Saabbaato oYesu n'abeegibe owebabbaire babita omu kasinde akabbaire omu musiri gw'engaano, abeegibe enzala yabbaire ebaluma era ni bawu-lulaku ebigala by'engaano era ni balya empeke gyamu.

<sup>2</sup> Neye aBafalisaayo abamo owebababoine nga bakola ekyo, ni bakoba oYesu bati, "Aale obone abeegibo batambire, ekintu aMateeka ga Musa ekigagaana oku Saabbaato!"

<sup>3</sup> Awo oYesu n'abairamu ati, "Inywe timu-somangaku omu Biwandiike kwekyo okabaka oDawudi n'abeyabbaire nabo ekibakolere enzala oweyabalumire?"

<sup>4</sup> ODawudi yaingiire omu nyumba ya Kib-bumba, era iye n'abeyabbaire nabo ni balyaku emigaati egibabbaire bawongere eeri oKib-bumba, aate ng'aMateeka ga Musa gabbaire tigaikirirya abantu abandi okulyaku emigaati egyo, okutoolaku abakabona bonkani.

<sup>5</sup> Ooba timusomangaku omu Mateeka ga Musa nti oku Saabbaato, abakabona omu kukola emir-imo gyabwe omu Yeekaalu bavuna eiteeka cooka nandi ni babbaaku omusango?

<sup>6</sup> Neye mbakoba nti akiraku eYeekaalu ekiti-isyali aanu.

<sup>7</sup> Era singa mumaite amakulu g'eKiwandiike kinu ekikoba kiti, 'Eby'ekisa niibyo ebintaka, neye tisadaaka,' timwandinenyere bantu ababulaku omusango.

<sup>8</sup> Ekyo kityo olw'okubba oMwana wa Muntu ali n'obwezye okusalawo abantu ekibasaaniire okukola oku Saabbaato."

*OYesu alamyia omuntu oku Saabbaato  
(Mak 3:1-6; Luk 6:6-11)*

<sup>9</sup> Awo oYesu n'azwa omu kifo ekyo, n'ayaba omwikumbaaniro,

<sup>10</sup> era oomwo mwabbairemu omuntu ow'engalo eyanyolere. Era omunyere omwo mwabbairemu aBafalisaayo ababbaire banoonianga ensonga y'okuzweraku okuwaabira oYesu. Kale ni babuulya oYesu bati, "Amateeka gaiswe gaikirirya okulamyia omuntu oku Saabbaato?"

<sup>11</sup> OYesu n'abairamu ati, "Singa omoiza kwinywe abba n'ontaamawe, kaisi n'agwa omu kiina oku Saabbaato, tamukwata n'amutoolamu?"

<sup>12</sup> Atyanu olwo omuntu tiwamugaso ino okukiraku ontaama! N'olwekyo baikirirya okukolera omuntu ekintu ekisa oku Saabbaato."

<sup>13</sup> Awo n'akoba omuntu oyo ow'engalo eyanyolere ati, "Waama iswe ogolole engaloyo." Kale n'agigolola, era n'eramirawo era n'ebba nakimo nsa ooti yeedi gendi.

<sup>14</sup> Neye aBafalisaayo ibo ni bawulukamu era ni bateesa engeri egibayezya okujigiricamu oYesu.

*Omuweererya omulonde owa Kibbumba*

15 Awo oYesu oweyategeire olukwe lw'aBafalisaayo olw'okumwita, n'azwa omu kifo ekyo. Era oweyazwirewo, ekiyindi ky'abantu kinene ni kimusengererya, era n'alamya abalwaire baabwe bonabona ababbareyo

16 neye n'abagaana okumubbutula.

17 Ekyo kyabbaire kityo olw'okutuukirirya ekibono kya Kibbumba onaabbi Isaaya ekiyatumwire ekikoba kiti:

18 "Onu niye ogunnondere okubba omuweererya wange,

omutake era ogunsiima eino.

Nalimwicaaku oMwoyo wange,

era yalikobera abantu aBatali Bayudaaya ng'owenalibalamula nga tineekubbira.

19 Tiyaliyomba n'abantu waire kwakana ng'aceera,

era tiyalitumula n'eigono eryasyamika ng'ayegeserya oku nguudo.

20 Oyo yalibba w'eiwooyo era w'ekisa eeri abo abadamba obubbeeri n'abanafu,

paka oweyaliramula emisango nga tiyeekubbira.

21 Era aBatali Bayudaaya baliteeka eisuubi lyabwe mu niye."

*OYesu n'oBberuzebbuli*

*(Mak 3:20-30; Luk 11:14-23)*

22 Awo ni baleetera oYesu omusaiza aliku omuzimu nga mwofu era bbubbu. Era oYesu n'amulamya, n'atandiika okutumula n'okubona.

<sup>23</sup> Era abantu bonabona ababbairewo ni beewunya olw'ekyo oYesu ekiyabbaire akolere, era ni babuulya bati, "Omusaiza onu ayezya okubba niye oKurisito oMwizukulu wa kabaka oDawudi?"

<sup>24</sup> Neye aBafalisaayo owebawuliire ebyo, ni bairamu bati, "Omusaiza onu abbinga emizimu ng'akolesya bwezye bwa Bberuzebbuli omukulu waagyoye."

<sup>25</sup> Neye iye oYesu oweyamanyicirye ebiseego byabwe, n'abakoba ati, "Abantu ab'obwakabaka obumo owebeesalamu, obwakabaka bwabwe obwo bujigirika. Era n'abantu ab'omu kibuga ekimo waire kisito owebeesalamu, ekibuga ooba ekisito ekyo kisansukana."

<sup>26</sup> Kale singa oSitaani abbinga emizimu ekitegeeza kiti abba yeerwanisya. Olwo owekibba kityo obwakabakabwe bubbaawo butya?

<sup>27</sup> Aale obanga nze mbinga emizimu nga nkolesya bwezye bwa Bberuzebbuli, kaisi abasengereri baanywe ibo babba bagibbinga nga bakolesya bwezye bwani? Kagira ibo balibasalira inywe omusango olw'okubba ibo bamaite bati bagibbinga lwa bwezye bwa Kibbumba.

<sup>28</sup> Neye owekibba kiti mbinga emizimu oku bantu nga nkolesya bwezye bwa Mwoyo wa Kibbumba, aale obwakabaka bwa Kibbumba bubba atyanu bubabbutukiiremu."

<sup>29</sup> Awo ni yeeyongera ati, "Mpaawo ayezya okwingira omu nyumba y'omuntu ow'amaani



n’anyaga ebintubye, okutoolaku ng’asookere kumusiba, olwo kaisi n’ayezya okunyaga eby’omu nyumbaye.”

<sup>30</sup> Era ni yeeyongera ati, “Kale iye oyo atabba oku lubba lwange, abba mulabe wange, era iye atambeera okusolooja, asalaanica.

<sup>31</sup> N’olwekyo mbakobera nti, kyezeka okusoniya abantu ebibbibibi byabwe byonabyona, n’okubasoniya olw’ebibono ebizumirira omu ngeri yonayona. Neye nabuli azuma oMwoyo oMweru, tibalimusoniya.

<sup>32</sup> Era nabuli atumula okubbikubbi oku Mwana wa Muntu, bayezya okumusoniya; neye oyo iye azuma oMwoyo oMutukulye, tibalimusoniya waire mu mulembe gunu ooba mu mulembe ogwaliiza.”

*Omusaale n’ebineneka byagwo*

*(Luk 6:43-45)*

<sup>33</sup> Awo oYesu ni yeeyongera ati, “Omusaale omusa, guneneka bineneka ebisa, n’omusaale omubbimubbi, guneneka ebineneka bibbibibi. Ekyo kityo olw’okubba omusaale bagutegeerera ku bineneka byagwo.

<sup>34</sup> Inywe muli bakabbikabbi ooti mpiri enfulugundu! Mwezya mutya okutumula ebintu ebisa nga muli bantu abakola ebibbibibi? Ekyo kityo olw’okubba ebintu ebiizula omu mwoyo gwa muntu, omunwagwe niiby ebigitumula.

<sup>35</sup> Omuntu omusa, atoola ku bisa ebiri omu mwoyogwe okukola ebisa, n’omuntu akola

ebikole ebibbibbi, atoola ku bibbibbi ebiri omu mwoyogwe okukola ebibbibbi.”

<sup>36</sup> Era ni yeeyongera ati, “Neye mbakobera nti oku lunaku lw’okusaliraku emisango, abantu balibba n’okwewozyaku omumaiso ga Kibbumba olwa nabuli kibono ekitagasa ekibatumula.

<sup>37</sup> Ekyo kityo olw’okubba oku bibono byanywe oKibbumba kuyalizwera okubasingisya omusango ooba okubatoolaku omusango.”

*Abafalisaayo basaba oYesu akamanyiciryo  
(Mak 8:11-12; Luk 11:29-32)*

<sup>38</sup> Awo abamo oku Bafalisaayo n’abakugu omu by’aMateeka ga Musa ni bakoba oYesu bati, “Musomesya, tutaka otukolerewo akamanyiciryo akalaga kati obwezyebwo buzwa eeri Kibbumba.”

<sup>39</sup> OYesu n’abairamu ati, “Abantu b’omulembe gunu ibo abakola ebibbibbi era abazwazwa oku Kibbumba ibo basaba akamanyiciryo, neye mpaawo akenjaba okubawa okutoolaku ako akabakoleire onaabbi Yona.

<sup>40</sup> Ekyo kityo olw’okubba ng’oYona oweyabaire omu kida ky’ogunyanyi enaku eisatu embeereri, n’oMwana wa Muntu yena waayaba okubba omwitakali enaku eisatu.”

<sup>41</sup> Awo oYesu ni yeeyongera ati, “Abantu b’e Nineeve balisetuka ng’oKibbumba asalira abantu b’omulembe gunu omusango. Era ni babalimiriza omusango okubasinga olw’okubba ibo beenenyere ng’oYona alaabbire egibali ekibono

kya Kibbumba, neye obone oyo akiraku oYona ekitiisya ali aanu.”

<sup>42</sup> Era oYesu ni yeeyongera ati, “Okabaka omukali ow’omu kyalo ekiriraine e Maserengeta wa Isirairi, yalisetuka ng’abantu b’omulembe gunu babasalira omusango. Era n’abalumiriza omusango okubasinga olw’okubba yazwire yala ino n’aiza okuwulisisya ebibono eby’amalabuki ebya kabaka oSulemaani. Neye obone oyo akiraku oSulemaani ekitiisya ali aanu.”

*Engeri omuzimu egigukanga oku muntu  
(Luk 11:24-26)*

<sup>43</sup> OYesu ni yeeyongera okubeegesya ati, “Omuzimu oweguzwa oku muntu, gulaaduukira omu bitera, nga gunoonia e gigwawuumulira neye owegukayaku,

<sup>44</sup> awo gukoba guti, ‘Neekangira e ginaab-banga.’ Kale owegukanga gwaja omuntu oyo ng’ateereire nakusani era ng’ali ooti nyumba enjereere, enjeje era entegeke nakusani.

<sup>45</sup> Atyanu awo gwaba ni gusyoma emizimu egindi musanvu egigukiraku obubbibubbi, ni gingira ni gibba omu muntu oyo. Kale ekyo kizw-eraku embeera y’omuntu oyo ey’oluzwanyuma okubba mbiibbi okukiraku edi eyasookere. Kale kityo niye owekyalibba n’oku bantu abakola ebibbibbi ab’omulembe gunu.”

*Abaganda ba Yesu n’omaaye  
(Mak 3:31-35; Luk 8:19-21)*

<sup>46</sup> Kale awo oYesu oweyabbaire ng'akaali atumula n'ekiziima ky'abantu, abagandabe n'omaaye ni batuuka e giyabbaire ni beemerera e nza, nga bataka okutumulaku naye.

<sup>47</sup> Awo omuntu n'akobera oYesu ati, "Omaawo n'abagandabo bali e nza, era bataka okutumulaku na iwe."

<sup>48</sup> OYesu n'amwiramumu ati, "Omuntu ogunjeta nti mama ooba abenjeta nti baganda bange niibo ababba ab'engeriki?"

<sup>49</sup> Awo n'adooda oku beegibe era n'akoba ati, "Omama n'abaganda bange niibo banu.

<sup>50</sup> Ekyo kityo olw'okubba nabuli akola oBbaabba aali omwigulu ebyataka niiye abba omuganda wange, era niiye abba omwonyoko wange, era niiye abba omama."

## 13

### *Olugero lw'omusigi (Mak 4:1-9; Luk 8:4-8)*

<sup>1</sup> Awo oku lunaku olunyere olwo oYesu n'awuluka omu nyumba, n'ayaba oku mbale kw'enyanza oGaliraaya, n'atyama.

<sup>2</sup> Ekiziima ky'abantu kinene ni kikumbaanira e gyali, kale awo oYesu n'aniina omu lyato, era n'alityamamu, ng'ekiziima ky'abantu kyonakyoona kyemereire oku mbale kw'enyanza.

<sup>3</sup> Era n'abasonzolera ebintu bingi ng'akolesya ngero ati, "Wabbairwo omulimi eyaabire okusiga ensigogye.

<sup>4</sup> Oweyabbaire ng'asiga, egimo gyagwire ku nzira, enyonyi ni giiza ni gigirya.

<sup>5</sup> Era ensigo egindi ni gigwa mwitakali ery'oku bubbaalebbaale, tigyalwire ni gimera olw'okubba eitakali eryo tiryabbaire lyabiriri.

<sup>6</sup> Neye eisana oweryocerye eino ni liwotoca ebimera ebyo era ni bikala olw'okubba emiri gyabyo gyabbaire tigyabiriire ansi omwitakali.

<sup>7</sup> Ensigo egindi ni gigwa mwitakali eryabbairemumu amawa, kaisi ni gakulira aamo n'ensigo egyo, kale amawa ago ni gagiita.

<sup>8</sup> N'ensigo egindi ni gigwa omwitakali erisa, ni gimera, era ni gibala ensigo egindi 100, n'egindi 60, n'egindi 30.

<sup>9</sup> Aale omuntu aliku amatwi agawulira, awulisisye era ategeere ekintumula.”

*Ekigeresya engero*

*(Mak 4:10-12; Luk 8:9-10)*

<sup>10</sup> Awo abeege ni baigerera e giri oYesu ni bamubuulya bati, “Lwaki oyegesya abantu mu ngero?”

<sup>11</sup> Kale iye n'abairamu ati, “Inywe mwasunire enkabi egy'okumanya ebyama ebikwata oku bwakabaka bw'omwigulu, neye abantu abo ibo tibagisunire.

<sup>12</sup> Ekyo kityo olw'okubba oyo aali nabyo balimwongeraku n'ebindi, era n'abba nabyo bingi ino. Neye oyo abula, n'akatono akaali nako balikamutoolaku.

<sup>13</sup> Enu niyo ensonga lwaki ntumula nabo mu ngero:

'Newankubbaire babonia neye nga tibayezya kumanyica;  
newankubbaire bawulira neye nga tibategeera ebintumula.'

14 "Era kituukirire mwibo oKibbumba ekiyatumwire ng'abitira omu naabbi Isaaya ati:  
'Amatwi gaanywe gawuliranga ebintumula,  
neye nga kwiby mpaawo ekimutegeeraku naire;

amaiso gaanywe gabonianga,  
neye nga mpaawo ekimubona naire.

15 Ekyo kityo olw'okubba abantu abo basuukire maisiyaaye  
ni batayezya kuntegeera niki ekinanyere ekyendi,  
basinyiire amatwi gaabwe ni gasiyalala batyo ni batayezya kuwulira ebyo ebimbakoba.

Era n'amaiso gaabwe gayofuwaire ni batayezya kubona ebyo ebinkola.

Neye singa tiniikyo, bankutegeire niki ekinanyerenyeere ekyendi,  
n'ebyo amaiso gaabwe ebigabona nga nkola,  
n'ebyo amatwi gaabwe ebigawulira nga ntumula egibali.

Batyo bankucuukire omu myoyo gyabwe ni baira egyendi, era ni mbalokola.'

16 "Neye inywe muli b'enkabi olw'okubba amaiso gaanywe gabona, n'amatwi gaanywe gawulira.

17 Ekyo kityo olw'okubba mbakobera amazima nti abanaabbi bangi n'abantu abatuukirirye

beegombere okubona ebimubona, nandi ni babibona, n'okuwulira ebimuwulira, nandi ni babiwulira!"

*OYesu asonzola olugero lw'omusigi  
(Mak 4:13-20; Luk 8:11-15)*

<sup>18</sup> Awo oYesu ni yeeyongera ati, "Aale atyanu muwulire amakulu g'olugero lw'omusigi.

<sup>19</sup> Ensigo egyagwire oku nzira, niibo abantu abawulira obukwenda obukwata oku bwakabaka bw'omwigulu era nandi ni babutegeera, era oSitaani n'aiza n'abutoola omu myoyo gyabwe.

<sup>20</sup> Kaisi ensigo egyagwire omwitakali ery'oku bubbaalebbaale, niibo abantu abawulira ekibono kya Kibbumba era ni bakyaniriza mangu n'eisangaalo.

<sup>21</sup> Neye ni babba ooti bimera ebidamba emiri egyabirira nakimo ansi omwitakali. Ibo baikirirya ekibono kya Kibbumba okumala ekiseera kityayi kiti, kaisi owebagwa omu bigosi ooba okubayiigaania olw'ekibono kya Kibbumba amangu ago ni bakizwaku.

<sup>22</sup> Igyo egyo egyagwire omwitakali eryamereremu amawa, niibo abantu abawulira ekibono kya Kibbumba. Neye okweraliikirira ebintu by'e kyalo n'okubabbeyabbeya n'ebyobusuni n'amasanyu g'ekyalo kinu, owebifuga emyoyo gyabwe bikaisya ekibono kya Kibbumba okubabeera okukola ebikole ebisa.

<sup>23</sup> Neye ensigo egyo egyagwire omwitakali erisa, niibo abantu abawulira ekibono kya Kibbumba n'omwoyo omusa nakimo, kaisi ni

bakikuuma era ni beekalangula okukolanga ebikole ebisa. Ekikoba kiti abantu abo ni babba ooti kimera ekyabalire, ng'onsigo omoiza abala emirundi 100, ooba 60, ooba 30."

### *Olugero lw'ebisubi ebikolokosimbo*

<sup>24</sup> Awo, tete oYesu n'abagerera olugero olundi ati, "Obwakabaka bw'omwigulu tubufaananiaku n'omuntu eyasigire ensigo egy'engaano ensa omu musirigwe.

<sup>25</sup> Neye obwire abantu owebabbaire nga bagonere, omulabewe n'ayaba yena n'asigamu ensigo gy'ebisubi ebikolokosimbo, era ni yeeyabira.

<sup>26</sup> Kale engaano owegyamalire okukula ni gisowola era ni gisulya ebigala, awo ebisubi ebyo byona ni byeraga."

<sup>27</sup> Kale awo abaweererya ba nanyere omusiri ni baaba ni bakoba onanyere bati, "Musengwa, kaisi titwasigire nsigo ensa omu musiri? Kaisi tete ebikolokosimbo ebyamereiremu byazwire yaina?"

<sup>28</sup> Awo iye n'abairamu ati, "Omulabe niiye ayakolere ekyo." Kaisi abaweereryabe ni bamubuulya bati, "Otaka twabe tubiiyemu?"

<sup>29</sup> Neye iye n'abairamu ati, "Bbe muleke, olw'okubba owemwabba mubiiyamu, mwezya okwiyiramu n'engaano gyona.

<sup>30</sup> Wazira muleke byonabyona bikulire aamo paka okwikesa. Omu kiseera ekyo, nalikoba abakesi nti, 'Musooke mukumbaanie ebikolokosimbo mubisibe binywa mubyoce,



kaisi engaano mugikumbaanie era mugireete omu kideero kyange.’ ”

*Olugero lw’akansigo aka kalidaali*

*(Mak 4:30-32; Luk 13:18-19)*

<sup>31</sup> Awo oYesu n’abagerera olugero olundi ati, “Obwakabaka bw’omwigulu tubufaananiaku n’akansigo aka kalidaali, iko omuntu akeyat-waire n’akakoma omu musirigwe.

<sup>32</sup> Waire nga kamo oku bunsigo obukiraku obutono omu nsigo gyonagyona, neye owekamera, kakula ni kasuuka kimera kya syodo ekinene ekikiraku ehirime bya syodo ebindi byonabyona ebibba omu musiri. Era ni kibba ooti musaale, n’enyonyi ni girukaku ebisaasiriro n’okusiibanga omu masaga gaakyo.”

<sup>33</sup> Tete oYesu n’abagerera olugero olundi ati, “Obwakabaka bw’omwigulu tubufaananiaku n’obukazumbulukuca obutono buti, ibwo omukali obuyakoleserye okusumba emigaati. Waire wona yakandire obusye bungi, obukazumbulukuca bwasalaaniire omu gutole gwonagwona.”

*OYesu ekiyazwireku n’akolesya engero*

*(Mak 4:33-34)*

<sup>34</sup> OYesu yayegesyanga ebintu ebyo byonabyona abantu ng’akolesya ngero. Mpaawo ekiyabakoberanga nga takoleserye ngero.

<sup>35</sup> Ekyo kyabaire kityo kaisi oKibbumba ekiyatumwire ng’abitira omu naabbi kituukirire, ekikoba kiti:

“Nalitumula nga nkolesya ngero;

nalibbutula ebimbaire nkaali okubiikula,  
 eby'eira n'eira.”

*OYesu asonzola olugero lw'eisubi  
 okolokosimbo*

<sup>36</sup> Awo oYesu n'azwa omu kiziima ky'abantu, era n'ayaba omu nyumba. Era abeegibe ni baaba e gyali, ni bamukoba bati, “Otusonzolere amakulu g'olugero lw'eisubi okolokosimbo omu musiri gw'engaano.”

<sup>37</sup> Kale oYesu n'abairamu ati, “Iye asiga ensigo ensa niye oMwana wa Muntu.

<sup>38</sup> Era omusiri niikyo ekyalo, igyo ensigo ensa niibo abantu abo abakola oKibumba ebyataka. Kaisi eisubi okolokosimbo, niibo abantu abakolera oku bya Sitaani.

<sup>39</sup> Era omulabe eyalisigiremu niye oSitaani. Eikesa niyo enkomerero y'ekyalo kaisi abakesi niibo abamalaika.

<sup>40</sup> Kale kityo nakimo ng'eisubi okolokosimbo owebalikumbaania ni balyoca, niye owekyalibba oku nkomerero y'ekyalo.

<sup>41</sup> OMwana wa Muntu yalituma abamalaikabe, okulondamu omu bantu b'obwakabaka bw'omwigulu abo bonabona abazweraku abantu okukola ebibbibbi, n'abo bonabona abakola ebibbibbi.

<sup>42</sup> Era abantu abo balibasindika omu musyo ogw'amaani eino, eeyo e walibba okukunga n'okunjiya amaino.

<sup>43</sup> Kaisi abantu abatuukirirye bamesye ooti isana nga bali omu bwakabaka bwa Itewabwe.

Aale omuntu aliku amatwi agawulira, awulisisye era ategeere ekintumula!”

*Olugero lw’ekyobusuni ekibise*

<sup>44</sup> Awo oYesu tete n’abagerera olugero olundi ati, “Obwakabaka bw’omwigulu tubufaananiaku n’ekyobusuni omuntu ekiyabisire omu musiri, kaisi omuntu ogondi n’akivumbula era yena n’akibisa awandi tete. Era olw’eisangaalo eringi eriyabbaire nalyo n’ayaba n’atunda ebintubye byonabyona ebiyabbaire nabyo, n’agula omusiri ogwo.”

<sup>45</sup> OYesu n’abagerera ati, “Tete obwakabaka bw’omwigulu era tubufaananiaku n’omuntu omusuubuuzi, eyabbaire anoonia amabbaale ag’ebbeeyi.

<sup>46</sup> Era oweyavumbwire ery’ebbeeyi eino e giriri, yaabire n’atunda ebintubye byonabyona ebiyabbaire nabyo, n’aligula.”

*Olugero lw’akatimba k’enyanyi*

<sup>47</sup> Awo oYesu ni yeeyongera ati, “Era tete obwakabaka bw’omwigulu tubufaananiaku n’akatimba k’enyanyi, abazibuli akebategere omu nyanza ni bapapalya enyanyi egya buli ngeri.

<sup>48</sup> Kaisi owekaizwire, abazibuli ni bakakuusira oku lukalu. Awo ni batyama ni balondyamu enyanyi ensa ni bagiteeka omu biibo, kaisi embiibbi ni bagidyaka eedi.

<sup>49</sup> Era kityo niiye owekyalibba oku nkomerero y’ekyalo. Abamalaika baliiza ni baabulamu abantu abakola ebibbibbi mwabo abatuukirirye.

<sup>50</sup> Kaisi abo abakola ebibbibbi balibasindika omu musyo ogw'amaani eino, eeyo e walibba okukunga n'okunjiya amaino."

<sup>51</sup> Kale awo oYesu n'abuulya abeegibe ati, "Mutegeire ebintu ebyo byonabyona ebimbeege-serye?" Ibo ni bamwiramumu bati, "Niikyo ekyo."

<sup>52</sup> Awo n'abakoba ati, "Kale atyanu nabuli mukugu omu by'aMateeka ga Musa, iye asuuka omwegi omu bwakabaka bw'omwigulu, ali ooti muntu aali n'enyumbaye kaisi omu kisenge ekyabisamu ebintu, n'atoolerangamu ebintu ebiyaaka n'ebikaire."

*Ab'e Naazaleesi bagaana oYesu  
(Mak 6:1-6; Luk 4:16-30)*

<sup>53</sup> Awo oYesu oweyamalire okubagerera engero egyo, n'azwa omu kitundu ekyo,

<sup>54</sup> n'ayaba e Naazaleesi omu kibuga ky'e waabwe n'atandiika okwegesya omwikumbaaniro lyabwe. Era abantu ni bawuninkirira, ni bakoba bati, "Omusaiza onu yasunire atya amalabuki ago n'obwezye okukola ebyewunyo binu?"

<sup>55</sup> Oyo tiniye omutaane wa mubaizi? Omaaye tiniye ogubeeta oMalyamu? N'abagandabe tini-ibo oYaakobbo n'oYusufu,\* n'oSimooni n'oYuda?

<sup>56</sup> Era aboonyokobe bonabona tibabba kwaiswe kunu na iswe? Kaisi olwo atoola yaina amalabuki agatyo n'obwezye obwo bwonabwona?"

<sup>57</sup> Awo ni bamukwatira engongi.

---

\* **13:55 13:55** Omu Biwandiike ebimo bamweta, Yose.

Neye iye oYesu n'abakoba ati, "Onaabbi bamuwa ekitiisya wonawona okutoolaku omu kitundu ky'e waabwe, n'omu nyumba y'e waabwe."

<sup>58</sup> Era eeyo tiyakolereyo ebyewunyo ebingi olw'okubba abantu baayo tibabbaire n'okwikirirya.

## 14

### *Enfa ya Yokaana oMubatizi*

*(Mak 6:14-29; Luk 9:7-9)*

<sup>1</sup> Kale awo omu kiseera ekyo, oKerode omufugi w'eitwale ly'e Galiraaya n'awulira okufuma kwa Yesu.

<sup>2</sup> N'akoba abaweereryabe ati, "Omuntu oyo atekwa okubba Yokaana oMubatizi niye azuukiire, era nga niikyo ekigira ali n'obwezye okukola ebyewunyo."

<sup>3</sup> Ekyo kyabbairewo olw'okubba oKerode yabbaire akwaite oYokaana n'amusiba, n'amwigalira omu mabbuusu, ng'agenderera kusangaalya Kerodiya, omukali wa mugandawe oFiripo oguyabbaire abandwire.

<sup>4</sup> Ekyo kyabbairewo olw'okubba oYokaana yabbaire adeebere oKerode ati, "Amateeka tigaikirirya iwe okutwala oKerodiya okubba mukaliwo."

<sup>5</sup> Era newankubbaire oKerode yabbaire ataka okwita oYokaana, neye yabbaire atya aBayudaaya olw'okubba ibo babbaire baikirirya bati oYokaana naabbi.

<sup>6</sup> Neye oku lunaku lwa kwebukiriryaku olubabyaliire oKerode, omwala wa Kerodiya n'abina n'asangaalya ino oKerode.

<sup>7</sup> N'olwekyo, omu kirayiro oKerode n'asuubiza okuwa omwala oyo kyonakyoona ekiyamusaba.

<sup>8</sup> Iye omwala n'akolera ku malabuki omaaye ageyamuwaire, kale n'akoba oKerode ati, "Ompe aanu mutwe gwa Yokaana oMubatizi nga baguteekere okwitiba."

<sup>9</sup> Ekyo ni kiruma ino okabaka, neye olw'okubba yabbaire alayiire, aate nga n'abagenibe bawuliire, n'alagira ni bamukolera ekiyasabire.

<sup>10</sup> Era okabaka n'alagira ni baaba omu mabbusu batemaku oYokaana omutwe.

<sup>11</sup> Era ni baguleetera okwitiba, ni baguwa omwala, era yena n'agutwalira omaaye.

<sup>12</sup> Kale awo abeegi ba Yokaana ni baaba, ni batwala omulambogwe, ni baguliika kaisi ni baaba bakobera oYesu ebibbairewo.

*OYesu aliisya abantu 5,000*

*(Mak 6:30-44; Luk 9:10-17; Yok 6:1-14)*

<sup>13</sup> Awo oYesu oweyawuliire ati batemereku oYokaana omutwe, n'azwa omu kifo ekyo n'abeegibe, ni baniina omu lyato, ni baaba bonkani omu kifo ekinambulamu bantu. Neye ekiyindi ky'abantu b'omu bibuga ebyeruguuliriirye aawo owekyategeireku, ni kisenjaayo n'ebigere nga kibita oku mbale mbale kw'enyanza.

<sup>14</sup> OYesu oweyatuukire oku lukalu, n'abona ekiziima ky'abantu kinene nga kiri aawo,

n'akikwatira ekisa, n'alamy'a ababbairamu abalwaire.

15 Obwire owebwabbair'e nga bwirugala, abeegi ni baaba e giri oYesu, ni bamukoba bati, "Ekifo kinu mpaamu bantu, aate nga n'obwire buunu bwabire. Abantu obaseebule baabe beegulire ekyokulya omu byalo ebiriraine aanu."

16 OYesu n'abairamu ati, "Tikibeetaagisya ibo kwaba, wazira niinywe omubbe mubawe ekyokulya balye."

17 Ibo ni bamwiramu bati, "Tulikuuwo aanu n'emigaati mitaanu gyonkani, n'enyanyi ibiri."

18 OYesu n'akoba ati, "Mubindeetere aanu."

19 Era n'alagira abantu okutyama ansi okwisubi, awo n'atoola emigaati emitaanu, n'enyanyi eibiri, kaisi n'alingirira omwigulu, ni yeebalya oKibbumba. Awo n'avunavunamu emigaati, n'agiwa abeegibe ni bagigabira abantu.

20 Era abantu bonabona baliire ni baikuta, era abeegibe ni bakumbaania ebitundutundu ebyafikireku, ni baizulya ebiibo ikumi na bibiri.

21 Obungi bw'abantu abaliire, babbair'e abasaiza ooti 5,000, nga tibabaliireku abakali n'abaana.

*OYesu atambula oku maizi  
(Mak 6:45-52; Yok 6:15-21)*

22 Awo ng'ebyo byankuwa, oYesu n'akoba abeegibe okuniina omu lyato beesooke baabenge oku lubba ludi olw'enyanza, nga iye akaali aseebula abantu.

23 Oweyamalire okuseebula abantu, n'aniina oku lusozi yenkani okusaba oKibbumba. Endiki-irya oweyakwatiire yabbaire akaali ali eeyo.

24 Neye omu kiseera ekyo eryato abeegi erib-abbairamu lyabbaire yala n'oku lukalu, era amayengo gabbaire mangi nga gakubba eryato olw'ogumpunga ogwabbaire gufuwa nga gubazwera omumaiso.

25 Obwire owebwabbaire bwatira okuca, oYesu n'ayaba e gibabbaire ng'atambula oku maizi.

26 Neye ibo owebamuboine ng'atambulira oku maizi, ni batya ino, ni bakoba bati, "Kyewo!" Ni bakubba enduulu olw'okutya.

27 Neye amangu ago oYesu n'abakoba ati, "Ninze! Timwatya, mwiremu omwoyo."

28 Awo oPeetero n'amukoba ati, "Musengwa, ondagire ntambule oku maizi nga njiza e gyoli owoobbanga dala niiwe."

29 OYesu n'amukoba ati, "Oize." Awo oPeetero n'azwa omu lyato, n'atambula oku maizi ng'ayaba e giri oYesu.

30 Neye oPeetero oweyaboine amayengo olw'ogumpunga ogw'amaani n'atya. Awo n'atandiika okweinika, kaisi n'aceera ati, "Musengwa, ondamyee!"

31 Amangu ago oYesu n'agolola engalo, n'amukwata, n'amukoba ati, "Lwaki obuusabuusire? Ng'ooli n'okwikirirya kutono!"

32 Kale awo owebaniinire omu lyato, ompunga n'awaaku.

33 Kaisi awo abeegi badi ababbaire omu lyato ni basinza oYesu nga bamukoba bati, "Dala, ooli Mwana wa Kibbumba."



*OYesu alamyā abalwaire e Genesereeti*  
(Mak 6:53-56)

<sup>34</sup> Awo owebasaliremu enyanza ni bayambuka kudi, batuukiire mu kitundu ky'e Genesareeti.

<sup>35</sup> Era abantu b'omu kitundu ekyo owebamanyicirye oYesu, ni batumisya obukwenda omu bitundu ebyeruguuliriirye aawo byonabyona. Era abantu ni bamuleetera abalwaire baabwe bonabona,

<sup>36</sup> era ni bamwegairira aikirirye abalwaire nago bakwateku-bukwati oku mugo gw'ekizwalokye. Era bonabona abakikwaiteku, ni balama.

## 15

*ABayudaaya bagotesya ebiragiro bya Kibumbamba*  
(Mak 7:1-13)

<sup>1</sup> Awo abamo oku Bafalisaayo n'abakugu omu by'aMateeka ga Musa ni bazwa e Yerusaalemi, ni baaba egiri oYesu, ni bamubuulya bati,

<sup>2</sup> "Lwaki abeegibo tibasengererya obulombolombo bw'abazeiza baiswe? Ekyo kityo olw'okubba ibo owebabba baaba okulya, tibanaaba omu ngalo!"

<sup>3</sup> Neye oYesu n'abairamu ati, "Kaisi lwaki inywe nywena muvuna ekiragiro kya Kibumbamba olw'okutaka okusengererya obulombolombo bwanywe?"

<sup>4</sup> Iye oKibumbamba yakobere ati, 'Oiteewo n'omaawo obawenge ekitiisya,' era ati, 'Eyazumanga oiteeye ooba omaaye, bamwitenge-bwiti.'

5 Neye inywe mukoba muti singa omuntu akoba oiteeye ooba omaaye ati, 'Ekinandikuwaire ng'obubbeeri, nkiwaire Kibbumba.'

6 Awo omuntu oyo nga takaali abbaaku n'akantu kadi kamo akaakolera oiteeye ooba omaaye. Omu ngeri eyo oKibbumba ekyakoba ni mukidibya ni musengererya bulombolombo bwanywe.

7 Bananfunsi inywe, kaisi ekibono kya Kibbumba onaabbi Isaaya ekiyabalagwireku kituuce, oweyakobere ati:

8 'Abantu banu bampa ekitiisya mu bibonobubono,  
neye emyoyo gyabwe gimbulaku.

9 Era n'engeri egibansinzamu tintuuce,  
olw'okubba ebibono eby'abantu-obuntu,  
niiby'o ebibeegesya bati Mateeka ga Kibbumba.' "

*Omuntu okubba owa muliko*  
(Mak 7:14-23)

10 Awo olundi oYesu n'ayeta ekiziima ky'abantu, ni kyaba e gyali, n'akikoba ati, "Mumpulisisye era mutegeere

11 Ekyo omuntu ekyalya tiniikyo ekimusuuca okubba owa muliko omumaiso ga Kibbumba, neye ekyo ekizwa omu mwoyogwe niikyo ekimusuuca okubba owa muliko."

12 Awo abeegibe ni baaba e gyali, ni bamubulya bati, "Omaite oti aBafalisaayo kibanyiigisirye owebawuliire ekyo?"

13 OYesu n'abairamu ati, "Nabuli kimera oB-baabba aali omwigulu ekinandi n'akoma baliki-  
iya ni kizwayo paka n'emiri.

14 Mubaleke, abo abali ooti beekubbemberi  
aboofu. Singa omwofu yeekubbembera omwofu  
omwinaye, bonabona bagwa omu kiina."\*

15 Awo oPeetero n'amukoba ati, "Otusonzolere  
amakulu g'olugero olwo."

16 OYesu n'akoba ati, "Nywena mukaali  
okutegeera?

17 Timubona muti nabuli kintu ekibalya kyaba  
mu kida, era kizwamu ni kiwuluka omu mubiri?

18 Neye omuntu ebyatumula bizwa mu mwoyo,  
era ebyo niiby ebisuuca omuntu okubba owa  
muliko omumaiso ga Kibbumba.

19 Ekyo kityo olw'okubba omu mwoyo gwa  
muntu niimwo omuzwa ebiseego ebibbibbi,  
n'obwiti, n'obulendi, n'obudankaani, n'obwibbi,  
n'okusibirirya oku bantu, n'okutumula  
ebyakalebule oku bantu.

20 Era ebintu ebyo niiby ebisuuca omuntu  
okubba owa muliko omumaiso ga Kibbumba.  
Neye omuntu okulya nga tanaabire omu ngalo,  
tikimusuuca owa muliko."

*Omukali eyabbairi n'okwikirirya*  
(Mak 7:24-30)

21 Awo oYesu n'abeegibe ni bazwa omu kifo  
ekyo, ni baaba omu kitundu ekiriraine ebibuga  
oTiiri n'oSidoni.

---

\* **15:14 15:14** EBiwandiike ebindi eby'eira bikoba biti, *Beekubbe-  
mberi b'aboofu.* **15:14 15:14** Luk 6:39 **15:18 15:18** Mat 12:34

<sup>22</sup> Omukali oMukanani, neye nga mutyami w'omu kitundu ekyo, n'ayaba e giri oYesu, ng'amwaminkirira ati, "Musengwa, iwe oKurisito oMwizukulu wa Dawudi, onkwatire ekisa! Omwala wange aliku omuzimu, era gumugadya ino!"

<sup>23</sup> Neye oYesu nandi n'amwiramu kadi. Kale abeegibe ni baaba e gyalni ni bamwegairira bati, "Omuseebule ayabe olw'okubba atusengererya ng'atuceererera!"

<sup>24</sup> Awo oYesu n'abairamu ati, "Nze bantumire eeri bantu b'e Isirairi bonkani abali ooti ntaama egyagotere."

<sup>25</sup> Neye era omukali oyo n'ayaba n'akomera oYesu amazwi era n'amukoba ati, "Musengwa, ombeere!"

<sup>26</sup> OYesu n'amwiramu ati, "Tikituce okutoola ekyokulya ky'abaana ni bakimumira embwa gyabwe."

<sup>27</sup> Omukali n'akoba ati, "Niikyo ekyo Musengwa, neye n'embwa gyona, girya obukunkumukira obuzwa oku menza ya musengwa waagyo."

<sup>28</sup> Awo oYesu n'amwiramu ati, "Mukali iwe, oli n'okwikirirya kw'amaani! Aale kibbe kityo ng'owootaka." Era omwalawe n'alamirawo omu saawa eyo.

### *OYesu alamyabantu abangi*

<sup>29</sup> Awo oYesu n'abeegibe ni bazwa omu kifo ekyo, ni baaba oku mbale kw'enyanza oGaliraaya, n'aniina oku lusozi n'atyama.

<sup>30</sup> Era ebiyindi by'abantu ebinene ni byaba e gyalni nga bamutwalira abaleme, n'aboofu,

n’abanialuuki, n’ababbubbu, n’abalwaire abandi bangi. Era abalwaire abo ni babateeka omumaisoge, n’abalamyā.

<sup>31</sup> Kale abantu ni bawuninkirira nga babona ababbaire babbubbu batumula, ababbaire banialuuki nga babba kusani, ababbaire abaleme batambula, n’ababbaire aboofu nga babona. Era ni bagulumalya oKibbumba wa Isirairi.

*OYesu aliisya abantu 4,000*

*(Mak 8:1-10)*

<sup>32</sup> Awo oYesu n’ayeta abeegibe, ni baaba e gyali, n’abakoba ati, “Abantu banu bankwatisirye ekisa olw’okubba bamalire na nze enaku isatu nambirira, aate atyanu badambaku ekibalya. Tintaka okubaseebula ng’enzala ebaluma, bademba babbalikira omu nzira.”

<sup>33</sup> Abeegibe ni bamwiramū bati, “Omu kitundu kinu omunambula muntu twatoola yaina ekyokulya ekimala okwikutya ekiziima ky’abantu ekityo?”

<sup>34</sup> OYesu n’ababuulya ati, “Mulikuuwo n’emigaati mimeka?” Ni bamwiramū bati, “Musanvu, n’obunyanyi obukafingiri butono buti.”

<sup>35</sup> Awo n’alagira abantu batyame ansi,

<sup>36</sup> n’atoola emigaati omusanvu n’obunyanyi nago, ni yeebalya oKibbumba. Era n’abivunavunamu, n’abikwatisya abeegibe, era bona ni babigabira abantu.

<sup>37</sup> Era abantu bonabona ni balya ni baikuta. Era abeegibe ni bakumbaania ebitundutundu ebyafikireku, ni baizulya ebiibo musanvu.

<sup>38</sup> Obungi bw'abantu abaliire, babbaire abasaiza 4,000, nga tibabaliireku abakali n'abaana.

<sup>39</sup> Awo oYesu n'aseebula abantu, kaisi n'aniina omu lyato, ni baaba omwitwale ly'e Magadani.

## 16

*OYesu bamusaba akamanyiciryo  
(Mak 8:11-13; Luk 12:54-56)*

<sup>1</sup> Awo abamo oku Bafalisaayo n'aBasedukaayo ni baaba e giri oYesu okumukema. Ni bamusaba abawe akamanyiciryo akalaga kati obwezyebwe buzwa eeri Kibbumba.

<sup>2</sup> Neye oYesu n'abairamu ati, ["Obwire owebubba nga bwirugala, mukoba muti, 'Bwabba busa eizo, olw'okubba angulu atukuliki.'"]

<sup>3</sup> Era amakeezi pwi, mukoba muti, 'Olwatyano oikendi yatoonya, olw'okubba angulu atukuliki, era awandi ebireri biirugazu zigi.' Mumaite okuvuunula amakulu g'emboneka y'angulu, neye timwezya okuvuunula amakulu g'ebyo ebiri kubbangawo omu kiseera kinu!]\*

<sup>4</sup> Abantu b'omulembe gunu ibo abakola ebibibibbi, era abazwazwa oku Kibbumba, ibo basaba akamanyiciryo. Neye mpaawo akenjaba okubawa, okutoolaku ako akebakoleire onaabbi Yona." Awo n'abazwaku ni yeeyabira.

*Enjegesya embiibbi ey'aBafalisaayo  
n'aBasedukaayo  
(Mak 8:14-21)*

---

**16:1** **16:1** Mat 12:38; Luk 11:16 \* **16:3** **16:2-3** EBiwandiike ebimo eby'eira bibulamu ebibono ebiri omu nyiriri ginu. **16:4** **16:4** Mat 12:39; Luk 11:29

<sup>5</sup> Awo oYesu n’abeegibe ni basalamu enyanza ni bayambuka oku lubbba ludi, neye ng’abeegi beerabiire okwabaku n’emigaati.

<sup>6</sup> OYesu n’abakoba ati, “Mulabuke, mwekuume ekizumbulukuca ky’aBafalisaayo n’aBasedukaayo.”

<sup>7</sup> Awo ibo ni beegeyamu bati, “Atukoba atyo olw’okubba tituleetere emigaati.”

<sup>8</sup> Neye oYesu oweyamanyicirye ekibakoba, n’ababuulya ati, “Inywe, lwaki mwegeyamu ni mukoba muti mubula emigaati? Nga muli n’okwikirirya kutono!

<sup>9</sup> Mukaali okutegeera, era timwebukirya owe-nagabuliire abantu 5,000 emigaati emitaanu? Kwolwo mwasolongere ebiibo bimeka ebiizwire ebitutundutundu ebyafikireku?

<sup>10</sup> Kaisi tete owenagabuliire abantu 4,000 emigaati omusanvu, mwasolongere ebiibo bimeka ebiizwire ebitutundutundu ebyafikireku?

<sup>11</sup> Lwaki timutegeire muti timbaire ntumula na inywe ku migaati? Kale, aale mwekuume ekizumbulukuca ky’enjegesya y’aBafalisaayo n’aBasedukaayo!”

<sup>12</sup> Awo ni bategeera bati tabbaire abakoba kwekuuma kizumbulukuca ekibateeka omu migaati, neye kwekuuma njegesya embiibbi ey’aBafalisaayo n’aBasedukaayo.

*OPeetero abbutula oYesu ekyali  
(Mak 8:27-30; Luk 9:18-21)*

13 Awo oYesu n'ayaba n'abeegibe omu bubuga bw'omu kitundu ekibeeta oKaisaaliya Firipo, n'abuulya abeegibe ati, "Abantu owebabba batumula oku Mwana wa Muntu bamweta naani?"

14 Ni bamukobera bati, "Abamo bakweta Yokaana oMubatizi, abandi bati mbu niiwe onaabbi Eriya, kaisi n'abandi bati mbu Yeremiya, ooba omoiza oku banaabbi badi abandi."

15 Awo n'ababuulya ati, "Kaisi inywe munjeta naani?"

16 Iye oSimooni Peetero n'amwiramumu ati, "Ni iwe oKurisito oyo oKibbumba oguyasukireku amafuta, era oMwana wa Kibbumba onanyere obwomi."

17 OYesu n'amukoba ati, "Simooni, omwana wa Yona, ng'oli w'enkabi! Ekyo kityo olw'okubba amazima ago, omuntu tiniye akumanyikisiryeyi, neye Bbaabba aali omwigulu.

18 Kale n'olwekyo nkukoba nti niiwe oPeetero, amakulu gaalyo nti Ibaale. Era okwibbaale eryo niigwo omusingi oku nalyemererya ekanisa yange. Era kadi n'amaani ag'egeyeena tigezaye okugiyinga.

19 Nalikuwa obwezye oku bantu b'obwakabaka bw'omwigulu. Era kyonakyona ekiwagaananga oku kyalo oKibbumba yena omwigulu yaabbanga akigaine, era kyonakyona ekiwaikiriryanga oku kyalo oKibbumba yena omwigulu yaabbanga aikiriirye ati kibbeewo."



<sup>20</sup> Awo oYesu n'asisiitira abeegibe okutakoberaku omuntu yenayena bati, niye oKurisito nago oKibbumba oguyasukireku amafuta.

*OYesu alanga okufa n'okuzuukirakwe  
(Mak 8:31-9:1; Luk 9:22-27)*

<sup>21</sup> Okuzwera omu kiseera ekyo, oYesu n'atandiika okumanyikisya abeegibe ati atekwa okwaba e Yerusaalemi. Era ati abantu abakulu omwigwanga, n'abakabona abakulu, n'abakugu omu by'aMateeka ga Musa bamugadya ino, n'okumwita, neye oluzwanyuma lw'enaku ibiri, oku lwokusatu yalizuukira.

<sup>22</sup> Awo oPeetero n'airya oYesu oku mbale n'amwakanisya ino ati, "Kadi naire, Musengwa. Ekyo tikyalikutuukaku kadi naire!"

<sup>23</sup> Neye oYesu n'agaluka n'alola oku Peetero kaisi n'amukoba ati, "Onzwe omumaiso, oli Sitaani! Oli kuntigalira okutuukirirya ekyandeetere olw'okubba ebigererwa bya Kibbumba tiniibyo ebyofaaku, neye ofa ku by'abantu!"

<sup>24</sup> Awo oYesu n'akoba abeegibe ati, "Nabuli muntu ataka okubba omusengereri wange, ali n'okwerabira ekyali, ni yeetiika omusalabbagwe ogw'okugada olw'obwakabaka bwa Kibbumba, era n'ansengererya.

<sup>25</sup> Ekyo kityo olw'okubba nabuli agezyaku okulamya obwomibwe okululwe, yalibufirwa, neye nabuli afirwa obwomibwe okulwange, yalibulamya.

<sup>26</sup> Aale kirimu mugasoki omuntu okusuna obusuni bwonabwona obw'oku kyalo, neye kaisi n'afirwa obwomibwe? Era dala mpaawo omuntu ekyayezya okuwaayo okugula obwomibwe.

<sup>27</sup> Ekyo nkitumula olw'okubba oMwana wa Muntu ayaba okwizira omu kitiisya kya Iteeye, n'abamalaikabe, era awo awe nabuli muntu empeeraye, ng'asinzirira ku biibyong' nabuli muntu ebiyakolere.

<sup>28</sup> Mbakobera amazima nti abamo oku bantu abali aanu, tibalifa nga bakaali okubonaku oMwana wa Muntu ng'aiza okufuga."

## 17

### *Okucuuka kw'emboneka ya Yesu (Mak 9:2-13; Luk 9:28-36)*

<sup>1</sup> Enaku mukaaga owegyabitirewo, oYesu n'ayaba n'oPeetero, n'abaganda ababiri oY-aakobbo n'oYokaana, n'abeekubbembera, ni baniina olusozi oluwanvu e gibabbaire bonkani.

<sup>2</sup> Awo embonekaye n'ecuuka nga babona. Omumaisoge ni munekaaneke ooti isana, era ebizwalobye ni bimirikiinya ooti kitangaala.

<sup>3</sup> Ananyere aawo oMusa n'Eriya ni babeerukira nga batumula n'oYesu.

<sup>4</sup> Awo oPeetero n'akoba oYesu ati, "Musengwa, kisa okubba aanu. Singa wataka, naluka aanu obusiisira busatu: Akamo kako, n'akandi ka Musa, n'akandi k'Eriya."

5 Oweyabbaire ng'akaali atumula ebyo, ekireri ekimirikiinya ni kiiza, ni kibabbuunaku n'ekiiriirye kyakyo. Era eigono ni lizwera omu kireri ekyo nga likoba liti, "Onu niiye oMwana wange oguntaka eino, era ogunsiima eino, mumuwulisisye."

6 Era abeegi abo owebawuliire ekyo, ni ba-fuunama ni baica empumi ansi okwitakali nga batiire ino.

7 Neye oYesu n'ayaba e gibali, n'abakwataku, n'abakoba ati, "Musetuke, timwatya!"

8 Awo owebagangamukire, kadi kubonaku omuntu okutoolaku oYesu yenkani.

9 Era owebabbaire baniinuka olusozi, oYesu n'abasisiitira ati, "Ekimuboine timukikoberangaku omuntu yenayena paka oMwana wa Muntu ng'abamalire okumuzuukiza."

10 Awo abeegibe ni bamubuulya bati, "Olwo lwaki abakugu omu by'aMateeka ga Musa bakoba bati Eriya niiye atekwa okusooka okwira kaisi oKurisito aize?"

11 OYesu n'abairamu ati, "Kituuce, Eriya ni- iye aali n'okusooka okwira, okwiry a emyoyo gy'abantu obuyaaka.

12 Neye mbakobera nti omuntu aali ooti Eriya yaizire ira, neye abantu tibamutegeire, ni ba- mukola ebintu byonabyona ebibatakire. Era n'omu ngeri enanyere eyo oMwana wa Muntu yena baaba okumugadya."

13 Awo abeegi abo ni bategeera bati yabbaire atumula ku Yokaana oMubatizi.

*OYesu alamyā omwisuka aliku omuzimu  
(Mak 9:14-29; Luk 9:37-43)*

14 Awo oYesu n'abeegibe abasatu owebatuukire awabbaire ekiziima ky'abantu, omusaiza moiza n'ayaba e giri oYesu n'amukomera amazwi.

15 Era n'amukoba ati, "Musengwa, okwatire omutaane wange ekisa olw'okubba agwa empimbu, era agadira nakimo ino. Emirundi mingi agwa omu musyo, ooba omu maizi.

16 Era mmuleetereku e giri abeegibo, neye ni bakaya okumulamyā."

17 Awo oYesu n'airamu ati, "Abantu inywe ab'omulembe gunu ababula okwikirirya era ab'eitalo, nalimala na inywe kiseera kyenkana aina nga mbaguminkiriza?" Awo n'akoba oiteeye w'omwisuka ati, "Ondeetere aanu omwisuka nago."

18 Era awo oYesu n'akaawuukira omuzimu, ni guzwa oku mwisuka nago, era n'alama omu kaseera ako.

19 Oluzwanyuma abeegi ni baaba e giri oYesu bonkani, ni bamubuulya bati, "Olwo lwaki iswe titwezyerye okugumubbingaku?"

20 Awo oYesu n'abairamu ati, "Ekyo kityo olw'okubba mudamba okwikirirya okumala. Mbakobera amazima nti singa mubba n'okwikirirya okutyai ooti kampeke aka kalidaali, mwezya okukoba olusozi lunu muti, 'Ozwe

aanu, oyabe aadi,' era ni lwaba. Era mpaawo ekyalibakaisya. [

<sup>21</sup> Neye omuzimu ogw'engeri eyo, tibagubbinga oku muntu anambula kusaba oKibbumba n'okusiiba]."\*

*OYesu atumula tete oku kufaakwe  
(Mak 9:30-32; Luk 9:43-45)*

<sup>22</sup> Lumo oYesu n'abeegibe owebakumbaani-ire omu Galiraaya, yabakobere ati, "OMwana wa Muntu baaba okumulyamu olukwe era bamuweeyo eeri ab'obwezye,

<sup>23</sup> era balimwita. Neye oluzwanyuma lw'enaku ibiri, oku lwokusatu yalizuukira." Awo owebawuliire entumula eyo ni baizula enima omu myoyo gyabwe.

*Okuwa omusolo ogw'eYeekaalu*

<sup>24</sup> OYesu n'abeegibe owebatuukire e Kaperenawumu, abasooloji ba musolo ogw'eYeekaalu ni baaba e giri oPeetero, ni bamubuulya bati, "OMusomesya waanywe iye tawa omusolo gw'eYeekaalu?"

<sup>25</sup> Nairamu ati, "Awa."

Oluzwanyuma oPeetero oweyaingiire omu nyumba, oYesu n'amwesooka okutumula, n'amukoba ati, "Oseega otya, Simooni? Abakabaka b'omu kyalo munu, empooza ooba omusolo babitoola ku bantuki? Ku bantu baabwe ababyaliranwa, ooba ku bantu abatali babyaliranwa?"

---

**17:20 17:20** Mat 21:21; Mak 11:23; 1Ko 13:2 \* **17:21 17:21**  
EBiwandiike ebimo eby'eira bibulamu olunyiriri lunu. **17:24**  
**17:24** Kuz 30:13; 38:26

<sup>26</sup> Awo oPeetero n'amwiramu ati, "Ku bantu abatali babyaliranwa."

OYesu n'amukoba ati, "N'olwekyo abantu baabwe ababyaliranwa tibateekwa okuwa omusolo."

<sup>27</sup> Neye okutabanyiigisya, oyabe olobe omu nyanza. Onyanyi uguwasooka okupapalya, wamwasamya omunwa, era wayajiryamu ogundusu gw'efeeza. Wagutwala n'ogubawa, okusasulira nze na iwe omusolo."

## 18

### *Naani akira ekitiisya?*

*(Mak 9:33-37; Luk 9:46-48)*

<sup>1</sup> Omu kiseera ekyo, abeegi baabire e giri oYesu, ni bamubuulya bati, "Naani akira ekitiisya omu bwakabaka bw'omwigulu?"

<sup>2</sup> Kale awo oYesu n'ayeta omwana omuto-muto, kaisi n'amukoba okwemerera omumaiso gaabwe.

<sup>3</sup> Awo n'abakoba ati, "Mbakobera amazima nti, okutoolaku nga mucuukire ni mwewombeeka ng'abaana abatobato, neye nga bbe timwalingira naire omu bwakabaka bw'omwigulu."

<sup>4</sup> Kale n'olwekyo nabuli muntu eyewombeeka ooti mwana onu, niye akira ekitiisya omu bwakabaka bw'omwigulu."

<sup>5</sup> OYesu ni yeeyongera ati, "Era nabuli asangaalira omwana ooti yoonu okulwange, abba asangaaliire ninze."

6 Neye singa omuntu yenayena azweraku omoiza oku batobato abo abanjikiririyamu okukola ekibbikibbi, ekikirira kimo kusiba muntu oyo ibbaale erizito omu mamiro, ni bamudyaka omu lwabi lw'enyanza.”

*Ebitendera abantu okukola ekibbikibbi*  
(Mak 9:42-48; Luk 17:1-2)

7 Awo oYesu ni yeeyongera okutumula n'abeegibe ati, “Wobe! Ala abantu b'oku kyalo nga balabire! Ekyo kityo olw'ebintu ebitendera abantu okukola ekibbikibbi. Kaisi nago era ebintu ebyo biteekwa kubbaawo, neye wobe! Ala omuntu oyo abireeta, ng'alabire!”

8 Era ni yeeyongera ati, “Era singa engaloyo ooba ekigerekyo kikuzweraku okukola ekikole ekibbikibbi, okitemeku era okimume eedi. Kikugasa iwe okusuna obwomi obutawaawo ng'oli w'engalo moiza ooba w'ekigere kimo, okukiraku okubba n'engalo eibiri ooba ebigere ebibiri neye oKibbumba n'akusindika omu geyeena omuli omusyo ogutalikira.

9 Era abba ng'eriisolyo niiryo erikuzweraku okukola ekikole ekibbikibbi, olyokolemu era olimume eedi. Kisa okusuna obwomi obutawaawo, ng'oli w'eriiso limo, okukiraku okusigalya amaiso gonagona, neye ni bakumuma omu geyeena omuli omusyo ogutalikira.”

10 Awo oYesu n'abakoba ati, “Mwegendereze okubona muti timubityamu kadi omoiza kwabo abatobato amaiso. Ekyo kityo olw'okubba mbakobera nti omwigulu abamalaika baabwe

abababbeera, bulijo batuukirira oBbaabba aali omwigulu. [

11 Kaisi era n’oMwana wa Muntu yaizire kunoonia n’okulokola baabo ababbaire bagotere].”\*

*Olugero lwa ntaama eyabbaire agotere  
(Luk 15:3-7)*

12 Era awo n’abagerera olugero ati, “Museega mutya? Singa omuntu owaabba n’entaamagye 100, kaisi omoiza n’amugotaku, taleka 99 omu kiriisiryoye, kaisi n’ayaba okunoonia oodi agotere?”

13 Mbakobera amazima nti owamubona, asangaala ino olw’oyo omoiza, okukiraku olwa gidi 99 etigibbaire agotere.

14 Kale omu ngeri enanyere eyo, n’oTewaanywe aali omwigulu yena tataka okusindika waire omoiza kwabo abatobato omu geyeena.”

*Omwinawo owakukola ekikulimirirya*

15 Awo oYesu ni yeeyongera okwegesya abeegibe ati, “Singa omwinawo owakukola ekikulimirirya, oyabe egyali omukobere ekisobyokye nga muli babiri mwenkani. Singa owakuwulisisya n’aikirirya ekisobyokye, olwo obba oiriryewo enkolagana n’omwinawo oyo.

16 Neye singa owaagaana okukuwulisisya, okangeyo egyali n’omwinawo ogondi ooba abandi babiri. Ekyo kityo olw’okubba eKiwandiike kikoba kiti buli nsonga baabbanga

---

\* **18:11 18:11** EBiwandiike ebimo eby’eira bibulamu olunyiriri lunu. **18:11 18:11** Luk 19:10 **18:15 18:15** Luk 17:3



n’okugikakasa n’obujulizi bw’abantu babiri ooba basatu.

<sup>17</sup> Era singa agaana bona okubawulisisya, okobere ekanisa. Era singa agaana okuwulisisya n’ekanisa, awo ng’omubitya ng’owewankubitye omuntu atali mwikirirya ooba ng’omusolooji wa musolo inywe abemweta abakola ebibbibbi.”

<sup>18</sup> OYesu ni yeeyongera ati, “Mbakobera amazima nti kyonakyona ekimwagaananga oku kyalo oKibbumba yena omwigulu yaabbanga akigaine, era kyonakyona ekimwaikiriryanga oku kyalo oKibbumba yena omwigulu yaabbanga aikiriryeye ati kibbeewo.”

<sup>19</sup> Era oYesu ni yeeyongera ati, “Era tete ekindi, mbakobera nti singa ababiri kwinywe oku kyalo owemwaikirizagananga ni mubbaaku n’ekimusaba, oBbaabba aali omwigulu yakibakoleranga.

<sup>20</sup> Ekyo kityo olw’okubba kadi babiri ooba basatu owebabba bakumbaine okulwange, zena mbaawo aamo nabo.”

### *Olugero lw’omukungu atali ow’ekisa*

<sup>21</sup> Awo oPeetero n’aigerera egiri oYesu, n’amubuulya ati, “Musengwa, emirundi mimeka omuntu omunange egiyankolanga ebindumirirya era nga mmusoniya? Mmusoniyenge emirundi egyera musanvu?”

22 OYesu n'amwiramu ati, "Nkukoba nti emirundi timusanvu, neye 70 emirundi musanvu.†

23 Kagira obwakabaka bw'omwigulu tubu-faananiaku n'okabaka eyatakire okutegeera empiiya egiyabbaire abanza abakungube.

24 Oweyabbaire ng'atandiika okukebera ebitabo, ni bamuleetera omoiza oku bakungube ogwabanza etalanta‡ 10,000.

25 Neye tiyabbaire n'empiiya okusasula eibbanja. Kale omusengwawe n'alagira okumutundamu, n'omukaliwe, n'abaanabe, n'ebintubye byonabyona, okusasula eibbanja eeryo.

26 Awo omukungu oyo n'agwa oku mazwi omumaisoge, n'amwegairira ati, 'Onguminkirizeku era nakusasula gyonagyona.'

27 Kale omusengwawe n'aira n'amukwatira ekisa, n'amusoniya eibbanja eeryo, era n'amuteera."

28 OYesu ni yeeyongera n'olugero ati, "Neye omukungu oyo oweyazwire awo, n'ayajirya omoiza oku bakungu abainaye ogwabanza edinaali 100. Awo n'amugwa omu mamiro nga waakoba ati, 'Onsasule edinaali gyange mangu!'

29 Kale omwinaye oyo oluzwanyuma n'amwegairira ng'agwire oku mazwi omumaisoge ati, 'Onguminkirizeku era nakusasula.'

30 Neye iye n'agaana okumusoniya, era n'ayaba n'amuteeka omu mabbuusuu paka

---

† 18:22 18:22 Ooba, 77. 18:22 18:22 Nta 4:24 ‡ 18:24 18:24 *Etalanta* emoiza, omupakasi yagikolereranga emyanka ooti ikumi na mitaanu. Kale etalanta 10,000, gyabbaire empiiya mpitiriri!

ng'amalire okumusasula eibbanja.

<sup>31</sup> “Awo abakungu abainaye owebaboine ebibbairewo, ni kibaluma ino, ni baaba ni bakobera omusengwa waabwe byonabyona ebibbairewo.

<sup>32</sup> Kale awo omusengwawe n'amweta, n'amukoba ati, ‘Mukungu iwe omubbimubbi, nkusonyire eibbanja lyonalyona olw'okubba onegairiire.

<sup>33</sup> Obbaire nga toyezya okukwatira omwinawo ekisa, nga nze ekinkukwatiire?’

<sup>34</sup> Atyo omusengwawe n'anyiiga ino, n'amukwatisya abaisirikale abakuumi b'amabbuusu bamugadye, era paka ng'amalire okusasula eibbanja lyonalyona.”

<sup>35</sup> OYesu n'amaliirirya ati, “OBbaabba aali omwigulu atyo yena weyalikola buli moiza kwinywe, singa buli muntu omu mwoyogwe tasoniya omwinaye.”

## 19

*OYesu ayegesya oku kwawukana omu bufumbo  
(Mak 10:1-12)*

<sup>1</sup> Awo oYesu oweyamalire okutumula ebibono ebyo, n'azwa e Galiraaya n'ayaba n'abeegibe omu kitundu eky'e Buyudaaya, oku lubba ludi olw'omwiga oYoludaani.

<sup>2</sup> Era ekiyindi ky'abantu kinene ni kimusengererya, era n'alama abalwaire ababbairimu.

<sup>3</sup> Era eeyo abamo oku Bafalisaayo baabire egiri oYesu okumukema ni bamubuulya bati, “Ama-teeka gaikirirya omusaiza okubbinga omukaliwe olwa buli nsonga yonayona?”

<sup>4</sup> Neye oYesu n'abairamu ati, "Timusomangaku eKiwandiike ekikoba kiti okuzwera nakimo oku ntandiika oweyabbumbiire ekyalo, oKibbumba 'yabbumbire omusaiza n'omukali.'

<sup>5</sup> Era n'akoba ati, 'Kagira omusaiza yalekanga oiteeye n'omaaye n'abba n'omukaliwe, era ni basuuka muntu moiza?'

<sup>6</sup> Olwo nga tibakaali bali babiri, neye nga bali muntu moiza. Kale oKibbumba ekiyagaitire aamo, omuntu takigaitululanga."

<sup>7</sup> Awo aBafalisaayo ni bamubuulya bati, "Kale lwaki oMusa yalagiire ati omusaiza awenge omukaliwe ekiwandiiko ekikakasa kiti abbingire omukaliwe, olwo kaisi ni baawukana?"

<sup>8</sup> OYesu n'abairamu ati, "Olw'obukakanyali bw'emyoyo gy'abantu, oMusa kiyazwireku abaikiriry e okubbinganga abakali baabwe. Neye okuzwera nakimo owebabbumbiire ekyalo, tikyabbaire kityo.

<sup>9</sup> Era mbakobera nti buli abbinga omukaliwe okutoolaku ng'amubbingire lwa bulendi, kaisi n'aleeta omukali ogondi, abba abbengere ogw'obulendi."

<sup>10</sup> Awo abeegibe ni bamukoba bati, "Owekibba nga kiri kityo aakati w'omusaiza n'omukaliwe, ekikira kutafumbirwa."

<sup>11</sup> Neye oYesu n'abairamu ati, "Tibuli muntu nti aikirirya enjegesya eyo, okutoolaku abo ibo oKibbumba abaabba ayezyesyerye.

<sup>12</sup> Ekyo kityo olw'okubba waliwo ababba ooti balaawe, ibo nga bababyaire nga batyo. Kaisi

ni wabbaawo ibo abandi abebalaawire-bulaawi. Era ni wabbaawo n'abandi ibo nga basalirewo ni babba bawuulu olw'okutaka kweweerayo nakimo mu kuweererya Kibbumba. Iye oyo ayezya okwikirirya ekyo ekikwata oku bufumbo, akiikirirye."

*OYesu awa abaana abatobato enkabi  
(Mak 10:13-16; Luk 18:15-17)*

<sup>13</sup> Era wabbairero abantu abatwaire abaana abatobato egiri oYesu okubateekaku engalo abasabire enkabi. Neye abeegi ni babaloberya nga babakaawuukira.

<sup>14</sup> Neye oYesu n'akoba ati, "Muleke abaana abatobato baize egyendi, timwabaloberya, olw'okubba abali ooti baabo, niibo ababba omu bwakabaka bw'omwigulu."

<sup>15</sup> Era oweyamalire okubateekaku engalo okubasabira enkabi, n'azwa omu kifo ekyo.

*OYesu n'omusaiza omusuni  
(Mak 10:17-31; Luk 18:18-30)*

<sup>16</sup> Lumo wabbairero omusaiza eyaabire egiri oYesu, n'amubuulya ati, "Musomesya, kintuki ekisa ekinteeekwa okukola, okusuna obwomi obutawaawo?"

<sup>17</sup> Awo oYesu n'amwiramu ati, "Lwaki omubuulya ebikwata oku kintu ekisa? OKibbumba yenkani niiye omusa. Kale owoobba ng'otaka okusuna obwomi, okwate ebiragiroye."

<sup>18</sup> Era omusaiza nago n'amubuulya ati, "Biragiroye?" Awo oYesu n'amwiramu ati, "Tiwaitanga muntu, tiwayendanga, tiwaibbanga, tiwasibiriranga oku muntu,

<sup>19</sup> oiteewo n’omaawo obawenge ekitiisya. Era otakenge omuntu omwinawo, ng’oweweetaka iwe onyere.”

<sup>20</sup> Awo omusaiza nago n’akoba oYesu ati, “Ebyo byonabyona nabituuukiriirye. Niki ekindi ekinee-taaga okukola?”

<sup>21</sup> OYesu n’amukoba ati, “Obanga otaka okubba atuukiriire, oyabe otunde ebibyo byonabyona, era empiiya egyazwamu ogigabire abadoobi, kaisi oize otambulenge na nze, awo walisuna obusuni omwigulu.”

<sup>22</sup> Omusaiza nago oweyawuliire ebibono ebyo, n’ayaba nga muyungubali olw’okubba yabbaire n’ebyobusuni bingi.

<sup>23</sup> Awo oYesu n’akoba abeegibe ati, “Mbakobera amazima nti nga kigosi omusuni okwingira omu bwakabaka bw’omwigulu!

<sup>24</sup> Era mbakobera nti kyanguku okisolo omunene ooti ngamira okubita omu kawundu k’empisyo, okukiraku omusuni okwingira omu bwakabaka bwa Kibbumba.”

<sup>25</sup> Abeegi owebawuliire ekyo, ni bawuninkirira ino, ni bamubuulya bati, “Olwo naani ayezya okulokoka?”

<sup>26</sup> OYesu n’abalingirira kaisi n’abakoba ati, “Ekyo abantu tibakyezya, neye oKibbumba iye ayezya byonabyona.”

<sup>27</sup> Awo oPeetero n’akoba oYesu ati, “Musengwa, aale obone iswe twalekere ebyaiswe byonabyona kaisi tutambulenge na iwe. Olwo twalisuna niki?”

<sup>28</sup> OYesu n’abakoba ati, “Mbakobera amazima nti oMwana wa Muntu oweyalityama oku ntebeye ey’ekitiisya, ng’oKibbumba amalire okwirya buli kintu buyaaka, nywena abatambula na nze, mwalityama oku ntebe egy’obufugi eikumi na ibiri, ni musalira ebika eikumi na bibiri ebya Isirairi emisango.

<sup>29</sup> Era buli muntu eyalekere ekisitokye ooba abagandabe, ooba aboonyokobe ooba oiteeye ooba omaaye ooba abaanabe, ooba ebigonabye okulwange, yalisuna emirundi 100, ni bamuwa n’obwomi obutawaawo.

<sup>30</sup> Neye bangi kwabo ab’ekitiisya omu kiseera kinu abalibba aba bulijo, era bangi kwabo aba bulijo omu kiseera kinu, abalibba ab’ekitiisya.”

## 20

### *Abapakasi b’omu musiri gw’emizabbibbu*

<sup>1</sup> Awo oYesu ni yeeyongera okugerera abeegibe olugero ati, “Obwakabaka bw’omwigulu tubufaananiaku n’omuntu onyere omusiri gw’emizabbibbu, eyabwine okunoonia abapakasi ab’okukola omu musirigwe.

<sup>2</sup> Era oweyamalire okubasuna n’okwikirizagana nabo okusasula buli muntu edinaali moiza olunaku, n’abasindika okukola omu musirigwe ogw’emizabbibbu.

<sup>3</sup> Era n’ayaba oku saawa ooti isatu omu katale, n’ayajiryayo abasaiza nga beemereire era nga mpaawo ekibakola.

<sup>4</sup> Kale n'abakoba ati, 'Inywe nywena mwabe mukole omu musiri gwange ogw'emizabbibbu, era nabasasula kusani.'

<sup>5</sup> Kale bona ni baaba era ni batandiika okukola. Era tete n'ayaba omu katale oku saawa ooti mukaaga, n'oku saawa ooti mwenda, ng'ayajiryayo abapakasi era ng'abasindika okukola omu musirigwe.

<sup>6</sup> Era n'oku saawa ooti ikumi na moiza n'ayaba omu katale, n'ayajiryayo abandi nga beemereire, n'ababuulya ati, 'Lwaki mwemereire aanu olunaku lwonawona nga mpaawo ekimukola?'

<sup>7</sup> "Awo ibo ni bamwiramu bati, 'Ekyo kityo olw'okubba mpaawo atuwaire ekipakasi.' Kale iye n'abakoba ati, 'Kale nywena mwabe mukole omu musiri gwange ogw'emizabbibbu.' "

<sup>8</sup> Awo oYesu ni yeeyongera ati, "Eigulo esaawa egyokwinukiramu owegyatuukire, onyere omusiri n'akoba onyampalawe ati, 'Oyete abapakasi, era obasasule empeera yaabwe, ng'otandiikira kwabo abasembereyo okwiza okukola, kaisi osembyeyo abasookere oku mulimo.'

<sup>9</sup> Era badi abatandiikire okukola oku saawa eikumi na moiza buli muntu n'asuna edinaali moiza moiza.

<sup>10</sup> Kale awo abasookere oku mulimo owebaabire okubasasula, ni basuubira okusuna kineneku. Neye era bona ni basuna edinaali moiza moiza buli muntu.

<sup>11</sup> Era owebagisunire, ni batandiika okwezulugumira onyere omusiri,



<sup>12</sup> bati, ‘Badi ibo abaizire oluzwanyuma batambire okumala esaawa moiza yonkani, kaisi dala n’obasasula kyenkanyi na iswe abatambire olunaku lwonalwona, nga tukaanya n’eisana!’

<sup>13</sup> “Neye onyere omusiri n’airamu omoiza kwibo ati, ‘Munange, tindi kukubitya kubibikubbi. Aale nandi n’oikirirya okukolera edinaali moiza olunaku?’

<sup>14</sup> Kale okwate empeerayo, era oyabe. Era kutaka kwange nze okusasula n’aizire oluzwanyuma yena kyenkanyi na iwe.

<sup>15</sup> Olwo tindi w’eidembe okukolesya empiya gyange ng’owentaka? Ooba ogongera olw’okubba mpaire badi ababbaire bankaiza kyenkanyi na inywe omwizire eira?’ ”

<sup>16</sup> Awo oYesu n’amaliirirya ati, “Kale n’omu ngeri enanyere eyo ab’ekitiisya omu kiseera kinu balibba babulijo, era bangi kwabo aba bulijo omu kiseera kinu, abalibba ab’ekitiisya.”

*OYesu tete atumula oku kufaakwe*

*(Mak 10:32-34; Luk 18:31-34)*

<sup>17</sup> Awo oYesu oweyabbaire ng’ayaba e Yerusaalemi n’abeegibe, n’airya abeegibe eikumi na babiri oku mbale, n’abakoba ati,

<sup>18</sup> “Tuli kwaba e Yerusaalemi, era eeyo oMwana wa Muntu baaba okumulyamu olukwe bamuweeyo eeri abakabona abakulu, n’abakugu omu by’aMateeka ga Musa. Era baaba okumusalira ogw’okufa,

<sup>19</sup> kaisi bamuweeyo eeri aBatali Bayudaaya okumujerega, n’okumufaamuulira efaalu

egiriku emirobo egisima, n’okumukomerera oku musalabba. Neye oluzwanyuma lw’enaku ibiri, oku lwokusatu yalizuukira.”

*Okusaba kw’omukali omubyaire  
(Mak 10:35-45)*

<sup>20</sup> Awo oluzwanyuma lw’ekyo omuka Zebedaaayo n’ayaba n’abataanebe ababiri egiri oYesu, n’akoma amazwi, n’amusaba amukwatire ekisa.

<sup>21</sup> Awo oYesu n’amubuulya ati, “Niki ekyotaka?” Iye n’amwiramumu ati, “Osuubize oti abataane bange banu balityama nga bakuliraine ng’oli omu bwakabakabwo, omoiza oku lubbaalwo olw’engalo endiuro, kaisi ogondi oku lw’engooda nga bafugira aamo na iwe.”

<sup>22</sup> Neye oYesu n’akoba abaganda abo ati, “Ekimusaba timukimaite. Mwezya okunywa oku kipimo kyokugada ekinjaba okunywa?” Ni bamwiramumu bati, “Twezya.”

<sup>23</sup> OYesu n’abakoba ati, “Ekipimo kyange ekyokugada dala mwalikinywaku. Neye eky’okutyama nga mundiraine oku lubba lwange olw’engalo endiuro ooba engooda, tininze nsalawo, neye oBbaabba yaliligabira baabo abeyakitegekeire.”

<sup>24</sup> Awo abeege badi eikumi owebawuliire abaganda abo ekibasaba, ni banyiga olw’abaganda nago.

<sup>25</sup> Kale oYesu n’abeeta bonabona aamo, kaisi n’abakoba ati, “Mumaite muti abafugi b’abo aBatali Bayudaaya bataka kubaweererya.

Era abakungu baabwe abakulu bataka abantu abebafuga babamanye bati babaliku obwezye.

<sup>26</sup> Neye mwinywe, tiniikyo owekiri n'okubba. Wazira mwinywe, buli ataka okubba omukulu, atekwa kubba muweererya w'abainaye.

<sup>27</sup> Era buli ataka okubba omukulu wa bainaye, ali n'okubba muweererya w'abainaye.

<sup>28</sup> Era n'oMwana wa Muntu, tiyaizire bamuweererye, neye kuweererya, era n'okuwaayo obwomibwe, ng'omugaito okununula abangi."

*OYesu alamyabo ofu ababiri*  
(Mak 10:46-52; Luk 18:35-43)

<sup>29</sup> Awo oYesu n'abeegibe owebabbairi nga bazwa e Yeriko, ekiyindi ky'abantu ekinene ni kibasengererya.

<sup>30</sup> Atyanu wabbairi abo ofu babiri nga batyame oku nzira. Owebawuliire bati oYesu abita, ni batandiika okutumula maaminkirira bati, "Musengwa, iwe oKurisito oMwizukulu wa kabaka oDawudi, otukwatire ekisa!"

<sup>31</sup> Awo abantu ni babakaawuukira nga babakoba basirike. Neye ibo ni beeyongerabwonyongereri kwaminkirira bati, "Musengwa, iwe oKurisito oMwizukulu wa kabaka oDawudi, otukwatire ekisa!"

<sup>32</sup> Kale oYesu n'ayemerera n'ayeta abo ofu abo, n'ababuulya ati, "Mutaka mbakolere niki?"

<sup>33</sup> Ibo ni bamwiramumu bati, "Musengwa, otulamyemo amaiso gaiswe gabone."

<sup>34</sup> Era oYesu n'abakwatira ekisa, n'akwata oku maiso gaabwe. Amangu ago amaiso gaabwe ni galama, era ni beeyabira naye.

## 21

*OYesu bamwaniriza omu kitiisya eky'amaani  
(Mak 11:1-11; Luk 19:28-40; Yok 12:12-19)*

<sup>1</sup> Awo oYesu n'abeegibe owebabbaire batira okutuuka omu kibuga e Yerusaalemi, era nga baigereire e Bbesufaage ekiri oku lusozi olubeeta oLusozi olw'eMisaale eMizaituuni, oYesu n'atuma babiri oku beegibe,

<sup>2</sup> ng'abakoba ati, "Mwabe omu kitundu ekyo ekiri omumaiso awo, era owemwabba mwankwingira muti, mwabona ompunda ogubasibire ng'ali n'omwanawe. Mugiteere era mugindeetere.

<sup>3</sup> Owewabbaawo abakobaku, mwamwiramumu muti oMusengwa niye agyetaaga, era amangu ago yabaikirirya ni mugireeta."

<sup>4</sup> Ekyo kyabbairewo kutuukirirya Musengwa iye oKibumba ekiyatumwire ng'abitira omu naabbi ekikoba kiti:

<sup>5</sup> "Mukobere abantu b'e Sayuuni muti:

'Aale mubone, okabaka waanywe aiza egimuli.

Muwombeeki, era aiza ng'atyaimu oku mpunda, ekikoba nti aiza ng'ali oku mpunda omuto-muto.' "

<sup>6</sup> Kale abeegi abo ababiri ni baaba, ni bakola ng'oYesu oweyabalagiire.

<sup>7</sup> Era ni baleeta ompunda n'omwanawe, ni bagiteekaku ebizibaawo byabwe, era oYesu n'atyama oku mwana wa mpunda.

<sup>8</sup> Era ekiziima ky'abantu ni kyala omu nzira ebizwalo byabwe, era abandi ni batema bikoola oku misaale, ni baala omu nzira.

<sup>9</sup> Awo ebiyindi by'abantu ebyabbaire bimwekubbembeire, n'ebindi nga bimuzwaku e nyuma, ni baaba nga baaminkirira bati,

“Tuwuuje oKurisito oMwizukulu wa Dawudi!

W'enkabi iye oyo aiza omu liina lya Musengwa iye oKibbumba!

Tumuuuje oMusengwa aali omwigulu!”

<sup>10</sup> Awo oYesu oweyatuukire omu Yersaalemi, abantu bonabona ni bawuninkirira. Era ni babuulya bati, “Naani oyo?”

<sup>11</sup> Ni babairamu bati, “Onu niiye oYesu, oNaabbi ow'e Naazaleesi eky'e Galiraaya.”

*OYesu abbinga abatundira omu luuga lw'eYeekaalu*

*(Mak 11:15-19; Luk 19:45-48; Yok 2:13-22)*

<sup>12</sup> Awo oYesu n'aingira omu luuga lw'eYeekaalu, n'abbingamu abo bonabona ababbaire batundiramu, era n'ababbaire baguliramu ebintu. N'agangulyaga amamenza g'abawanyisya empiiya, n'ebityamo eby'ababbaire batundiramu enjiiwa.

<sup>13</sup> Era n'abakoba ati, “Bakiwandiikire bati, 'Enyumba yange yaabbanga nyumba ya kus-abiramu.' Neye inywe mugisuucirye mpuku y'abanyagi omu beebisa.”

14 Awo oluzwanyuma aboofu n’abaleme bangi ni baaba egiri oYesu omu luuga lw’eYeekaalu, era n’abalama.

15 Neye abakabona abakulu n’abakugu omu by’aMateeka ga Musa owebaboine ebyewunyo ebiyakolere, era ni bawulira abaana nga baaminkirira omu luuga lw’eYeekaalu, bati, “Tumuwuje oMwizukulu wa kabaka oDawudi,” ni banyiga.

16 Kale ni bakoba oYesu bati, “Owulira abaana abo ebibakoba?”

Awo oYesu n’abairamu ati, “Niikyo ekyo. Neye timusomangaku eKiwandiike ekikoba kiti, ‘Wayegeserye abaana abatobato n’ebibbuuta okukuwuja kusani!’ ”

17 Awo n’abaleka era n’azwa omu kibuga e Yerusaalemi, n’ayaba n’abeegibe okugona e Bbesaniya.

*OYesu alaama omusaale omutiini*

*(Mak 11:12-14,20-24)*

18 Awo oku lunaku olwairireku, amakeezi oYesu n’abeegibe owebabbair bakanga omu kibuga e Yerusaalemi, oYesu enzala n’emuluma.

19 Era awo n’alengera omusaale omutiini oku nzira. N’ayaba n’agutuukaku, neye nandi n’ayajiryaku kineneka kadi kimo okutoolaku ebikoola byonkani. Awo n’agukoba ati, “Toirangayo okuneneka emirembe gyonagyona!” Era amangu ago omutiini ni gutandiika okukala.

20 Era abeegi owebaboine ekyo, ni beewunya era ni babuulya bati, “Omusaale omutiini gukalire gutya amangu ago?”

<sup>21</sup> Awo oYesu n'abairamu ati, "Mbakobera amazima nti singa mubba n'okwikirirya omu Kibbumba era nga timubuusabuusa, mwezya okukola ekinkolere oku mutiini ogwo. Era tiniikyo ekyo kyonkani, neye mwezya n'okukoba olusozi lunu muti, 'Weeginge oyabe weemume omu nyanza,' era ni kituukirira.

<sup>22</sup> Era singa mwabbanga n'okwikirirya, buli ekimwasabanga oKibbumba mwakisunanga."

*OYesu bamubuulya oku bwezyebwe*

*(Mak 11:27-33; Luk 20:1-8)*

<sup>23</sup> Awo oYesu oweyakangire omu luuga lw'eYeekaalu, abakabona abakulu, n'abantu abakulu omwigwanga, ni baaba egyali ng'ayegesya, ni bamubuulya bati, "Oli n'obwezyeki okukola ebintu ebyo ebyokola? Era naani eyakuwaire obwezye obwo?"

<sup>24</sup> Neye oYesu n'abairamu ati, "Zena oleke mbabuulye ekibuulyo kimo. Era singa mwanjiramu, zena nabakobera egintoola obwezye okukola ebintu binu.

<sup>25</sup> Naani eyatumire oYokaana okubatiza, Kibbumba ooba bantu?"

Awo ni beegeyamu bati, "Singa tumwiramu tuti, Kibbumba niye eyatumire, ayaba okutubuulya ati, 'Kaisi lwaki oYokaana iye timwamwikiririye mu?'"

<sup>26</sup> Neye singa tumwiramu tuti, abantu ni-ibo abamutumire, tutya abantu olw'okubba bonabona baikirirya dala bati oYokaana yabaire naabbi."

<sup>27</sup> Kale ni bairamu oYesu bati, "Titumaite."

Awo oYesu yena n'abakoba ati, "Aale zena tinabakobere obwezye obundinabwo okukola ebintu binu."

### *Olugero lw'abaganda ababiri abaisuka*

<sup>28</sup> Awo oYesu n'akoba abakabona abakulu n'abantu abakulu omwigwanga ati, "Neye museega mutya ku kinu? Wabbairewo omusaiza eyabbaire n'abataanebe babiri. Era lumo n'akoba omukulu waaku ati, 'Mwana wange, olwatyanu oyabe okole omu musiri gw'emizabbibbu.'

<sup>29</sup> Neye iye n'amwiramu ati, 'Tinaabe bbe.' Neye oluzwanyuma n'acuusa enseegaye, n'ayaba n'akola.

<sup>30</sup> Era oiteeye w'abaana abo n'akoba n'omutomuto waaku ekintu ekinyere ekyo. Oyo iye n'amwiramu ati, 'Bbaabba oleke njabe.' Neye nandi n'ayaba okukola ekyamukobere."

<sup>31</sup> Kale oYesu n'abuulya abakabona abakulu n'abantu abakulu omwigwanga ati, "Naani oku baana abo ababiri eyakolere oitewaabwe ekiyatakire?" Ni bairamu bati, "Omukulu waaku."

Awo oYesu n'abakobera ekyategeeza ati, "Mbakobera amazima nti abasooloji ba musolo n'abamalaaya baaba okwingira omu obwakabaka bwa Kibumba okukiraku inywe,

<sup>32</sup> olw'okubba oYokaana oMubatizi yaizire egimuli, n'abalaga enzira entuuce, nandi ni mumwikiririyamu. Neye abasooloji ba musolo n'abamalaaya, ibo ni bamwikiririyamu. Era ekyo n'owemwakiboine, mwagaine



okumwikiririryamu n’okwenenya ebikole byanywe ebibbibbi.”

*Olugero lw’abapangisya b’omusiri  
(Mak 12:1-12; Luk 20:9-19)*

<sup>33</sup> OYesu ni yeeyongera ati, “Muwulire olugero olundi. Wabbairewo omuntu eyabbaire n’ekigona, n’akomamu omusiri gw’emizabbibbu. N’agusitaku olukita, n’akuulamu ekikunyiro, n’ayombekamu omunaala nga kuliku n’akasiisira abakuumi omubalengerera. Olwo n’aguteekamu abapangisya, era n’azwawo n’ayaba omu lugendo.

<sup>34</sup> Awo ekiseera eky’amakungula owekyabbaire kituukire, n’atuma abagalamabe eeri abapangisya, bamuweeku omugabogwe oku bineneka by’omusiri gw’emizabbibbu.

<sup>35</sup> Neye abapangisya ni bakwata abagalamabe, ni bakubba omoiza, ogondi ni bamwita, n’ogondi ni bamukasuurira amabbaale.

<sup>36</sup> Oluzwanyuma lw’ekyo n’abasindikira tete abagalama abandi bangi okukiraku abasookere. Era ni bababitya mu ngeri nanyere eyo.

<sup>37</sup> Awo oluzwanyuma lw’ebyo byonabyona n’abatamira omutaanewe ng’akoba ati, ‘Omutaane wange bamuwa iye ekitiisya.’

<sup>38</sup> Neye abapangisya owebaboine omutaane nago, ni beegeyamu bati, ‘Onu niiye omusika! Oleke tumwite, era tutwale ebyobusikabwe.’

39 Kale ni bamukwata, ni bamutoola omu musiri gw'emizabbibbu ogwo ni bamutwala ni bamwita."

40 Awo oYesu n'ababuulya ati, "Kale awo onanyere omusiri ogwo oweyaliira, museega muti yalikola niki abapangisya abo?"

41 Ibo ni bamwiramumu bati, "Yaliita abasaiza ababbibabbi abo bundi, era n'omusiri ogwo n'agupangisya abandi ibo abamuwanga omugabogwe oku bineneka buli makungula."

42 Awo oYesu n'ababuulya ati, "Timukisoman-gaku omu Biwandiike ekiti?

'Eibbaale abombeki eribagaine,  
lisuukire niiryero erikulu erisiba ensonda.  
Ekya oMusengwa niye eyakikolere,  
ni tukibona, ni tukyewunya.' "

43 Era oYesu ni yeeyongera ati, "N'olwekyo mbakobera nti obwakabaka bwa Kibumba balibabutoolaku inywe aBayudaaya, ni babugabira abantu abalikola ebikole ebisa. [

44 Era nabuli muntu agaana enjegasya yange ali ooti muntu agwa okwibbaale eeryo, n'avunikavunika, era ali ooti yooyo oguligwaku ni limususungula]."\*

45 Awo abakabona abakulu n'aBafalisaayo owebawuliire olugero olwo, ni bategeera bati abbaire atumula ku niibo.

46 Kale ni bagezyaku okumukwata, neye ni batya ekiziima ky'abantu olw'okubba ibo abantu babbaire bamaite oYesu ng'onaabbi.

---

21:42 21:42 Zab 118:22-23 \* 21:44 21:44 EBiwandiike ebimo eby'eira bibulamu olunyiriri lunu. 21:44 21:44 Luk 20:18

## 22

### *Olugero lw'embaga ey'obugole* (Luk 14:15-24)

<sup>1</sup> Awo oYesu ni yeeyongera tete okutumula n'abeekubbemberi b'aBayudaaya ng'akolesya ngero, n'akoba ati,

<sup>2</sup> "Obwakabaka bw'omwigulu tubufaananiaku n'okabaka eyategekeire omutaanewe embaga y'obugole.

<sup>3</sup> Awo esaawa y'embaga oweyatuukire n'atuma abagalamabe okukoba abagenibe abeete baabe oku mbaga. Neye abageni ni bagaan okwaba.

<sup>4</sup> "Kale n'atuma abagalama abandi okubakoba bati, 'Bamalire okutegeka embaga era n'okusala ente endaawo, n'ente egindi ensava n'okutegeka nabuli kimo. Kale mwize twabe oku mbaga.'

<sup>5</sup> Neye abageni abeete kadi kubafaaku era n'abamo ni beeyabira mubyabwe. Era abandi ni beeyabira mu misiri gyabwe, n'abandi mu bisuubuuzi byabwe.

<sup>6</sup> Era n'abasigairewo ni bakwata abagalamabe ni bababitya kubbikubbi, era ni babaita."

<sup>7</sup> OYesu ni yeeyongera ati, "Awo okabaka n'anyiiga, kale n'asindika abaisirikalebe, ni bajigirica abaiti abo, era ni booca ekibuga kyabwe.

<sup>8</sup> Awo n'akoba abagalamabe abandi ati, 'Embaga y'obugole bamalire okugitegeka neye abo abembaire njeterere tibasaanira.

<sup>9</sup> Kale mwabe omu mansanganzira g'enguudo gy'omu kibuga, era mwanirize ogumwajirya yenayena aize oku mbaga.'

<sup>10</sup> Era abagalama abo ni baaba omu nguudo gy'omu kibuga, ni baaniriza bonabona abebaaji-irye, abasa n'ababbibabbi, era ekisenge omwabaire embaga ni kiizula abageni.

<sup>11</sup> “Neye okabaka oweyaingiire okubona abageni abaizire, n'abonamu omusaiza atazwaire ebizwalo ebisa ebiwoomera okuzwala oku mbaga y'obugole.

<sup>12</sup> Kale okabaka n'amukoba ati, 'Munange, oingiire otya munu nga tozwaire ebizwalo ebisa?' Neye omusaiza oyo yabbaire abula ekyokwiramamu.

<sup>13</sup> Awo okabaka n'akoba abaweereryabe ati, 'Mumusibe engalo n'ebigere, era mumumume e nza omu ndikiirya, eeyo egibakungira n'okunjiya amaino olw'obulumu.' ”

<sup>14</sup> Era oYesu n'amaliirirya ati, “OKibbumba abantu bangi abaayeta okwingira omu bwak-abakabwe, neye alondamu batono.”

*Ebifa oku kuwa omusolo*

*(Mak 12:13-17; Luk 20:20-26)*

<sup>15</sup> Oluzwanyuma lw'ebyo abamo oku Bafalisaayo ni baaba, ni bateesa oku ngeri egibakwatisyamu oYesu omu ntumulaye.

<sup>16</sup> Awo ni bamutumira abamo oku beegi baabwe, n'abamo oku bawagiri ba kabaka oKerode, ni bamukoba bati, “Musomesya, tumaitite tuti iwe oli w'amazima, era abantu obeegesya mazima g'ebyo oKibbumba ebyataka bakole. Era tokolerera bantu kukusiima, olw'okubba bonabona obabitya mu ngeri moiza.

17 Kale atyanu, otukobere, oseega otya? Kitu-uce okuwa oKaisaali omusolo, ooba bbe?”

18 Neye oYesu yabbaire amaite omutego gwabwe, kale n’abakoba ati, “Bananfunsi inywe, lwaki munkema?”

19 Mundeetere ondusu ogubasasula omusolo!”

Kale ni bamuleetera ondusu,

20 kaisi n’ababuulya ati, “Ekifaananyi n’amaliina ebiriku byani?”

21 Ni bamwiramu bati, “Bya Kaisaali.” Awo n’abakoba ati, “Kale atyanu ebya Kaisaali mu-biwe oKaisaali, n’ebya Kibbumba mubiwe oKib-bumba.”

22 Era owebawuliire ebyo, ni beewunya ino. Kale ni bamuleka, era ni baaba.

*Ebifa oku kuzuukira*

*(Mak 12:18-27; Luk 20:27-40)*

23 Oku lunaku olunanyere olwo, abamo oku Basedukaayo, abakoba bati mpaawo kuzuukira, ni baaba egiri oYesu.

24 Awo ni bamubuulya bati, “Musomesya, oMusa yatukobere ati singa omuntu owaafa nga tabyaireku omwana, omuganda w’omufu ali n’okufumbirwa onamwandu oyo, kaisi babyalire omufu nago abaana.

25 Atyanu, wabbairewo abaganda musanvu abetwabbaire tumaite. Era asooka n’aleeta omukali neye n’afa nga tabyaireku omwana. Kale omugandawe n’afumbirwa onamwandu oyo.

<sup>26</sup> Era ekintu ekinyere ekyo niikyo ekyatuukire n'oku wokubiri n'oku wokusatu, paka oku womusanvu.

<sup>27</sup> Oluzwanyuma, omukali yena n'afa.

<sup>28</sup> Atyanu olwo oku lunaku olw'okuzuukira, omukali oyo yalibba waani kwabo omusanvu ngoyo bonabona bamufumbiirweku?"

<sup>29</sup> Awo oYesu n'abairamu ati, "Mugota lw'okutamanya Biwandiike, era n'obwezye bwa Kibbumba.

<sup>30</sup> Kiri kiti abantu owebalizuukira, balibba ooti bamalaika omwigulu, nga tibakaali babba n'obufumbo.

<sup>31</sup> Kaisi ebifa oku kuzuukira, timusomangaku oKibbumba ekiyakobere? Yakobere ati,

<sup>32</sup> 'Ninze oKibbumba wa Ibbulaimu, era wa Isaka, era wa Yaakobbo.' Iye Kibbumba w'abantu ababba aboomi newankubbaire nga bamalire okufa, neye tiwa bantu abasigala omu kufa."

<sup>33</sup> Era ekiziima ky'abantu owekyawuliire ebyo, ni kyewunya enjegyaye.

*Ekiragiro ekikira obukulu*

*(Mak 12:28-34; Luk 10:25-28)*

<sup>34</sup> Awo aBafalisaayo owebawuliire bati oYesu akaisirye aBasedukaayo, ni bakumbaana okuteesa ekibamukoba.

<sup>35</sup> Era omoiza kwibo, omukugu omu by'aMateeka ga Musa, n'amubuulya ng'amukema ati,

<sup>36</sup> "Musomesya, kiragiroke ekikira byonabyona obukulu omu Mateeka ga Musa?"

<sup>37</sup> Awo oYesu n'amwiramumu ati, "Otakenge oMusengwa iye oKibbumbawo n'omwoyogwo gwonagwona, n'obwomibwo bwonabwona, n'ebiseegobyobyonabyona.

<sup>38</sup> Ekyo niikyo ekiragirowo ekisooka, era ekikira obukulu.

<sup>39</sup> Kaisi ekyokubiri kifaanana n'ekyo, era kiti: 'Otakenge omuntu omwinawo, ng'oweweetaka iwe onyere.'

<sup>40</sup> Era oku biragirowo ebyo ebibiri, aMateeka ga Musa gonagona n'eBiwandiike by'abanaabbi kubisinzirira."

*OKurisito n'okabaka oDawudi  
(Mak 12:35-37; Luk 20:41-44)*

<sup>41</sup> Awo aBafalisaayo owebabbaire nga bakaali bakumbaine awo, oYesu n'ababuulya ati,

<sup>42</sup> "Museega mutya oku Kurisito ogubasukireku amafuta? Mwizukulu waani?" Ibo ni bamwiramumu bati, "Mwizukulu wa kabaka oDawudi."

<sup>43</sup> Awo oYesu niyye okubabuulya ati, "Kale olwo lwaki oDawudi onyere, oweyabbaire ng'aizwire oMwoyo oMutukulye, yamweterere Musengwawe? Kiri nti yakobere ati,

<sup>44</sup> 'OMusengwa iye oKibbumba yakobere oMusengwa wange ati:  
Otyame ng'ondiraine oku lubba lwange olw'engalo endirowo,  
paka owenaligondya abalabebo  
ni mbasuuca mukonkolo  
gw'okuwuumuliryaku ebigerebyo.' "

<sup>45</sup> Awo oYesu n'amaliriirya ati, "Kale obanga oDawudi onyere amweta Musengwawe, kaisi tete olwo oKurisito ayezya atya okubba mwizukuluwe?"

<sup>46</sup> Era ni watabbaawo ayezya okumwiramu kadi kibono. Era okuzwa olwo ni watabbaawo muntu ogondi eyagumire n'amubuulya ebibuulyo ebindi.

## 23

*Okwekuuma abakugu omu by'aMateeka n'aBafalisaayo*  
(Mak 12:38-39; Luk 11:43,46; 20:45-46)

<sup>1</sup> Oluzwanyuma lw'ebyo oYesu n'atumula n'ekiziima ky'abantu aamo n'abeegibe,

<sup>2</sup> ati, "Abakugu omu by'aMateeka ga Musa n'aBafalisaayo niibo abali n'obwezye okuvunula aMateeka ga Musa.

<sup>3</sup> Kale byonabyona ebibabakobera mubikwate, era mubikole. Neye timusengereryanga ebikole byabwe, olw'okubba ebibeegesa abantu, tini-ibyo ibo abanyere ebibakola.

<sup>4</sup> Era batiika abantu amateeka amakakaali agatakwatika, neye nga ibo abanyere mpaawo kibakola okubbeera abantu okugakwata.

<sup>5</sup> Era byonabyona ebibakola, bagenderera bantu kubabona. Kagira beesiba oku mpumi ooba oku ngalo obusawo bw'amadiba obugalami obukiraku obw'abandi omubbaamu enyiriri



gy'eBiwandiike.\* Era eganduula gyabwe nga igyo giriku amajwenjwe amanviriri.

<sup>6</sup> Era bataka ebifo eby'ekitiisya oku mbaga, n'ebifo ebikiraku ekitiisya omu makumbaaniro.

<sup>7</sup> Era bataka n'okubasugirya nga babawa ekitiisya omu butale, n'okubeeta bati, 'Musomesya.'

<sup>8</sup> "Neye inywe timwikiriryanga abantu okubeeta bati, 'Musomesya,' olw'okubba oMusomesya waanywe ali moiza. Era inywe nywenanywena muli boluganda.

<sup>9</sup> Era oku kyalo timubbangu n'omuntu ogumuwa ekitiisya nga mumweta 'Itewaanywe,' olw'okubba oItewaanywe omu mwoyo ali moiza, era ali mwigulu.

<sup>10</sup> Era tibabeetanga bati, 'Beegesi,' olw'okubba omwegesi waanywe ali moiza, era niye oKurisito ogubasukireku amafuta.

<sup>11</sup> Kale akira ekitiisya mwinywe, yaabbanga muweererya w'abainaye.

<sup>12</sup> Ekyo kityo olw'okubba omuntu yenayena eyeegulumalya, balimwica. Neye nabuli iye oyo eyeewombeeka, balimugulumalya."

*OYesu azumirira aBafalisaayo n'abakugu omu by'aMateeka*

*(Mak 12:40; Luk 11:39-42,44,52; 20:47)*

<sup>13</sup> Awo oYesu ni yeeyongera okukoba ati, "Wobe! Ala abakugu omu by'aMateeka ga Musa n'aBafalisaayo nga mulabire! Bananfunsi

---

\* **23:5 23:5** Bazwalanga obusawo obwo kulaga bati banadiini ino okukiraku abantu abandi. **23:5 23:5** Kub 15:37-41 **23:5 23:5** Mat 6:1; Kub 15:38; Ama 6:8 **23:11 23:11** Mat 20:26-27; Mak 9:35; 10:43-44; Luk 22:26 **23:12 23:12** Luk 14:11; 18:14

inywe! Ekyo kityo olw'okubba mukaisya abantu okwingira omu bwakabaka bw'omwigulu olw'enjegesya yaanywe ey'obubbeyi. Inywe abananyere omwegesya timwingira, era ni mukaisya n'abo abagezyaku okwingira. [

<sup>14</sup> Wobe! Ala abakugu omu by'aMateeka ga Musa n'aBafalisaayo nga mulabire! Bananfunsi inywe! Ekyo kityo olw'okubba munyaga ebintu byonabyona omu manyumba g'abanamwandu. Era musaba oKibbumba omu bibono ebingi olw'okweraga. N'olwekyo balibawa ekibonerezo ekikiraku obunene].

<sup>15</sup> "Wobe! Ala abakugu omu by'aMateeka ga Musa n'aBafalisaayo nga mulabire! Bananfunsi inywe! Ekyo kityo olw'okubba mutambula nabuli wantu okucusaku omuntu kadi moiza okubba musengereri waanywe. Era owemumala okumucusa era ni mumuleetera okugada eino omu geyeena okukubbisyaumu emirundi mibiri.

<sup>16</sup> "Wobe! Ala nga mulabire inywe abali ooti beekubbemberi aboofu! Mwegesya muti, 'Nabuli alayira ng'akolesya eYeekaalu okukakasa ekirayiro, tabba n'omusango owaatatuukirirya ekyasuubizire. Neye nabuli alayira ng'akolesya ezaabbu omu Yeekaalu okukakasa ekirayiro, atekwa okutuukirirya ekyasuubizire.'

<sup>17</sup> Inywe abasirusiru, era abali ooti bantu aboofu! Ekikira obukulu niikyo ekiriina, zaabbu, ooba Yeekaalu esuuca ezaabbu okubba ntukulye?

<sup>18</sup> Era mwegesya muti, 'Nabuli alayira ng'akolesya ekyoto okukakasa ekirayiro, tabba

n'omusango owaatatuukirirya ekyasuubizire. Neye nabuli alayira ng'akolesya ekirabo ekiri oku kyoto okukakasa ekirayiro, atekwa okutuukirirya ekyasuubizire.'

<sup>19</sup> “Inywe abali ooti bantu aboofu, ekikiraku obukulu niikyo ekiriina, Kirabo, ooba kyoto ekisuuca ekirabo okubba ekitukulye?

<sup>20</sup> Kale atyanu oyo alayira ng'akolesya ekyoto okukakasa ekirayiro, era abba alayiire ng'akolesya n'ebirabo byonabyona ebikiriku.

<sup>21</sup> Era iye oyo alayira ng'akolesya eYeekaalu okukakasa ekirayiro, abba alayiire n'oKibbumba aabbaamu.

<sup>22</sup> Era iye oyo alayira ng'akolesya eigulu okukakasa ekirayiro, era abba alayiire ng'akolesya ntebe ya Kibbumba, n'oKibbumba agityamaku.

<sup>23</sup> “Wobe! Ala abakugu omu by'aMateeka ga Musa n'aBafalisaayo, nga mulabire! Bananfunsi inywe! Ekyo kityo olw'okubba muwa ekimo eky'eikumi n'oku birime ebisembayo obutyai ebimukolesya okuwoomesya ebyokulya. Neye muleka okutuukirirya ebintu ebikira obukulu omu mateeka ng'obwenkanya, n'ekisa, n'obwesigwa. Mwankubbaire nga muwa ekimo ky'eikumi, neye nga timulagajalira ebintu ebindi bidi ebikiraku obukulu.

<sup>24</sup> Inywe abali ooti beekubbemberi aboofu, mwegendereza ino okukola ebintu ebitali bikulu omu Mateeka, neye ni mulagajalira ebintu ebikulu kaisi nandi mukitegeera.

25 “Wobe! Ala abakugu omu by’aMateeka ga Musa n’aBafalisaayo, nga mulabire! Bananfunsi inywe! Ekyo kityo olw’okubba muli ooti bantu abafaayo kunaabyaku ebikopo n’amatiba ku ngulu kwonkani, neye ng’omu ntooma mugagi. Nti inywe mukola ebintu, abantu ni baseega bati muli batuukirirye, aate ng’emyoyo gyanywe giizwire buluvu na inywe okwetakiryanga nywenkani ebisa.

26 Bafalisaayo inywe, aboofu omu myoyo, mu-sooke mucuuke muzwe omu biseego byanywe ebibbibbi kaisi ebimukola n’ebimukoba bibbe bisa.

27 “Wobe! Ala abakugu omu by’aMateeka ga Musa n’aBafalisaayo, nga mulabire! Bananfunsi inywe! Ekyo kityo olw’okubba muli ooti magombe agebasiigireku erangi enjeru. Era gaboneka nga gatukula oku ngulu, neye ng’omu ntooma gaizwire magumba g’abafu, n’obuvundi.

28 Kale n’omu ngeri enanyere eyo na inywe, muboneka ooti bantu abakola ebintu ebyobutuukirirye, neye ng’omu myoyo gyanywe mwizwire bunanfunsi n’ebiseego ebibbibbi.”

### *Ekibonerezo kya bananfunsi*

*(Luk 11:47-51)*

29 Awo oYesu ni yeeyongera okulabula abakugu omu by’aMateeka ga Musa n’aBafalisaayo ati, “Wobe! Ala abakugu omu by’aMateeka ga Musa n’aBafalisaayo, nga mulabire! Bananfunsi inywe! Ekyo kityo olw’okubba mutandaza amagombe g’abanaabbi

abazeiza baanywe abebaitire, era ni mujolija n'amagombe g'abatuukirirye.

<sup>30</sup> Era ni mukoba muti, 'Singa twabbairewo omu biseera by'abazeiza baiswe, nga titwemigi-ire omu kwita abanaabbi.'

<sup>31</sup> Kale omu ngeri eyo inywe abananyere ni muwa obukakafu muti muli baizukulu ba badi abaitire abanaabbi era muli ooti niibo.

<sup>32</sup> Kale aale nywena mwabe omumaiso mulirirye ekikole ekibbikibbi ekyo abazeiza baanywe ekibatandiikire.

<sup>33</sup> "Inywe omuli ooti mpiri! Era omuli abakab-bikabbi ooti mpiri enfulugundu! Mwalibunuka mutya okubasalira omusango gw'okubasindika omu geyeena?"

<sup>34</sup> Kale dala nabatumira abanaabbi n'abasaiza abalabuki era n'abakugu omu by'aMateeka ga Musa. Neye abamo kwibo mwalibaita, era n'abandi ni mubakomerera oku misaal-aba, n'abandi ni mubafaamuulira omu makumbaaniro gaanywe era n'abandi ni mubagudya mu buli kibuga.

<sup>35</sup> Kagira omusango gw'okwita abantu bonabona abatuukirirye oku kyalo gwalibba ku niinywe. Niiye owekyalibba, okuzwera oku mutuukirirye Abberi, okutuuka oku Zakaliya omwana wa Bbalakiya, ogubaitiire aakati w'ekyoto n'ekifo ekitukulye omu Yeekaalu.

<sup>36</sup> Mbakobera amazima nti, omusango gw'okwita abantu bonabona abatuukirirye gwalibba ku bantu b'omulembe gunu."

*OYesu akunga olwa Yerusaalemi  
(Luk 13:34-35)*

<sup>37</sup> Awo oYesu n'akunga oku lw'abantu b'e Yerusaalemi ati, "Inywe abantu b'e Yerusaalemi, inywe omwita abanaabbi, era ni mwita n'abantu oKibbumba ababatumira nga mubakubba n'amabbaale! Emirundi mimeka egintakire okusoolooja abaanabo ooti nkoko owaamaamira obumiyobwe omu biyayabye, neye nga timwikirirya?"

<sup>38</sup> Aale atyanu mwaba okubona ng'ekibuga kyanywe kisigaliire awo ooti kinameje.

<sup>39</sup> Ekyo kityo olw'okubba mbakobera nti timwalimbonaku tete paka owemwalikoba muti, 'W'enkabi iye oyo aiza omu liina lya Musengwa iye oKibbumba.' "

## 24

*OYesu atumula oku kujigirika kw'eYeekaalu  
(Mak 13:1-2; Luk 21:5-6)*

<sup>1</sup> Awo oYesu oweyabbaire asimbukire ng'atambula okuzwa omu luuga lw'eYeekaalu, abeegibe ni baigerera e gyali okumulagisya enyombeka y'amanyumba g'eYeekaalu.

<sup>2</sup> Neye iye n'abakoba ati, "Mubona amanyumba ago gonagona? Mbakobera amazima nti mpaawo eibbaale kadi limo aanu eryalisigala nga lyombeke oku liinaye. Gonagona baaba kugawumpulyagawo."

*Ebigosi n'okubayiigaania  
(Mak 13:3-13; Luk 21:7-19)*

3 Awo oluzwanyuma oYesu oweyabbaire ng'atyaimo oku Lusozi olw'eMisaale eMizaituuni ng'ali eeyo yenkani n'abeegibe, ni baigerera e gyali ni bamubuulya bati, "Otukobere ebyo byalibbaawo di? Era kamanyiciryoki akaliraga kati kiseerakyo ekyokwira, era enkomerero y'ekyalo etuukire?"

4 Iye oYesu n'abairamu ati, "Mwekuume ti-waabbaawo abagotesyagotesya.

5 Ekyo kityo olw'okubba bangi baliiza nga beeyeta Kurisito ogubasukireku amafuta, era baligotesyagotesya bangi.

6 Era mwaliwulira entalo aanu n'aadi, neye timutyanga. Ebyo biteekwa okubbaawo, neye era enkomerero yalibba ekaali okutuuka.

7 Eigwanga lyalirumba eigwanga erindi, n'obwakabaka bwalirumba obwakabaka obundi. Walibbaawo amanzala n'omusisi ng'atengeetya ekyalo omu bitundu bingi.

8 Neye ebyo byonabyona owebyalibbaawo olwo okugada kwalibba nga kutandiika-butandiiki."

9 Awo oYesu ni yeeyongera okubakobera ati, "Abalabe baanywe balibakwata, ni babawaayo eeri ab'obwezye okubagadya era n'okubaita. Abantu bonabona balibacaawa olw'eriina lyange.

10 Omu kiseera ekyo bangi balizwa omu kwikirirya, era baliryanganamu enkwe era bali-caawangana.

11 Era abanaabbi ab'obubbeyi bangi bali-boneka, era baligotesyagotesya bangi ni bazwa

oku Kibbumba.

<sup>12</sup> Era olw'okubba ebikole ebibbibbi byalyey-ongerera obungi omu bantu, bangi balirekeraawo okutaka abanaabwe.

<sup>13</sup> Neye oyo eyaligumira ebigosi ebyo paka oku nkomerero, yalirokoka.

<sup>14</sup> Era aMawuliro aMasa agakwata oku bwakabaka bw'omwigulu, baligalaabba eeri amawanga gonagona, olwo abantu bonabona ni bamanya amazima anambula kyokwekwatisya, kaisi awo enkomerero n'etuuka."

*Ekintu ekyomuliko era ekikwatisya enyinya  
(Mak 13:14-23; Luk 21:20-24)*

<sup>15</sup> Awo oYesu ni yeeyongerera okutumula n'abeegibe ati, "Kale mwalibona ekintu ekyomuliko era ekikwatisya enyinya onaabbi oDanieri ekiyatumwireku nga bakiteekere omu kifo ekitukulye." Oyo asoma binu amanye amakulu.

<sup>16</sup> "Abalibba omu Buyudaaya, bairukiranga mu nsozi.

<sup>17</sup> Kaisi eyalibba e ngulu oku nyumbaye owaikanga ansi, taingiranga omu nyumba ati atolemu ekiyatwala. <sup>18</sup> Era eyalibba omu musiri, takanganga e ika okusyoma ekizwalokye ekindi.

<sup>19</sup> Abalibba ebida n'abalibba bayonkesya omu naku egyo, nga baligada ino!

<sup>20</sup> Aale mwegairire oKibbumba, ebyo tibyabbaawo omu biseera bya ikendi n'obuwolondoki obwa bbalaafu ooba oku Saabbaato.



<sup>21</sup> Mbakobeire ekyo olw'okubba omu naku egyo, walibbaawo okugada kunene, nga kukira okundi kwonakwona okwabbairekuuwo, okuzwera nakimo omu kubbumba ekyalo paka atyanu. Era tiwalibbaawo tete okugada okundi okwagaagana awo.

<sup>22</sup> Era singa oKibbumba tiyakendeiryeku-bukendeeri enaku egyo egy'okugada, tiwankulamirewo omuntu kadi moiza. Neye olw'abalondemube, enaku egyo yagikendeiryeku.

<sup>23</sup> "Omu biseera ebyo, omuntu owabakobanga ati, 'Aale mubone oKurisito ogubasukireku amafuta ali aanu,' ooba ati, 'Ngodi,' timukikiriryanga.

<sup>24</sup> Ekyo kityo olw'okubba aBakurisito ab'obubbeyi, era n'abanaabbi ab'obubbeyi baliboneka. Era balikola obumanyiciryo obw'ebyewunyo n'ebyamagero eby'amaani nga bagenderera kugotesya n'abalondemu ba Kibbumba owekibba kyezeka.

<sup>25</sup> Aale muwulire, mbakobeire nga bukaali.

<sup>26</sup> "Kale omuntu yenayena owabakobanga ati, 'OKurisito omulonde ali omwidungu,' timwabangayo; ooba ati, 'Ali omu kisenge,' timwikiriryanga.

<sup>27</sup> Ekyo kityo olw'okubba, ng'okumesya kwa ikendi owekumeserya e buzwaisana ni kumoleka n'oku bugwaisana, n'okwira kw'oMwana wa Muntu kutyo niiye owekwalibba.

28 “Era okwirakwe kwalimanyikana eeri nabuli muntu ng’owebakoba bati, ‘Iwo awo awabba omusaaye, niwo ensega e gigikumbaanira.’ ”

*Okwira kw’oMwana wa Muntu  
(Mak 13:24-27; Luk 21:25-28)*

29 Awo ni yeeyongera ati, “Omu naku egyo, ng’ekiseera ekyokugada kyankuwa, ‘Eisana lyaliirugaza, n’omweri gwalirekeraawo okwaka; n’enkota galyanuka e ngulu ni gigwa, era n’amaani agali angulu omwibbanga bali-gatengeetya.’ ”

30 Era oYesu n’akoba ati, “Omu kiseera ekyo akamanyiciryo akalaga kati oMwana wa Muntu aira kaliboneka angulu omwibbanga, kaisi olwo abantu bonabona ab’oku kyalo balikuukulya. Era balibona oMwana wa Muntu ng’aizira oku bireri okuzwa omwigulu, ng’ali n’obwezye, n’ekitiisya eky’amaani.

31 Era oMwana wa Muntu yalituma abamalaikabe n’amakondeere agavuga eino, era balikumbaania abantube abalondemu, okuzwa mu buli kansonda konakona ak’ekyalo kyonakyona.”

*Ekitwega oku musaale omutiini  
(Mak 13:28-31; Luk 21:29-33)*

32 Tete oYesu ni yeeyongera okukobera abeegibe ati, “Aale mubonere oku musaale omutiini mwege. Ebikoola byagwo owebikunkumuka biwaaku, n’obusaga ni busebuka, nga mumanya muti ebiseera eby’eisana biigereire.

<sup>33</sup> N'omu ngeri enanyere eyo, owemubonanga ebyo byonabyona ebimbakobeire nga biri kubbangawo, mumanyanga muti enkomerero eigereire.

<sup>34</sup> Era mbakobera amazima nti ebintu ebyo byonabyona byaba okubbaawo ng'abantu ab'omulembe gunu bakaali okufa okuwaawo.

<sup>35</sup> Eigulu n'ekyalo byaliwaawo, neye ebibono byange tibyalwaawo kadi naire."

*Mpaawo amaite olunaku kadi saawa  
(Mak 13:32-37; Luk 17:26-30,34-36)*

<sup>36</sup> Era oYesu ni yeeyongera okubakobera ati, "Neye mpaawo amaite olunaku olunyere kadi saawa, ebyo owebyaligwerawo, waire abamalaika omwigulu, naabba oMwana,\* okutoolaku oBbaabba yenkani niye amaite.

<sup>37</sup> "Era kityo nakimo ng'owekeyabbaire oku mulembe gwa Nuwa, era niye owekyalibba n'omu kwira kw'oMwana wa Muntu.

<sup>38</sup> Ekyo kityo olw'okubba amataba owegabbaire nga gakaali okubbaawo, abantu babbaire nga balya era nga banywa, era nga bafumbirwa, paka oku lunaku oNuwa oluyaingiriire omulyato.

<sup>39</sup> Era babbaire tibamaite ekyaba okubbaawo paka amataba owegaizire ni gabasaanyawo bonabona. Era kyalibbeera nakimo kityo oku lunaku oMwana wa Muntu oluyaliiriraku.

---

\* **24:36 24:36** Naabba oMwana, eBiwandiike ebimo eby'eira bibulamu ebibono ebyo. **24:37 24:37** Nta 6:5-8 **24:39 24:39** Nta 7:6-24

<sup>40</sup> “Owewalibbaawo abasaiza babiri abalibba omu musiri, omoiza balimutwala, kaisi iye ogondi ni bamuleka.

<sup>41</sup> Era owewalibbaawo abakali ababiri abalibba nga basya oku mengo, omoiza balimutwala, kaisi iye ogondi ni bamuleka.

<sup>42</sup> “Kale mubbe bulindaala olw’okubba timumaite olunaku oMusengwa waanywe oluyalirira.

<sup>43</sup> Aale mumanye kinu muti singa onyere enyumba amanya ekiseera eky’obwire omwibbi ekiyaiziramu, abba bulindaala, nandi n’aleka enyumbaye ni bagivuna era ni bagingiramu.

<sup>44</sup> Kale atyanu nywena muteekwa okubbanga beetegeki, olw’okubba oMwana wa Muntu yalizira omu kiseera ekimutamusuubiriramu.”

*Abaweererya abeetegekera omusengwa waabwe*

*(Luk 12:41-48)*

<sup>45</sup> Awo oYesu ni yeeyongera ati, “Ndi kutumula ku muntu omwesigwa era iye oyo eyegendereza, iye omusengwawe ogwateekawo okulabirira abaweererya abainaye, n’okubawa omugabo gwabwe ogw’ebyokulya omu kiseera ekituuce.

<sup>46</sup> Era kyalibba kisa eeri omuweererya oyo, iye omusengwawe oweyaliira kaisi n’amwajirya ng’akola ekyo ekiyamulagiire.

<sup>47</sup> Era mbakohera amazima nti ebintu byonabyona ebya musengwawe oyo balibikwatisya omuweererya oyo okubirabirira.”

<sup>48</sup> Kale awo n'amaliirirya ati, "Neye singa omuweererya oyo abba muweererya omubimubbi n'akoba omu mwoyogwe ati, 'Omusengwa wange tiyatire naira,'

<sup>49</sup> n'atandiika okukubba abaweererya abainaye, era n'okulya n'okunywera aamo n'abateemeere.

<sup>50</sup> Kale omusengwa w'omuweererya oyo abba yaliirira oku lunaku olwatamukuumiriireku, n'omu saawa egyatamaite.

<sup>51</sup> Awo omusengwa w'omuweererya oyo yalimubonereza ino era yalimusindika aamo n'abananfunsi eeyo e walibba okukunga n'okunjiya amaino."

## 25

### *Olugero olw'abaala eikumi abaguna*

<sup>1</sup> Awo oYesu ni yeeyongerera okugerera abeegibe ati, "Ekiseera ekyo oMwana wa Muntu ekiyaliiriramu, obwakabaka bw'omwigulu bwalifaananaku n'abaala eikumi abaguna, abakwaite amataala gaabwe, ni baaba okwaniriza omugole omusaiza.

<sup>2</sup> Era oku baala abo, abataanu babbaire basirusiru, kaisi abataanu nga ibo balabukirabuki.

<sup>3</sup> Badi ibo abasirusiru baabire n'amataala gaabwe, neye nandi ni baaba n'amafuta ag'okwongerangamu.

<sup>4</sup> Neye ibo abalabukirabuki baabire n'amataala gaabwe era n'amacupa g'amafuta ag'okwongerangamu.

<sup>5</sup> Kale awo omugole oweyalwirewo okwiza, bonabona endoolo ni gibakwata era ni bagona.

<sup>6</sup> “Neye omu kiire aakati, ni wabbaawo eyaaminkiriire ati, ‘Aale omugole ngonu atuukire, muwuluke mumwanirize.’

<sup>7</sup> Kale awo abaala bonabona eikumi ni balamuka, ni bakwania amataala gaabwe gaake kusani.

<sup>8</sup> Kaisi badi abasirusiru ni bakoba badi abalabukirabuki bati, ‘Amataala gaiswe gakaliire era gatira kulikira, kale mutuweeku amafuta.’

<sup>9</sup> Neye ibo badi abalabukirabuki ni bairamu bati, ‘Amafuta matono tigatumale iswe na inywe. Wazira, mwabe e gibagatunda, mugule agaanywe.’

<sup>10</sup> “Neye abaala nago abasirusiru owebabaire nga baabire okugula amafuta, omugole nago n’atuuka. Awo abaala abo ababaire beetegekere ni baingirira aamo n’omugole omu nyumba omu babaire bategekeire embaga, era abaweererya ni baigalawo olwigi.

<sup>11</sup> “Kale awo oluzwanyuma, abaala badi abasirusiru bona ni batuuka ni bakoba bati, ‘Musengwa, Musengwa, otwigulirewo olwigi.’

<sup>12</sup> Neye iye n’abairamu ati, ‘Mbakohera amazima nti inywe timbamaite.’ ”

<sup>13</sup> Awo oYesu n’amaliriirya ati, “N’olwekyo mubbenge bulindaala, olw’okubba timumaite olunaku waire saawa oMwana wa Muntu egiyaliriramu.”

*Olugero lw’abagalama abasatu  
(Luk 19:11-27)*

14 Awo oYesu n'abagerera olugero olundi ati, "Era omu kiseera oMwana wa Muntu ekiyaliiriramu, obwakabaka bw'omwigulu bwalifaananaku n'omuntu omukulu eyabbaire ayaba omu lugendo, n'ayeta abagalamabe, kaisi n'abakwatisya ebintubye okubirabirira.

15 Kale awo n'awa nabuli moiza obungi obwayezya okulabirira, era eyasookere n'amuwa empiiya etalanta itaanu, n'owokubiri n'amuwa etalanta ibiri, n'ogondi etalanta moiza, awo n'ayaba omu lugendolwe.

16 Amangu ago, oodi oguyawaire etalanta eitaanu, n'ayaba n'agisuubuulamu, n'asunamu amagoba etalanta egindi itaanu.

17 N'oodi oguyawaire etalanta eibiri yena n'agisuubuulamu, era n'asunamu amagoba etalanta egindi ibiri.

18 Neye oodi oguyawaire etalanta emoiza, n'ayaba, n'akuula ekiina omwitakali, n'abisamu etalanta ya musengwawe.

19 "Oluzwanyuma lw'ekiseera ekiwanvu, omusengwa w'abagalama abo yairire, era n'ataka okutegeera ebifa oku talanta egiyabawaire.

20 Atyanu omugalama oguyawaire etalanta eitaanu, n'aleeta egindi itaanu, n'amukoba ati, 'Musengwa, wandekeire etalanta itaanu, ngonu nasuniremu amagoba g'etalanta egindi itaanu.'

21 Kale omusengwawe n'amukoba ati, 'Weebale ino iwe omugalama omusa era omwesigwa. Ng'owoobbaire omwesigwa omu bintu ebitono, njaba okukuwa obwezye oku bintu bingi. Era oingire ojaagaanire aamo n'omusengwawo.'

22 N'omugalama oguyawaire etalanta eibiri, n'aleeta etalanta egindi ibiri, n'amukoba ati, 'Musengwa, wandekeire etalanta ibiri, ngonu nasuniremu amagoba g'etalanta egindi ibiri.'

23 "Kale omusengwawe n'amukoba ati, 'Wee-bale ino iwe omugalama omusa era omwesigwa. Ng'owoobbaire omwesigwa omu bintu ebitono, njaba okukuwa obwezye oku bintu bingi. Era oingire ojaagaanire aamo n'omusengwawo.'

24 "Awo omugalama oguyawaire etalanta emoiza n'aiza, iye n'amukoba ati, 'Musengwa, namaite nti oli muntu mugosi, era oli ooti mulimi akungula ebinandi n'akoma era akesa ebinandi n'asiga.

25 Kale natiire era ni njaba ni nkuula ekiina omwitakali ni mbisamu etalantayo, era ngenu.'

26 Neye omusengwawe n'amukoba ati, 'Iwe omugalama akola ebibbibibi era omugayaali! Kale ekitegeeza nti wamaite nga ndi ooti mulimi akungula ebinandi n'akoma era akesa ebinandi n'asiga?

27 Aale kale lwaki empiiya gyange tiwagikoopere abasuubuuzi, kaisi nze nga njirire ni ngisyomayo nga kuliku n'amagoba?' "

28 OYesu n'amaliriirya ati, "Omusengwa waabwe n'alagira ati, 'Mumutooleku etalanta eyo egyali nayo, mugiwe oodi aali n'etalanta gidi eikumi.

29 Ekyo kityo olw'okubba nabuli aali nabyo balimwongeraku n'ebindi, era n'abba nabyo bingi ino. Neye oyo abula, balimutoolaku



n'akatyayi kadi akebalibba bamuwaire.

<sup>30</sup> Era omugalama oyo abula ekyagasa, balimubbingira e nza omu ndikiirya, eeyo e giyalikungira n'okuñjiya amaino.' "

*Okulamula emisango okwenkomerero*

<sup>31</sup> Awo oYesu n'abakobera ati, "OMwana wa Muntu omu kitiisyakye oweyaliira era ng'ali n'abamalaikabe bonabona, yalityama omu ntebeye ey'ekitiisya.

<sup>32</sup> Era abantu bonabona ni bakumbaanira omumaisoge, kaisi n'abaabulamu ooti muliisya ayabulamu entaama omu mbuli.

<sup>33</sup> Entaama n'agiteeka oku lubbaalwe olw'engalo endiiro, kaisi embuli n'agiteeka oku lubba lw'engalo engooda.

<sup>34</sup> "Awo oKabaka ng'atyaimo oku ntebeye nago, yalikoba abo abalibba oku lubba lw'engalo endiiro ati, 'Inywe oBbaabba abeyawaire enkabi, mwize mubbe omu bwakabaka obwebabategekeire okuzwa owebabbumbiire ekyalo.

<sup>35</sup> Ekyo kityo olw'okubba enzala oweyabaire enduma mwampaire ekyokulya, n'enyonta oweyabaire enduma, mwampaire ekyokunywa, n'owenabaire omugeni mwanjanirizire.

<sup>36</sup> Era owenabaire ndamba ekyokuzwala, mwakimpaire. Owenabaire omulwaire mwanjanjabire era owenabaire omu mabbuusu, mwaizire okumbona.'

<sup>37</sup> "Awo abantu abo abatuukirirye balimwiramu bati, 'Musengwa, twakuboine di

ng'enzala ekuluma ni tukuwa ekyokulya, ooba ng'enyonta ekuluma ni tukuwa ekyokunywa?

<sup>38</sup> Era wabbaire di omugeni, ni tukwaniriza, ooba wabbaire di ng'odamba ekyokuzwala ni tukikuwa?

<sup>39</sup> Era twakuboine di ng'oli mulwaire ni tuku-janjabya, ooba ng'oli omu mabbuusu ni twiza okukubona?'

<sup>40</sup> "OKabaka nago yalibairamu ati, 'Mbakobera amazima nti nabuli ekimwakoleire omoiza oku baganda bange abo abebanyooma, mwakikoleire ninze.'

<sup>41</sup> "Awo yalikoba abo abalibba oku lubbaalwe olw'engalo engooda ati, 'Muzwe e gyendi inywe oKibumba abeyalaamire. Era mwabe omu musyo ogutalikira, eira ogubategekeire oSitaani n'abamalaikabe.

<sup>42</sup> Ekyo kityo olw'okubba enzala oweyabbaire enduma, timwampaire ekyokulya. Era enyonta oweyabbaire enduma, timwampaire ekyokun-  
ywa.

<sup>43</sup> Owenabbaire omugeni, timwanjanirizire. Era owenabbaire ndamba ekyokuzwala, timwampaire ekyokuzwala. Era owenabbaire omulwaire timwanjanjabire, era owenabbaire omu mabbuusu, timwannambwire.'

<sup>44</sup> "Awo bona balimubuulya bati, 'Musengwa, twakuboine di ng'enzala ekuluma, ooba ng'enyonta ekuluma, ooba ng'oli mugeni, ooba ng'odamba ekyokuzwala, ooba ng'oli mulwaire, ooba ng'oli omu mabbuusu, nandi ni tukubbeera?'

<sup>45</sup> Awo oKabaka yalibairamu ati, 'Mbakobera amazima, buli owemwagaine okubbeera omoiza

kwabo abebanyooma, mwabbanga mugaine kubbeera ninze.’

<sup>46</sup> “Kale abo balibasindika oku kibonerezo ekitawaawo. Neye abatuukirirye balyaba mu bwomi obutawaawo.”

## 26

*Olukwe olw’okwita oYesu*

*(Mak 14:1-2; Luk 22:1-2; Yok 11:45-53)*

<sup>1</sup> Awo oYesu oweyamalire okutumula ebyo byonabyona, n’akoba abeegibe ati,

<sup>2</sup> “Mumaite muti wabulayo enaku ibiri oMukolo ogw’oKutambukirya gutuuke, era omu kiseera ekyo oMwana wa Muntu baaba okumuwaayo bamukomerere oku musalabba.”

<sup>3</sup> Awo abakabona abakulu, n’abantu abakulu omwigwanga ni bakiika e wa kabona akira obukulu oKayaafa.

<sup>4</sup> Era eeyo ni basala olukwe okukwata oYesu omu mbiso era bamwite.

<sup>5</sup> Neye ni bakoba bati, “Tuleke okumukwata omu naku gy’omukolo, demba abantu beedi-ima.”

*OYesu bamusukaku amafuta e Bbesaniya*

*(Mak 14:3-9; Yok 12:1-8)*

<sup>6</sup> Awo oYesu oweyabbaire e Bbesaniya omu nyumba ya Simooni eyabbaireku omugenge,

<sup>7</sup> ni wabbaawo omukali eyaabireyo n’ecupa erimu amafuta ag’akaloosa, era ag’ebbeeyi eino, n’agasuka oku mutwe gwa Yesu oweyabbaire atyaime ng’alya.

8 Neye abeegi owebaboine ekyo, ni banyiga, ni beebuulya bati, “Lwaki amafuta ago bagabebenyeserye?”

9 Babbaire bayezya okugatunda ni g’azwamu empiiya nyingi, ni bagigabira abadoobi.”

10 Awo oYesu oweyategeire ekibakoba, n’abakoba ati, “Omukali onu lwaki mumuleyerya? Ekintu ekyankoleire kisa.

11 Ekyo kityo olw’okubba abadoobi ibo baabanga na inywe bulijo, neye nze tinaabbe na inywe okumala ekiseera ekinene.

12 Asukire amafuta ag’akaloosa oku mubiri gwange ng’agukwanirya nakimo olwa kuguliika.

13 Era mbakobera amazima nti, wonawona aMawuliro aMasa ago agankwataku e gibagalaabbanga okumalaku ekyalo, na kinu omukali onu ekyakolere, bakitumulangaku ni bamwebukirya.”

*OYuda aikirirya okulyamu oYesu olukwe*

*(Mak 14:10-11; Luk 22:3-6)*

14 Awo omoiza oku beegi eikumi na babiri ogubeetanga oYuda Isikalyoti, n’ayaba e giri abakabona abakulu,

15 n’ababuulya ati, “Singa owenababbeera ni mukwata omusaiza oyo mwampa imeka?” Kale awo ni bamuwa amandusu g’efeeza 30.

16 Era okuzwa olwo oYuda n’anoonia akaseera akasa ak’okubabbeera bakwate oYesu.

*OYesu alya n’abeegibe oku Mukolo*

*(Mak 14:12-21; Luk 22:7-13,21-23; Yok 13:21-30)*

17 Oku lunaku olusooka olwa Mukolo ogw'eMigaati eGibulamu eKizumbulukuca, abeegi baabire e giri oYesu, ni bamubuulya bati, "Otaka tukutegekere yaina e gitwaliira oMukolo ogw'oKutambukirya?"

18 OYesu n'abakoba ati, "Mwabe omu kibuga e wa musaiza oodi ogumumaite, mumukobe muti oMusomesya akobere ati, 'Ekiseera kyange ekiraagaane kiigereire, kale nze n'abeegi bange e wuwo niyo e gitwaliira oMukolo ogw'oKutambukirya.' "

19 Kale abeegi ni bakola ng'oYesu oweyabalagiire, ni baaba ni bategeka oMukolo ogw'oKutambukirya.

20 Awo obwire owebwairugaire, oYesu n'abeegibe eikumi na babiri ni batyama okulya.

21 Era owebabbaire balya, oYesu n'abakoba ati, "Mbakobera amazima nti omoiza kwinywe ayaba okundyamu olukwe."

22 Cooka awo abeegi ni beekondamira ino, era moiza moiza, ng'abuulya oYesu ati, "Musengwa, olwo ninze?"

23 OYesu n'abairamu ati, "Oyo akozya na nze omu kibya, niye eyandyamu olukwe.

24 Dala oMwana wa Muntu baaba okumwita, ng'eBiwandiike owebimutumulaku. Neye wobe! Omuntu oyo eyalyamu oMwana wa Muntu olukwe, ng'alabire! Kyandimubbeereire kisa singa tibamubyaire!"

25 Awo oYuda eyaliremu oYesu olukwe, n'akoba ati, "Musomesya, olwo ninze?" OYesu n'amwiramumu ati, "Ee, kityo ng'owookobere."

*Ekiinulo kya Musengwa ekisembayo*

*(Mak 14:22-26; Luk 22:14-20; 1Ko 11:23-25)*

<sup>26</sup> Awo oYesu n’abeegibe owebabbaire nga balya, oYesu n’atoola omugaati, ni yeebalya oKibbumba, n’aguvunavunamu n’abawa, n’abakoba ati, “Mutoole mulye, gunu niigwo omubiri gwange.”

<sup>27</sup> Era oluzwanyuma n’akwata ekikopo ky’enviinyo, ni yeebalya oKibbumba n’abawa, n’abakoba ati, “Munywe kunu nywenanywena.

<sup>28</sup> Ekyo kityo olw’okubba gunu niigwo omusaaye gwange ogwasusuka oku lw’abangi, era ogukakasa endagaano\* eya Kibbumba egyali kukola n’abantube okubasoniya ebikole byabwe ebibbibbi.

<sup>29</sup> Neye mbakoba nti okuzwa atyanu tinaliirayo tete okunywa ekyokunywa ky’emizabbibu, paka owenalikinywa na inywe omu ngeri empyaka, omu bwakabaka bwa Bbaabba.”

<sup>30</sup> Awo owebamalire okwemba olwembo olw’okuwuuja oKibbumba, ni bawuluka ni baaba oku Lusozi olw’eMisaale eMizaituuni.

*OYesu alanga ati oPeetero yamwegaana*

*(Mak 14:27-31; Luk 22:31-34; Yok 13:36-38)*

<sup>31</sup> Awo oYesu n’akoba abeegibe ati, “Omu kiire kinu nywenanywena mwairuka ni mundekawo, olw’okubba bakiwandiikire bati:

‘Naliita omuliisya,

era entaama egy’omu kiraalo ni gisalaanika.’

---

\* **26:28 26:28** EBiwandiike ebimo eby’eira bikoba *Ndagaano eMpyaka.* **26:28 26:28** Kuz 24:8; Yer 31:31-34 **26:31 26:31** Zak 13:7

32 “Neye owebalimala okunzuukiza, nalibasooka okwaba e Galiraaya.”

33 Awo oPeetero n’amukakasa ati, “Abandi bonabona n’owebairuka ni bakulekawo olw’ebyakubbaaku, nze tinakulekewo.”

34 OYesu n’amwiramumu ati, “Nkukobera amazima nti omu kiire ekinanyere kinu, onkoko yaabba akaali n’okukookoola, nga wankunee-gaanira emirundi misatu.”

35 Neye oPeetero n’amukakasira nakimo ati, “N’owebaabba nga bateekwa kunjira aamo na iwe, tinakwegane.” Era n’abeegi abandi bonabona ni bakoba kinanyere ekyo.

*OYesu omu Gesusemani*  
(Mak 14:32-42; Luk 22:39-46)

36 Awo oYesu n’abeegibe ni baaba omu kifo ekiyebeeta oGesusemani. Owebatuukire eeyo oYesu n’abakoba ati, “Mutyame aanu, nga nze njaba aadi neegairire oKibbumba.”

37 N’ayaba n’oPeetero n’abataane ba Zebeddaayo ababiri, era awo n’atandiika okutya n’okweririgana.

38 Kale n’abakoba ati, “Omwoyo gwange gwizwire enima eyezya n’okunjita! Musigale aanu era nga nywena mubonia.”

39 Oweyeeyongeyo katono omumaiso, n’agwa oku mazwige era n’afuunama n’aica empumi ansi okwitakali, kaisi ni yeegairira oKibbumba ati, “Bbaabba, owekibba ekyetaagisya kiti nteekwa okubita omu kipimo ekyokugada okwo, kale kibbe ng’owootaka.”

<sup>40</sup> Awo n'akanga e giri abeegibe badi abasatu n'abaajirya nga bagonere, kaisi n'abuulya oPeetero ati, "Timwezerye okubba na nze aanu nga tubonia waire kadi esaawa emoiza eti?"

<sup>41</sup> Mubonie era musabe oKibbumba, kaisi okubagezesya tikwabatuukaku, olw'okubba emyoyo gyanywe dala mimaliriri, neye emibiri minafu."

<sup>42</sup> Era n'ayaba omulundi gwokubiri, n'asaba oKibbumba ati, "Bbaabba, ekipimo kinu ekyokugada owekibba nga tikyezeka okukintoolaku paka nga nkinywireku, kale kibbe ng'owootaka."

<sup>43</sup> Era oYesu oweyakangire omulundi ogundi tete n'abaajirya nga bagona olw'okubba endoolo gyabbaire gibali kubbikubbi.

<sup>44</sup> Kale awo oYesu n'abaleka, n'akanga, n'asaba oKibbumba omulundi ogwokusatu, ng'asaba omu bibono ebinanyere ebyo.

<sup>45</sup> Awo n'akanga e giri abeegibe, n'abakoba ati, "Mukaali mugona, era mukaali muwuumula? Aale mubone esaawa etuukire ey'okulyamu oMwana wa Muntu olukwe bamuweeyo eeri obwezye bw'abakola ebikole ebibbibbi bamugadye.

<sup>46</sup> Musetuke twabe tubasangaane! Era andi-iremu olukwe ongu atuukire."

### *Bakwata oYesu*

*(Mak 14:43-50; Luk 22:47-53; Yok 18:3-12)*

<sup>47</sup> Awo oYesu oweyabbaire akaali atumula, oYuda omoiza oku beegibe eikumi na babiri,



n'atuuka n'ekiyindi ekinene eky'abantu ababaire n'empiima n'emiigo. Abantu abo, abakabona abakulu n'abantu abakulu omwigwanga niibo ababaire babatumire.

<sup>48</sup> Atyanu eyaliiremu oYesu olukwe yabbaire amalire okuwa ekiyindi ky'abantu ekyo akamanyiciryo ng'abakobere ati, "Omuntu ogunasugirya nga mmugwa omu kifubba, yaabba niye oyo, mwamukwata-bukwati."

<sup>49</sup> Awo oYuda oweyatuukire, amangu ago n'ayaba e giri oYesu n'amusugirya ati, "Musesya oli otya!" Era n'amugwa n'omu kifubba.

<sup>50</sup> Neye oYesu n'amukoba ati, "Munange, okole ekikuleetere." Awo ni baiza ni bakwata oYesu era ni bamukalangula.

<sup>51</sup> Amangu ago omoiza oku babbaire n'oYesu n'asowolayo empiimaye, n'atemaku omugalama wa kabona akira obukulu ekitwi n'amutiicaaku.

<sup>52</sup> Neye oYesu n'amukoba ati, "Empiimayo ogikanjeeyo omu kiruutu kyayo, olw'okubba bonabona abakolesya empiima okwita bona balibaita n'empiima.

<sup>53</sup> Osega oti timpezya okusaba oBbaabba n'ampeererya enkumi n'enkumi egy'abamalaika okwiza okunkuuma?

<sup>54</sup> Neye owensaba ni babampa olwo kaisi eBiwandiike ebikoba biti kinu kiteekwa okuntuukaku bibba byatuukirira bitya?"

<sup>55</sup> Omu kaseera ako oYesu n'akoba ekiziima ky'abantu ati, "Mwizire okunkwata nga muli n'empiima n'emiigo ooti mwaba kukwata muyeekera? Kale nabuli lunaku natyamanga na

inywe omu Yeekaalu nga njegesya nandi ni munkwata.

<sup>56</sup> Neye binu byonabyona birikubbangawo lwa kutuukirirya Biwandiike abanaabbi ebibawandi-ikire.” Awo abeegibe bonabona ni bairuka ni bamuleka awo.

*OYesu omumaiso g’oLukiiko*

*(Mak 14:53-65; Luk 22:54-55,63-71; Yok 18:13-14,19-24)*

<sup>57</sup> Awo abo abakwaite oYesu ni bamutwala e wa Kayaafa okabona akira obukulu, abakugu omu by’aMateeka ga Musa n’abantu abandi abakulu omwigwanga, e gibabbaire bakumbaaniire.

<sup>58</sup> Neye iye oPeetero yasengereirye oYesu ng’alekerekuuwo eibbanga okutuukira nakimo omu luuga lwa kabona akira obukulu. Yaingire n’atyama n’abakuumi b’eYeekaalu abone ebyazwamu.

<sup>59</sup> Olwo abakabona abakulu n’ab’oLukiiko oLufugi olw’aBayudaaya bonabona ni banoonia obujulizi obw’obubbeyi obubasinziriraku okwita oYesu.

<sup>60</sup> Neye nandi ni babusuna, waire ng’abajulizi ab’obubbeyi bangi baizire ni bamusibiriryaku. Neye oluzwanyuma ni wazwayo babiri

<sup>61</sup> era ibo ni bakoba bati, “Omusaiza onu yakobere ati, ‘Mpezya okuvunawo eYeekaalu ya Kibbumba era n’okugyombeka omu naku isatu.’”

62 Awo okabona akira obukulu n'ayemerera n'abuulya oYesu ati, "Tiwairemu? Niki ekyokoba ku binu ebibakulumiriza?"

63 Neye oYesu n'asigala ng'asirikire. Awo okabona akira obukulu n'amukoba ati, "Nkulagira nti olayire oKibbumba onanyere obwomi, otukobere obanga niwe oKurisito oMwana wa Kibbumba."

64 OYesu n'airamu ati, "Ee, kityo ng'owookobere. Era mbakobera nywenanywena nti mwalibona oMwana wa Muntu ng'atyaime n'oKibbumba omu kifo ky'ekitiisya eino<sup>†</sup> era ng'aizira oku bireri okuzwa omwigulu."

65 Awo okabona akira obukulu omu busungu n'anyiira eganduulaye, era n'akoba ati, "Omu-saiza onu yeeyeta okubba Kibbumba! Tete tukaali tutakira niki abajulizi abandi? Nti ngoyo muwuliire ebibono ebyatumwire.

66 Inywe museega mutya?" Ibo ni bairamu bati, "Awomeire kumwita."

67 Awo ni bamwanda ebitanta omumaiso era ni bamukubba ebinfuute, abandi ni bamukubba empi

68 neenu webamukoba bati, "Kurisito, otukobere, naani akukubbire?"

*OPeetero yeegaana oYesu*

(Mak 14:66-72; Luk 22:56-62; Yok 18:15-18,25-27)

---

<sup>†</sup> 26:64 26:64 Ekifo eky'ekitiisya eino, ooba, Oku lubba olw'engalo endiuro eya Kibbumba. 26:64 26:64 Dan 7:13 26:66 26:65-66 Lee 24:16 26:67 26:67 Isa 50:6

<sup>69</sup> Awo oPeetero oweyabbaire ng'atyaimbe e nza oku luuga, ni wabbaawo omoiza oku baala ababbaire abaweererya e wa kabona akira obukulu n'aigerera e gyali, kaisi n'amukoba ati, "Wena wabbaire n'oYesu ow'e Galiraaya."

<sup>70</sup> Neye oPeetero ni yeegaana omumaiso gaabwe bonabona, ng'akoba ati, "Ekyokoba tinkimaite."

<sup>71</sup> Awo oPeetero n'azwa oku luuga n'ayaba oku muzigo, era tete eeyo yona omwala ogondi omoiza oku baweererya n'amubona, n'akoba abantu ababbaire awo ati, "Oyo yena yabbaire n'oYesu ow'e Naazaleesi."

<sup>72</sup> Tete era oPeetero ni yeegaana ng'alayira ati, "Omu mazima aganyere nze omusaiza oyo timmumaite."

<sup>73</sup> Tete nga wabitirewo akaseera katono, ababbaire beemereire aawo ni bakoba oPeetero bati, "Dala oli moiza oku basengereri ba Yesu, olw'okubba n'entumulayo ekuloopa nti oli Mugaliraaya."

<sup>74</sup> Neye oPeetero n'atandiika okweraama era n'okulayira ati, "Omu mazima agananyere nze omusaiza oyo timmumaite!"

Amangu ago onkoko n'akookoola.

<sup>75</sup> Awo oPeetero n'ayebukirya ebyo oYesu ebiyabbaire amukobere ati, "Onkoko yaabba akaali n'okukookoola, nga waneegaine emirundi misatu ng'okoba oti tommaite." Era awo oPeetero n'awuluka, era n'akunga ino.

*OYesu bamuwaayo eeri oPiraato*  
*(Mak 15:1; Luk 23:1-2; Yok 18:28-32)*

<sup>1</sup> Awo obwire owebwaceire amakeezi, abakabona abakulu bonabona n'abantu abakulu omwigwanga, ni bateesa era ni basalawo okwita oYesu.

<sup>2</sup> Kale ni bamusiba amangalo, ni bamutwala ni bamuwaayo eeri oPiraato omufugi oMulooma.

*Okufa kwa Yuda*  
*(Bik 1:18-19)*

<sup>3</sup> Atyanu oYuda eyaliiremu oYesu olukwe, oweyaboine ng'oYesu bamusaliire ogw'okufa, ni yeejusa olw'ekiyabbaire akolere. Era amandusu g'efeeza nago 30 n'agakanjirya abakabona abakulu, n'abantu abakulu omwigwanga,

<sup>4</sup> ng'abakoba ati, "Nkolere kibbikibbi okuwaayo omuntu abulaku omusango okumwita!" Neye ibo ni bairamu bati, "Kaisi iswe ekyo kitukwataku? Iwe ekyo kigosisyoo."

<sup>5</sup> Kale oYuda n'amuma amandusu ago omu Yeekaalu, kaisi n'ayaba ni yeemyeda.

<sup>6</sup> Neye abakabona abakulu ni balondya amandusu ago, era ni bakoba bati, "Amateeka gaiswe tigaikirirya okuteeka empiiya ginu omwigwanika, olw'okubba gy'okusuka musaaye."

<sup>7</sup> Kale owebamalire okuteesa, ni bagigulamu ekigona ekibakuulangamu eitakali ly'okubbumbamu ebintu, baliikengemu abageni.

<sup>8</sup> Era ekyo niikyo ekigira ekigona ekyo bakyeta Kigona ky'okusuka Musaaye paka atyanu.

<sup>9</sup> Awo onaabbi Yeremiya ekiyatumwire ni kituukirira ekikoba kiti:

“Batwaire amandusu g’efeeza 30,  
 nga niiyo ebbeeyi abamo oku bantu b’e  
 Isirairi egibapatanire bati niigyo egituuka  
 okumugula,  
 10 era ni bagigulamu ekigona ekibakuulangamu  
 eitakali ly’okubbumbamu ebintu,  
 ng’oMusengwa iye oKibumba oweyabbaire  
 ankobeire.”

*OYesu omumaiso ga Piraato*

*(Mak 15:2-5; Luk 23:3-5; Yok 18:33-38)*

11 Awo oYesu ni bamutwala ni bamwemererya  
 omumaiso ga Piraato omufugi oMulooma era  
 omufugi oyo n’amubuulya ati, “Niiwe okabaka  
 w’aBayudaaya?” OYesu n’amwiramumu ati, “Ee,  
 kityo ng’owookobere.”

12 Neye abakabona abakulu n’abantu abakulu  
 omwigwanga owebabbaire bamuvunaana,  
 tiyabairiremu kadi.

13 Awo oPiraato n’amubuulya ati, “Towulira  
 ebyo byonabyona ebibakulumiriza?”

14 Neye oYesu nandi n’amwiramumu ekibono kadi  
 kimo kwebyo ebibamuvunaanire. Era omufugi  
 oyo ni yeewunya ino.

*OYesu bamusalira ogw’okufa*

*(Mak 15:6-15; Luk 23:13-25; Yok 18:39-19:16)*

15 Atyanu mu buli biseera eby’oMukolo  
 ogw’oKutambukirya, yabbaire mpisa y’omufugi  
 oMulooma okuteeranga omusibe, abantu  
 ogubamusabanga okuteera.

16 Kale oku mulundi ogwo, wabbairewo omusibe owakabbikabbi ogubabbairere bamaite ino, nga bamweta Bbalaba.

17 Era abantu owebakumbaine e wa Piraato n'ababuulya ati, "Aliina ogumutaka mbateerere; Bbalaba, ooba Yesu abamo ogumweta oKurisito ogubasukireku amafuta?"

18 Yababwirye atyo olw'okubba yabbairere amaite ati bawaireyo oYesu egyali lw'engongi.

19 Awo oPiraato oweyabbairere atyaimwe oku ntebe ey'obulamuzi, omukaliwe n'amutumira obukwenda ng'akoba ati, "Omuntu oyo abula omusango, kale tiwamukola ekintu kyonakyona, olw'okubba ngadire ino omu kiire kinu omu kirooto okululwe."

20 Neye abakabona abakulu, n'abantu abakulu omwigwanga, ni basendasenda ekiziima ky'abantu okusaba oPiraato ateere Bbalaba, neye iye oYesu bamwite.

21 Awo oPiraato n'ababuulya ati, "Oku babiri mutaka mbateerere naani?" Ni bairamu bati, "Bbalaba."

22 Awo oPiraato omufugi oyo oMulooma n'ababuulya ati, "Kaisi iye oYesu abamo ogumweta oKurisito ogubasukireku amafuta mmukole ntya?" Bonabona ni bairamu bati, "Omukomerere oku musalabba!"

23 Neye oPiraato n'ababuulya ati, "Lwaki? Kibbikibbiki ekyakolere?" Neye ibo ni bongeramu maani kukooka-bukooki bati, "Iwe omukomerere ku musalabba!"

24 Awo oPiraato oweyaboine nga bimukaisirye, era n'abantu nga bataka kwediima, n'akwata

amaizi, era n'anaaba omu ngalo omumaiso g'ekiziima ky'abantu nga waakoba ati, "Nze mpaawo kibavunaana oku kwita omusaiza oyo. Neye kigosi kyanywe."

<sup>25</sup> Era abantu bonabona ni bairamu bati, "Oleke omusango gubbe ku niiswe n'abaana baiswe olw'okufaakwe!"

<sup>26</sup> Kale oPiraato n'abateerera oBbalaba. Neye n'alagira ni bafaamuula oYesu n'ofaalu aliku emirobo egisima, kaisi n'amuwaayo okwaba okumukomerera oku musalabba.

*Abaisirikale bakiina oYesu  
(Mak 15:16-20; Yok 19:2-3)*

<sup>27</sup> Awo abaisirikale b'omufugi oMulooma ni batwala oYesu omu lubiri lw'omufugi nago, olubeeta Pulaitoriyo. Era ni bakumbaania abaisirikale ab'ekibinja ekyo bonabona ni beeruguulirirya oYesu.

<sup>28</sup> Awo ni bamutoolamu ebizwalobye, ni bamuzwalisya eganduula entukuliikiriri.

<sup>29</sup> Era ni baluka engule eya mawa, ni bagimuzwalisya oku mutwe. Ni bamukwatisya n'olugada omu ngalo endiuro. Awo ni bakoma amazwi omumaisoge, ni bamukiina nga bamukoba bati, "Owangaale, iwe okabaka w'aBayudaaya!"

<sup>30</sup> Era ni bamwandaku ebitanta, ni bakwata olugada, ni bamukubba oku mutwe emirundi n'emirundi.



<sup>31</sup> Awo owebamalire okumukiina, ni bamu-toolamu eganduula edi entukuliikiriri, ni bamuzwalisya ebizwalo ebibye, awo ni bamutwala okumukomerera.

*OYesu bamukomerera oku musalabba  
(Mak 15:21-32; Luk 23:26-43; Yok 19:17-27)*

<sup>32</sup> Awo owebabbaire bawuluka omu kibuga e Yerusaalemi, ni basangaana omusaiza ow'e Kuleene, ogubeeta oSimooni, ni bamukaka okwetiika omusalabba gwa Yesu.

<sup>33</sup> Era owebatuukire omu kifo ekibeeta Gologoosa, amakulu gaakyo eKifo ky'eKiyanga,

<sup>34</sup> ni bawa oYesu enviinyo okunywa, nga bagitabwiryemu ekintu ekirulu ooti maizi g'omu ndulwe. Neye oweyakombereku, n'agaana okuginywa.

<sup>35</sup> Awo owebamalire okumukomerera oku musalabba, ni bagabana ebizwalobye, nga babikubbiraku kalulu.

<sup>36</sup> Oluzwanyuma lw'ekyo ni batyama aawo era ni bamukuuma.

<sup>37</sup> Era e ngulu w'omutwegwe bateekereyo ekiwandiiko ky'omusango ogubamuvunaana bati, "ONU NIIYE OYESU, OKABAKA W'ABAYUDAAYA."

<sup>38</sup> Era ni bakomerera n'abaibbi babiri oku misalabba okumpi n'oYesu, omoiza oku lubba lwa Yesu olw'engalo endiuro, n'ogondi oku lw'engooda.

<sup>39</sup> Awo ababbaire babitawo ni batengeetya emitwe n'obulwa nga baduula oYesu,

<sup>40</sup> era ni bakoba bati, “Iwe ayaba okuvunawo eYeekaalu, tete ogyombeke omu naku isatu, weeramyeye. Aale ng’oli Mwana wa Kibbumba, ozwe oku musalabba oike ansi!”

<sup>41</sup> Era abakabona abakulu n’abakugu omu by’aMateeka ga Musa, n’abantu abakulu omwigwanga bona ni bamukiina, nga bakoba bati,

<sup>42</sup> “Yalamyanga abandi, tayezya okweramya onanyere! Iye oKabaka wa Isirairi, aale atyanu azwe oku musalabba aike ansi kaisi tumwikiririyemu.

<sup>43</sup> Akoba ati yeesiga Kibbumba, era yakobere ati Mwana wa Kibbumba. Kale aale ng’oKibbumba amutaka, amulamye.”

<sup>44</sup> Era abaibbi abebakomereire okumpi naye, bona ni bamuduula omu ngeri enanyere eyo.

### *Okufa kwa Yesu*

*(Mak 15:33-41; Luk 23:44-49; Yok 19:28-30)*

<sup>45</sup> Atyanu okuzwa oku saawa omukaaga egy’omusana, paka oku saawa omwenda egyeigulo, endikiirya n’ekwata oku kyalo kyonakyona.

<sup>46</sup> Era oku saawa ooti mwenda, oYesu n’akunga n’eigono eryaminkirira ati, “Eloyi, Eloyi, lama sabbakusaani?” Amakulu gaakyo gati, “Kibbumba wange, Kibbumba wange, lwaki ondekerewo?”

<sup>47</sup> Era abamo kwabo ababbairi beemereire aawo owebawuliire, ni bakoba bati, “Ayeta on-aabbi Eriya!”

<sup>48</sup> Era amangu ago omoiza kwibo n'airuka, n'akwata ekijuulo, n'akitimya omu nviinyo en-sasaami, n'akiteeka oku lugada, n'awa oYesu okufunfuuna.

<sup>49</sup> Neye abandi ni bakoba bati, "Aale muleke tubone ooba ng'Eriya yaiza n'amulamya!"

<sup>50</sup> Awo oYesu tete n'akunga n'eigono eryaminkirira, era n'afa.

<sup>51</sup> Omu kaseera ako olutimbe olw'omu Yeekaalu ni lunyiirikamu aakati, okuzwa angulu okutuuka ansi ni bibba ebitundu bibiri. Ekyalo ni kitengeeta, era amabbaale ni gaatikamu.

<sup>52</sup> Era amagombe agamo ni gaatikamu, era abatuukirirye bangi ababbairi bafiire oKib-bumba n'abazuukiza,

<sup>53</sup> ni bazwa omu magombe. Era oluzwanyuma lwa Yesu okuzuukira, ni baaba omu kibuga e Yerusalemi ekitukulye, era abantu bangi ni bababona.

<sup>54</sup> Omukulu w'ekibinja ky'abaisirikale 100 era n'abaisirikale ababbairi naye nga baku-uma oYesu, owebaboine ng'omusisi atengeetya ekyalo, era n'ebintu ebindi byonabyona ebyab-bairewo, ni batya ino, ni bakoba bati, "Dala onu abbairi niye oMwana wa Kibbumba!"

<sup>55</sup> Era wabbairiwo abakali bangi aawo abab-baire e yalakuuku nga balengera. Babbairi basengereirye oYesu kuzwa Galiraaya nga ba-muweererya.

<sup>56</sup> Era mwibo wabbairimu oMalyamu oMan-gadaleena, n'oMalyamu omaaye wa Yaakobbo

n’oYusufu, era n’omaaye w’abataane ba Zebedaaayo.

*Okuliika oYesu*

*(Mak 15:42-47; Luk 23:50-56; Yok 19:38-42)*

<sup>57</sup> Awo obwire owebwabbairi bwatira okwirugala, omusaiza omusuni ow’Alimasaaya ogubeeta oYusufu, era yena eyabbairi asuukire omwegi wa Yesu n’atuuka e gibakomereire oYesu.

<sup>58</sup> Kale n’ayaba e giri oPiraato, n’amusaba omulambo gwa Yesu. Era oPiraato n’alagira okugumuwa.

<sup>59</sup> Kale oYusufu n’atwala omulambo, n’agulingira omu lugoye olubeeta olineni olutukula.

<sup>60</sup> Era n’aguteeka omu magombege ag’empuku, ageyabbairi yankutemanga omwibbaale era nga tateekangakuumu mulambo. N’ayiringitya ogubbaale, n’aigalira omulyango ogw’amagombe, n’azwawo. <sup>61</sup> Era oMalyamu oMangadaleena n’oMalyamu ogondi babbaire batyaime aawo okumpi nga balingiriire oku magombe.

*Abakuumi oku magombe*

<sup>62</sup> Awo oku lunaku olwairireku, era nga ku Saabbaato, abakabona abakulu n’aBafalisaayo, ni baaba egiri oPiraato,

<sup>63</sup> ni bamukoba bati, “Musengwa, twebukirya tuti omubbeyi oyo oweyabbairi ng’akaali

mwomi, yakobere ati oluzwanyuma lw'okufa yalizuukira oku lunaku lwokusatu.

<sup>64</sup> Kale olagire bakuumire nakimo amagombe paka oku lunaku lw'okusatu nga bamuliikire. Anambula ekyo abeegibe bayinza okwaba ni baibbamu omulambogwe, kaisi ni bakobera abantu bati, 'Azuukire!' Olwo obubbeyi obw'oluzwanyuma obwo bubba bwabba bub-bibubbi okukiraku obwasookere."

<sup>65</sup> Awo oPiraato n'abakoba ati, "Mutwale abaisirikale abakuumi, era bakuumire nakimo amagombe ago ng'owebayezya."

<sup>66</sup> Kale ni baaba, ni basiba bakalangulira nakimo eibbaale omu mulyango, era ni balekawo abakuumi.

## 28

### *Okuzuukira kwa Yesu*

*(Mak 16:1-10; Luk 24:1-12; Yok 20:1-10)*

<sup>1</sup> Awo ng'eSaabbaato ewoireku, amakeezi pwi olwesaabbiiti, oMalyamu oMangadaleena n'oMalyamu ogondi ni baaba okubona amagombe ag'empuku omubabbaire bateekere oYesu.

<sup>2</sup> Kale owebatuukire ni wagwawo omusisi ow'amaani, olw'okubba omalaika wa Musengwa iye oKibbumba yazwire omwigulu n'aika oku magombe nago n'ayiringitya eibbaale eryabbaire omu mulyango n'alitoolawo, era n'alityamaku.

<sup>3</sup> Omalaika oyo yabbaire amasaamasa ooti kumesya kwa ikendi, n'ebizwalobye nga bitukula ooti mabbaale ga ikendi.

<sup>4</sup> N'olwekyo abakuumi ni bamutya ino, ni batukuta era ni babba ooti bafiire.

<sup>5</sup> Awo omalaika n'akoba abakali abo ati, "Timwatya, mmaite nti munoonia Yesu ogubakomereire oku musalabba.

<sup>6</sup> Aanu abulawo, azuukiire ng'oweyakobere. Mwize mubone e gibabbaire bamuteekere.

<sup>7</sup> Olwo kaisi mwabe mangu mukobere abeegibe muti, 'Azuukiire, era yeesookere okwaba e Galiraaya, eeyo gimwamubonera.' Obwo niibwo obukwenda obumbakobeire."

<sup>8</sup> Kale abakali abo ni bazwa mangu oku magombe ago nga batiire, neye nga baizwire eisangaalo, ni bairuka okukobera abeegibe.

<sup>9</sup> Awo owebabbaire baaba, oYesu n'abeerukira ng'abazwera omumaiso, n'abakoba ati, "Mbasugiirye!" Era bamwigereraku, ni bakoma amazwi kaisi ni beevambirya oku bigerebye ni bamusinza.

<sup>10</sup> Kale awo oYesu n'abakoba ati, "Timwatya, mwabe mukobere abeegi bange baabe e Galiraaya, eeyo niiyo e gibambonera."

### *Alipoota y'abakuumi*

<sup>11</sup> Awo abakali abo owebabbaire bazwa oku magombe nga bali omu nzira baaba, abamo oku baisirikale abakuumi b'amagombe ga Yesu, ni baaba omu kibuga, ni bakobera abakabona abakulu byonabyona ebyabbaire bituukirewo.

<sup>12</sup> Kale abakabona abakulu ni bakumbaana aamo n'abantu abakulu omwigwanga, ni ba-teesa. Era ni basalawo ni bawa abaisirikale empiiya nyingi okubagulirira,

<sup>13</sup> nga babakoba bati, "Mukobe muti, 'Abeegibe eizo baizire obwire nga tugonere, ni baibba omulambogwe.'

<sup>14</sup> Ekyo omufugi oPiraato oweyakiwulira, iswe twabawozererya ni mulama omusango."

<sup>15</sup> Kale awo abakuumi ni bakwata empiiya, era ni bakola ng'owebabakobere. Ekibono ekyo ni kisaalaana omu Bayudaaya paka atyanu.

*OYesu abonekerera abeegibe*

*(Mak 16:14-18; Luk 24:36-49; Yok 20:19-23; Bik 1:6-8)*

<sup>16</sup> Awo abeegi eikumi na moiza ni baaba e Galiraaya, oku lusozi oYesu e giyabakobere okwaba.

<sup>17</sup> Era owebamuboine, ni bamusinza, neye abamo kwibo ni bamubusabuusa.

<sup>18</sup> Awo oYesu n'aigerera e gibali kaisi n'abakoba ati, "Bampaire obwezye bwonabwona omwigulu n'oku kyalo.

<sup>19</sup> N'olwekyo mwabe musuuce abantu ab'amawanga gonagona babbe beegi bange, nga mubabatiza omu liina lya Bbaabba, n'ery'oMwana, n'ery'oMwoyo oMutukulye,

<sup>20</sup> nga mubeegesya okukwatanga byonabyona ebinabalagiire inywe. Era dala naabbanga na inywe paka ekyalo owekyaliwaawo."

**ENdagaano eMpyaka oMu Lugwere**  
**Gwere: Endagaano Empyaka Omu Lugwere (Bible)**

copyright © 2017 Wycliffe Bible Translators, Inc.

Language: Gwere

Contributor: Wycliffe Bible Translators, Inc.

All rights reserved.

2025-05-03

---

PDF generated using Haiola and XeLaTeX on 2 May 2025 from source files  
dated 3 May 2025

03698e2d-9c8d-5b1f-bc49-b0066e860180